

## Binga Ewamei Awa Matthew Mi Gaisira

### *IESU KERISO DA MAMOUMBOGO*

<sup>1</sup> Eiawa Iesu Keriso da mamoumbogo. Edo umo awa David da orobe. Edo David awa Abraham da orobe.

<sup>2</sup> Edo Abraham awa Isaac da mamoumbogo. Isaac awa Jacob da mamoumbogo. Jacob awa Judah de uso nanonamendi de da mamoumbogo. <sup>3</sup> Judah awa Perez de Zerah de da mamoumbogo ai awa Tamar. Perez awa Hezron da mamoumbogo. Hezron awa Ram da mamoumbogo. <sup>4</sup> Ram awa Amminadab da mamoumbogo. Amminadab awa Nahshon da mamoumbogo. Nahshon awa Salmon da mamoumbogo. <sup>5</sup> Salmon awa Boaz da mamoumbogo edo uso ai awa Rahab. Boaz awa Obed da mamoumbogo edo Obed uso ai awa Ruth. Obed awa Jesse da mamoumbogo. <sup>6</sup> Jesse awa gitijigari nembodiba David da mamoumbogo.

Edo David awa Solomon da mamoumbogo edo Solomon uso ai awa Uriah da rori. <sup>7</sup> Solomon awa Rehoboam da mamoumbogo. Rehoboam awa Abijah da mamoumbogo. Abijah awa Asa da mamoumbogo. <sup>8</sup> Asa awa Jehoshaphat da mamoumbogo. Jehoshaphat awa Joram da mamoumbogo. Joram awa Uzziah da mamoumbogo. <sup>9</sup> Uzziah awa Jotham da mamoumbogo. Jotham awa Ahaz da mamoumbogo. Ahaz awa Hezekiah da mamoumbogo. <sup>10</sup> Hezekiah awa Manasseh da mamoumbogo. Manasseh awa Amon da mamoumbogo. Amon awa Josiah da mamoumbogo. <sup>11</sup> Josiah awa Jechoniah de uso nanonamendi de da mamoumbogo edo ungo awa iji ainde Babylon busu embomei mi Jew embomei bundedo budo mambusera Babylon busu ainde.

<sup>12</sup> Edo wasiri awa atae etiri ainde amboda Jechoniah awa Shealtiel da mamoumbogo. Shealtiel awa Zerubbabel da mamoumbogo. <sup>13</sup> Zerubbabel awa Abiud da mamoumbogo. Abiud awa Eliakim da mamoumbogo. Eliakim awa Azor da mamoumbogo. <sup>14</sup> Azor awa Zadok da mamoumbogo. Zadok awa Achim da mamoumbogo. Achim awa

## MATTHEW 1:15      2      MATTHEW 1:25

Eliud da mamu. <sup>15</sup>Eliud awa Eleazar da mamu. Eleazar awa Matthan da mamu. Matthan awa Jacob da mamu. <sup>16</sup>Jacob awa Joseph da mamu edo Joseph awa Mary da iu. Mary awa Iesu awa jawo nei Keriso ainda ai.

<sup>17</sup> Eiawa orobe ajigari 14 Abraham da iji de edo mambudo gitijigari nembodiba David da iji de. Edo ajigari 14 David da iji de edo mambudo ungo Babylon busu da gajari oro da atisera ainda. Edo ajigari 14 mambudo Soregari Embo Mamu mi itari bugarase sisira bugusira ainda.

### *MARY IESU KERISO BURISIRA*

<sup>18</sup> Eiawa be Iesu Keriso da kumbari da kiki ra. Joseph Mary Iesu da ai adira awa jimbadi dipapa etiri ungodu orobe awara sisira. Ungo dada edo iu aro awodo ae awarate Asisi Kotopu mi Mary da tini da sirore etiri Mary gasou jijirisira. <sup>19</sup> Edo Joseph Mary doadi dipapa isira awarate umu awa embo ewamei awasedo gae gae ari ge soro Mary me geurase Joseph kotisira, “Na Mary doadena te mana sano embo gadera.”

<sup>20</sup> Edo Joseph ge awodo kotise atiko eturo isira. Eturo da asisi ewamei Mamu da yei edo uso yei bugusira. Bugudu sisira, “Joseph David da orobe imo Mary jimbari oju eose amone ta Asisi Kotopu mi tini da sirore etiri gasou jirira.

<sup>21</sup> Edo Mary mei bari uso jawo Iesu seio ainda be awa unemi uso embomei wasiri biae da soregadira.”

<sup>22-23</sup> Edo Mamu mi uso binga sari embo da yei da awodo matu sisira, “Embo berari dengoro ewo. Gagara ademei mi tini de edo mei badira. Edo uso jawo awa Emmanuel sadera ainda be awa Mamu ingode atadi bugira.” Edo Mary mei Iesu ingari embo berari mi gadera Mamu da binga sari embo mi ro sisira awa be etira awa.

<sup>24</sup> Edo Joseph ewuko erido asisi ewamei mi ro sisira awa isira. <sup>25</sup> Edo Mary jimbusira awarate umu Mary ga ewae

atiri Mary mei burisira. Etiri Joseph mi mei jawo Iesu sisira.

## 2

### *ESEGA EMBOMEI JERUSALEM NATI DA BUGUSERA*

<sup>1</sup> Mary Iesu Bethlehem nati ainda Judea busu da joda burisira iji ainde awa embo nembodiba jawo Herod awa busu embomei ainda da gitijigari atisira. Edo iji tupo jiro gari embomei ungo damana de eturo de da be gido era awa ungodu busu nati waiko vitari kena awa dodo Jerusalem nati da bugusera. <sup>2</sup> Bugudo sisera, “Mei kiambu seka Jew embomei gitijigadi bugira mo rawari? Nango uso damana waiko vitari kena gido umo tumondebain adi bugera.”

<sup>3</sup> Setero Herod ge awa ingido umo duduku isira Jerusalem nati embomei daedo da awodo isera. <sup>4</sup> Edo Herod mi setiri Jew embomei da priest da gitijigegari de agodari da atopapotegari de uso yei dada etero Herod ungodu yei sedo gosisira, “Mamo da binga sari embomei mi yei rawainda evetu mi Keriso barase siseri?” <sup>5</sup> Setiri ungoi mina sisera, “Bethlehem nati da Judea busu joda. Eire Mamo da binga sari embo mi gaisira,

<sup>6</sup> ‘Ingo Bethlehem nati embo Judea busu da awa kiambu aera awarate nati embomei nenei Judea busu da awa memeia ra. Ingo awa nati embomei nembodiba ra ainda be awa ingoda yei da edo gitijigari nembodiba bugudo Mamo da embo Israel gitijigadira.’ ”

<sup>7</sup> Awasedo Herod mi esega embo iji vitari da bugusera ainda gae unjugari da setiri bugero ungodu yei nganega edo gosisira, “Ingo be iji nonde damana eiawa bugiri getevi?” <sup>8</sup> Setiri ungo iji nonde damana bugusera awa uso yei sisira edo Herod ungodu yei sisira, “Ingo Bethlehem nati da mambuwo. Mambudo mei kiambu awa eura

edo gogowo ewo. Edo ingo umo tambudo gido bugudo sewo na gane ainda be awa na daedo mambudo umo tumondebain adi dipapa ena.”

<sup>9</sup> Edo umo awa setiri ungo yei awa doturiseru. Dodo mambuse damana iji vitari da gosiseru da awa gosiseru. Edo damana eiawa giti giti mambudo pepetisira mei kiambu atira yei ainda inda beitungisira. <sup>10</sup> Edo ungo damana awa gido ainda amboda dubo ewamei isira. <sup>11</sup> Edo ungo mambudo mando joda torido mei kiambu uso ai Mary ga gosiseru. Gido baingo dederi edo tumondebain isira. Edoungo ungodu sapoia pirigedo Iesu da kando ewamei ititiseru gold edo ri da vibu muno ewamei jawo frankincense edo myrrh awa ititiseru.

<sup>12</sup> Edo Mamo mi eturo da bugudo ungodu yei sisira, “Herod da yei sekago engenembedo mambove.” Setiri gido ungo emboro nei da awodo ungodu busu da mam-buseru.

#### *JOSEPH DE MARY DE EGYPT BUSU DA MAMBUSERA*

<sup>13</sup> Edo ungo mambero ainda amboda Mamo da asisi ewamei eturo da bugudo Joseph da yei sisira, “Erio. Erido mei kiambu de uso ai de budo oju sumbudo Egypt busu da mambuse. Edo Herod awa mei kiambu eura edo dari betarase jarira awasedo ainda atiroso amboda nanemi sano engenembuse.”

<sup>14</sup> Awasedo Joseph tumba de erido mei kiambu de uso ai de budo yei awa dodo Egypt da mambudo ainda atirari amboda Herod betarase. <sup>15</sup> Etiri Mamo mi matu ro sisira awa be isira. Umo sisira, “Na naso mei Egypt dodo mambarase jawo sisena.”

<sup>16</sup> Edo esega embomei iji vitari da awa Herod da yei bugae etero Herod kotisira awa embomei ami umo gandubari ge sedo umo tini gambari isira. Edo tini gambari edo embo nenei uso yei da setiri bugero edo ungodu yei

sisira, “Bethlehem nati da mambuwo edo daedo uso nati demonda ainda memei memeiako ungoda gaeko etoto edo tuda awa dawo bebetegore.” Edo Herod eiedo sisira ainda be awa esega embomei iji vitari da edo bugusera amimi sisera awa ungo damana awa gaeko etoto da gari sisera awasedo. <sup>17</sup> Eiawa bugiri ge ro binga itari embo Jeremiah mi ro sisira awa be bugusira. <sup>18</sup> Edo Jeremiah mi sisira, “Embo mi javi ingera Ramah nati ainda awawa embo da ji bia da gembu. Edo Rachel da edo uso orobe emboevetu berari ji sewora ungoda kinapeina betetera awasedo.”

*EGYPT DODO GALILEE BUSU DA MAMBUSERA*

<sup>19-20</sup> Edo Herod betetiri ainda amboda Joseph Egypt ainda atiri Mamo da asisi ewamei mi uso yei bugudo eturo da sisira, “Embo mei kiambu dari betarase evira amone betetira awasedo erido mei kiambu de uso ai de budo sekago Israel busu da engenembase.” <sup>21</sup> Awasedo Joseph erido mei kiambu de uso ai de budo sekago engenembedo busu Israel da mambusira. Edo Joseph eiedo isira amimi Mamo mi binga sari embo da yei sisira awa be isira. Edo Mamo mi sisira, “Nanemi naso mei Egypt busu ainda jawo seteno bugira.”

<sup>22</sup> Edo Joseph umo Israel busu da mambuse binga ingisira awa Herod da mei Archelaus mi Judea busu embomei awa gitijijigurira awa. Edo binga awa ingido Joseph umo ainda petari awa oju isira awarate sekago Mamo mi Joseph da yei eturo da sisira awasedo umo mambudo busu Galilee ainda anumburisira Nazareth nati ainda. <sup>23</sup> Edo umo ainda anumbetiri ro binga sari embo mi sisira awa be isira, “Umo awa Nazareth nati embo adira.”

<sup>1</sup> Iji ainde John umo mi ewamei ari embo mi bugudo Judea busu da yei embo atae ainda atopatadi tuturo isira.

<sup>2</sup> Edo John mi sisira, “Iji bugira edo Mamo mi gitijigadira awa aikambu etira awasedo wasiri biae dodo Mamo da yei puwo.” <sup>3</sup> Edo binga sari embo jawo Isaiiah mi embo einda jawo da ge sisira,

“Embo da mi yei embo atae da tembuse binga minonu sadira, ‘Gitijigari da emboro sia ewo edo emboro ewamei ewo.’”

<sup>4</sup> Edo John uso ombari digari awa wo jawo camel da tu mi ari edo uso sini awa wo da tu mi ari edo umo indari awa sopika de mumuni de awa indido isira. <sup>5</sup> Edo Jerusalem nati embomei edo Judea busu embomei berari de edo Jordan umo bengi da atima edo isera embomei ainde mi bugudo John atopapotira awa gadi bugusera. <sup>6</sup> Edo John da dengoro bagari awa ingido ainda amboda ungoi sisera, “Nango buria etera.” Setero John mi umo Jordan da ungo umo mi ewamei isira.

<sup>7</sup> Edo John mi agodari simba ari embomei jiwae Pharisee de Sadducee uso yei bugutero gosisira edo ungo John mi umo mi ewamei arase dipapa etero umo ungodu yei sisira, “Ingo awa teta jingabu da memei ingege. Edo iji Mamo mi ingo kasadira awa bugutira. Na kove be ena ko imo kotesa Mamo busu da embo kasadira ainde awa imo jebugadesa. <sup>8</sup> Edo ingo wasiri ewamei ewo. Edo wasiri ewamei adewa awa embomei ingo ingoda wasiri biae awa doturewa awa gadera. <sup>9</sup> Edo kotove Abraham awa nangoda mamoumbogo awasedo Mamo mi nango mana kasadira kotove. Awodo aera te Mamo mi ingo kasadira. Edo Mamo uso dipapa awodo edo ganuma einda Mamo mi Abraham da orobe adira. <sup>10</sup> Edo ingo awa teta ribe ae edo ira da awodo ra. Edo embo oto de awa sia etira ri jegadi. Jegedo pigari riawo da ewarase ribe ae edo ira awa mambadira.

<sup>11</sup> “Edo embo ave ungoda wasiri biae doturera awa nanemi umo mi ewamei ena awarate embo da naso amboda bugutira amimi Asisi Kotopu de riawo de mi ewamei adira. Edo embo eiawa nembodiba be awarate na awa embo nembodiba ae edo na awa ewa raro uso tei goru simba eni? <sup>12</sup> Edo umo indari wheat da puti awa demonda ititise edo indari wheat be awa ewoga ewoga adira. Edo indari wheat be awa uso indari itari yei da ititise edo puti awa pigari riawo da ewadira riawo matawa atari da ewadira.”

#### *JOHN IESU UMO MI EWAMEI ISIRA*

<sup>13</sup> Edo iji ainde Iesu Galilee busu awa dodo edo Jordan umo be da bugusira John mi ainda umo mi ewamei arase.

<sup>14</sup> Awarate John Iesu umo mi ewamei ari oju ae edo uso yei sisira, “Na imo umo mi ewamei anase sedo geose. Na awa embo wasiri biae de ra awarate imo awa wasiri biae aera awasedo na inemi umo mi ewamei asase dipapa ena.”

<sup>15</sup> Setiri Iesu mi mina sisira, “Sedo gosena te umo mi ewamei egae ko eiedo adesa amimi ingae Mamo ro sisira awa adera.” Setiri John awara sisira.

<sup>16</sup> Edo John Iesu umo mi ewamei etiri ainda amboda Iesu umo jo dodo vivitiri utu pirigetiri edo umo Mamo da Asisi teta ri ribo inge wowosiri gosisira. <sup>17</sup> Edo Mamo da Asisi wosedo uso yei anumbetiri edo ge javi utu da awodo sisira, “Emone naso mei na awa na dubo burena. Na uso yei naso jo iaviri ira.”

## 4

#### *SATAN IESU BAGISIRA*

<sup>1</sup> Edo Asisi Kotopu mi Iesu budo yei embo atae da Satan mi bagarase budo mambusira. <sup>2</sup> Edo Iesu ainda iji 40 edo tumba 40 indari indae atisira. <sup>3</sup> Edo Iesu umo beji tambutiri Satan mi bagarase uso yei bugudo sisira, “Imo

Mamo da mei sadesa awa seio ganuma eiawa ambe ari indase.”

<sup>4</sup> Awarate Iesu mi mina sisira, “Awodo aera jiwari ewamei be ewamei sira awa embo ave ambe berari indadira awa uso asisi awa beji de atadira awarate umo Mamo mi ge berari ro sira awa ingadira awa uso asisi awa inono adira.”

<sup>5</sup> Edo ainda amboda Satan mi Iesu budo Jerusalem nati da budo mambudo edo Jew embomei da tumondebain ari oro da inda ititisira. <sup>6</sup> Edo Satan Iesu ainda itido atae edo uso yei sisira, “Imo Mamo da mei sadesa awa kekepunya edo busu da woseio ainda be awa jiwari ewamei be ewamei mi sira awa Mamo mi uso asisi ewagaewa sari imo simba adera edo ungo mi imo simba ise ungodada ingo mi imo jigadera oro iso tei awa mana ganuma da dadesa sira.”

<sup>7</sup> Setiri Iesu mi mina sisira, “Awarate jiwari ewamei be ewamei da daedo sira imo mana Mamo iso bawari da itadesa sira.”

<sup>8</sup> Setiri ainda amboda Satan mi Iesu budo doriri nembodiba da tamo da mambusira. Edo Satan Iesu ainda itido Satan mi Iesu busu da embo berari awa ujugetiri gosisira. Edo Iesu gosisira awa ewamei be ra. <sup>9</sup> Edo Satan mi Iesu da yei sisira, “Imo baingo dederi edo na tumondebain adesa awa nanemi yei berari da eiawa iso yei da itadena.”

<sup>10</sup> Setiri Iesu mi mina sisira, “Satan ewoga mambu. Edo jiwari ewamei be ewamei mi sira awa ingo Mamo da awa tumondebain adewa edo kera adewa edo embo nei awa kera eove sira.”

<sup>11</sup> Awasedo Satan Iesu dodo mambiri edo asisi ewagaewa mi bugudo Iesu kondade isera.

#### *IESU USO BURO GALILEE BUSU DA TUTURO ISIRA*

<sup>12</sup> Edo Iesu umo John gajari oro da itero binga ingido Iesu Galilee busu da mambusira. <sup>13</sup> Edo Nazareth nati da iji tupo atinatina yei awa dodo nati Capernaum da mambudo atima isira. Edo nati eiawa umo diuga Galilee da bengi



da busu Zebulun de Naphtali deda demonda. <sup>14</sup> Edo Iesu ainda mambusira ainda be awa binga sari embo Isaiah mi ro sisira awa be isira. <sup>15</sup> Edo Isaiah mi sisira, “Edo Jordan umo be nei da edo ewa kena awa Zebulun busu de edo Naphtali busu de edo Galilee busu mendo da awa embo Jew ae jawo Gentile atima isera.

<sup>16</sup> Edo embo ainda atima isera awa teta umenga da atarago edo isera edo teta betari da utumo da atarago edo isera. Edo ungo awodo atiroro embomei amimi usasa nembodiba be gadera.”

<sup>17</sup> Edo iji ainde Iesu umo atopatadi tuturo isira edo sisira, “Mamo mi ingo gitijigadira iji awa bugira awasedo ingoda wasiri bebegae awa dodo Mamo da yei puwo.”

#### *WO BARI EMBOMEI IESU AMBO AMBO ISERA*

<sup>18</sup> Edo Iesu umo Galilee umo bengi da pepeta ise nanonamendi etoto wo buro ero gosisira. Simon uso jawo nei Peter de uso namendi Andrew de awa komboro mi wo burero gosisira. <sup>19</sup> Edo Iesu ungodada yei sisira, “Na ambo ambo ewo. Ingoda imamo mi ingo wo oiro awase atopapotisira da awodo nanemi ingo atopatano na awa embo embo berave.” <sup>20</sup> Setiri iji ainde ungo ungodada komboro dodo Iesu ambo ambo isera.

<sup>21</sup> Edo kiambu yise nanonamendi nenei etoto James de John de Zebedee da memei awa gosisira ungo awa ungodada nga da anumbedo ungodada mamo Zebedee ga da ungodada komboro to ise atero gosisira. Gido Iesu mi ungodada yei sisira umo ambo ambo orase sisira. <sup>22</sup> Setiri ungo burigi be erido ungodada mamo de nga de dodo Iesu ambo ambo isera.

#### *EMBO JIWAE IESU DA BINGA INGISERA*

<sup>23</sup> Edo Iesu Galilee busu jo da tembuse Jew da dada ari oro da atopatido isira. Edo binga ewamei Mamo

mi iji nonde embomei gitijigadira awa atopatido isira. Edo embo karu amburo neinde kainde bari awa euri jebugedo isera. <sup>24</sup> Edo busu Syria embo mi Iesu da buro ira ainda binga awa gido embo karu amburo neinde kainde edo dubo vevera tambudo isera awa budo Iesu da yei bugusera. Edo embo ave asisi biae mi sirari ta ko edo embo ave karu jawo epilepsy bari ta edo embo nenei karu tei ingo ambari ta awa berari Iesu mi euri jebugedo isera. <sup>25</sup> Edo embo jiwae be busu Galilee da edo yei jawo Gabu Etoto nati da edo Jerusalem nati da edo Judea busu da edo busu nei Jordan umo bengi da awa berari bugudo Iesu ambo ambo isera.

## 5

### *IESU DORIRI DA AMBOJIMBI AWA ATOPAPOTISIRA*

<sup>1</sup> Edo Iesu embo diti nembodiba awa gido doriri inda vivitisira. Vitido ainda anumburisira. <sup>2</sup> Etiri uso ambojimbi bugudo uso yei dada etero Iesu ungo atopatadi tuturo isira edo ge eiawa sisira.

### *DUBO EWAMEI BE AWA*

- <sup>3</sup> “Embo ave umo umosuka kondade ari sago ae awa gosira embo unemi Mamo gebe ira embo awa dubo ewamei ira ainda be awa Mamo mi gitijigadira ainde awa umo awa Mamo ga daedo atadira awasedo.
- <sup>4</sup> “Edo embo ave nei ro mi dubo vevera ira awa dubo ewamei ira ainda be awa Mamo mi umo kondade adira awasedo.
- <sup>5</sup> “Edo embo ave saboa evira awa Mamo mi ro barase sisira awa badira awasedo dubo ewamei ira.
- <sup>6</sup> “Edo embo ave Mamo da dipapa awa adi dipapa be evira awa dubo ewamei ira ainda be awa Mamo mi umo awa ari beda adira.

7 “Edo embo ave embo nenei da yei jo edo ira awa dubo ewamei ira ainda be awa Mamo uso yei da jo adira.

8 “Edo embo ave uso jiro jingama ewamei evira awa dubo ewamei ira unemi Mamo gadira awasedo.

9 “Edo embobo ememi embo nenei ge bagera awa eoro atae edo ira awa dubo ewamei ira Mamo mi umo awa uso kinapeina sadira awasedo.

10 “Edo embo ave Mamo da dipapa awa adi euri embo mi dedo gaedo ewora awa dubo ewamei ira Mamo gitijigadira ainde awa umo awa Mamo ga daedo awasedo.

11-12 “Edo imo na ambo ambo esa awasedo embo mi iso yei da ge biae sadera edo imo dedo gaedo ise gebusadera awa dubo ewamei eio ainda be awa nanemi kando nem-bodiba imo awasedo utu da sia ena. Edo da awodo embo nenei mi Mamo da binga sari embomei matu da atima isera dedo gaedo isera.”

#### *TOKAKA DE USASA DE DA ATOPATARI AWA*

13 Edo Iesu uso ambojimbi atopapotise atise sisira, “Nanemi ingo awa embo da teda ititena teta ewa tokaka embo mi indari da itido era da awodo awarate tokaka awa uso tokaka da mina bari awa atae ari inemi mana aso sekago tokaka adira. Amone jingama ari sago ae etira awasedo imo pigaso mambari embo mi ainda tamo da pepeta adera.

14 “Awarate na ingo ititena teta goriwo usasa de embo mi yei umenga da itido era da awodo. Edo embo nati doriri tamo da edo ira awa embo berari mi nati awa gido era.

15 Awarate embo amemi mana ri injibedo ou to da itadira awodo aera te unemi ri injibedo awa aviga da itari embo berari mando da awa usasa adira. 16 Da awodo iso wasiri esa awa amimi teta riawo mi janibarago are embo da yei. Edo wasiri ewamei awa gosise iso Mamo utu da awa jasiga ore.

### AGODARI DA ATOPATARI AWA

<sup>17</sup> “Edo Moses da agodari de Mamo da binga sari embomei mi ro atopapotisera awa na budo pigadi bugusena awa kotove ainda be awa na budo pigadi bugae awarate na awa ro Moses de Mamo da binga sari embo de mi ro atopapotisera awa amo be arase bugusena. <sup>18</sup> Edo ro sena awa ruvegeove Mamo da ge awa matawa atadira edo uso ge awa be adira. Edo Mamo mi mana doari uso ove kiambu ta ko ove nembodiba agodari jiwari awa mana embo mi pigoro mana mambadira. <sup>19</sup> Awasedo embo ave Mamo da agodari kiambu ta agodari nembodiba ta awa kera ae adira ise embo nenei da awodo atopatadira awa embo awa Mamo bugudo gitijigadira iji ainde awa kiambu adira. Awarate embo ave Mamo da agodari awa gebe ise da awodo embo nenei atopatadira awa embo awa Mamo bugudo gitijigadira ainde awa embo nembodiba adira. <sup>20</sup> Edo na ingoda yei sena ingoda wasiri agodari da simba ari embomei jawo Pharisee de agodari da gaiari embomei jawo Scribe de da awodo ae gadewa gido awa mana Mamo mi gitijigadira ainda iji de awa ingo awa ainda adewa.”

### TINI GAMBARI AWA

<sup>21</sup> Edo Iesu atopapotise atise sisira, “Moses mi embo iji ainde atima isera ainda yei sisira embo dawo beture edo embo ave embo nei dari betadira awa embo awa budo busu da kasari embo da yei buguwo sisira. <sup>22</sup> Awarate nanemi ingoda yei sena embo amemi embo nei da yei tini gambari adira awa busu da kasari embo da yei budo buguwo. Edo embo amei uso namendi da yei imo embo biae sadira awa embo awa ungomi kundo budo nati embobo mi kasadera ainda yei mambadera. Edo embo ave embo nei da yei sadira imo jiro gari ae embo sadira embo awa mambudo riawo natopo atari da mambadira.

23-24 “Awasedo imo Mamo da rorou itari yei da derido imo iso otao ga da ge bagetesa awa kotedo re iso rorou ainda dodo iso otao da yei mambuio. Edo mambudo awa otao ga da dubo ewamei ari eio. Edo imo awodo edo awa engenbedo mambudo Mamo da yei iso roroutio.

25 “Edo embo amemi iso yei rora da ro da tamo da tini gambari edo edo imo kasari yei da budo mambadi ari gido re embo ainga da burigi namendi eio awarate imo awodo ae adesa awa embo amimi imo budo kasari embo da itadira. Itari amimi budo agodari simba ari embo da itadira. Edo ungoi imo badera awa imo gajari oro da itadera. 26 Edo na ingoda yei gebe sena unemi imo gajari oro da itadira awa imo ainda atise iso buria da mina berari awa itadesa.

#### *IPU DA ARI AWA*

27-28 “Edo ingo gosewowa ungoi sisera ipu da eove sisera awarate nanemi ingoda yei sena embo amemi evetu ta ko gagara awa gido dipapa adira awa unemi evetu ta mo gagara ainga uso jo da ipu da ari awa etira. 29 Edo iso diti be mi ari imo wasiri biae edo gido re gurugedo budo pigeio. 30 Edo iso ingo be mi ari imo wasiri biae edo gido re diugedo budo pigeio. Edo ro mi etiri imo wasiri biae etesa awa pigadesa amone ewamei ra. Edo ro mi etiri wasiri biae etesa awa pigae etesa amone biae ra awasedo imo awa riawo natopo atari euse atira ainda mambadesa.

#### *ARO DOARI AWA*

31 “Edo ingo daedo ingewa ungoi sisera embo ave uso aro doadi dipapa adira awara sari gari ove jivedo evetu awa doadira sisera awarate naso ge eiawa ingiwo. 32 Embo amemi uso aro awa saboa edo atirari dodo tepo awodo uso aro doadira evetu awa sekago jimbadira embo amimi ari evetu awa ipu da ari adira. Edo embo ave evetu awa jimbadira embo awa ipu da ari awa adira.

*SARI GARI GE AWA*

<sup>33</sup> “Edo ingo daedo matu gosewowa tuturo da sisera imo Mamo da yei ro adi sari ge be mi sisesa awa eio sisera. <sup>34</sup> Awarate boroko na ingoda yei sena ingo ro adi sari sadewa awa ge mi goroba edo seove. Edo utu da jawo seove utu amone ta Mamo da anumba de gitijigari yei ra. <sup>35</sup> Edo daedo busu da jawo da seove amone ta Mamo da tei itari yei ra. Edo Jerusalem nati da jawo da seove amone ta gitijigari nembodiba da nati ra. <sup>36</sup> Edo iso wasiri da jawo da adi sari awa goroba edo seove ainda be awa Mamo umo umosuka ari embo awa wasiri de atadera awasedo. <sup>37</sup> Awodo aera ge goroba de awodo seove ta ko da awara o awara aera awodo sewo. Edo ge eiawa sadesa awa inono ra te ge goroba edo sadesa awa ewamei aera ainda be awa Satan mi ge da awodo sedo ira awasedo.

*MINA ARI AWA*

<sup>38</sup> “Edo ingo matu gosewowa daedo sisera embo amemi embo nei da dombu gaedo gurugadira awa mina dari dombu da gurugadira. Edo embo amemi embo nei da di da dari eregadira awa mina dari di da eragadira sisera. <sup>39</sup> Awarate na ingoda yei sena embo amemi iso yei biae ari gido mi biae mina eose. Edo amemi imo sogo da dari gido sogo benei eio dare. <sup>40</sup> Edo embo amemi imo kasedo iso ombari tu da awa bari gido iso ombari tamo ainde da doio bare. <sup>41</sup> Edo isoro embo da mi uso rora ango edo yei tupo yasase sari gido budo yei ribori mambuio. <sup>42</sup> Edo embo amemi uso yei rora itasase sari gido uso yei itio. Edo embo amemi iso rora jingama ari dipapa ari gido re awara seio jingama are.

*IESU ATOPAPOTISIRA INGODA GITOPO DUBO BUWO*

<sup>43</sup> “Edo ingo gosewa daedo sisera namendi iso dubo burise gitopo iso de tini gambari eio sisera. <sup>44</sup> Awarate naso ge ingiwo. Na ingoda yei sena gitopo ingoda dubo

buwo edo sedo giwo Mamo mi embo ingo dedo gaedo edo era awa kondade are. <sup>45</sup> Edo embo mi ingo wasiri eiedo irirowo gadera awa ungoi gadera ingo awa Mamo da kinapeina awodo gadera. Embo nenei da yei awodo ewamei ewo ko Mamo mi ari waiko embo biae de embo ewamei de da yei janibadira edo Mamo daedo ga embo biae da embo ewamei de da yei itido ira. <sup>46</sup> Edo ingo embo ingo dubo burera awa dubo badewa te ingoda gitopo awa dubo bae awa Mamo mi awa awasedo ingo ewamei adi aera. Tax bari embobo mi embomei nei awodo dubo budo isera. <sup>47</sup> Edo imo iso otao ga ge sise iso gitopo ga daedo ge sae adesa awa imo awa embo nei aera. Edo embo ave awa Mamo da kinapeina ae awa wasiri awodo edo era. <sup>48</sup> Imo wasiri ewamei be eio teta iso Mamo utu topo mi edo ira da awodo.”

## 6

### *KANDO ARI DE JO ARI DE AWA*

<sup>1</sup> Edo Iesu uso ambojimbi atopapotise sisira, “Gido gogo ewo. Edo ingo embo mi ingo jasiga orase dipapa edo gido ingoda ari ewagaewa awa embo berari da jo da eove. Edo ingo ingoda ari ewagaewa awa embo da jo da adewa awa ingoda Mamo utu da amimi ingoda yei riroga itadi aera.

<sup>2</sup> “Awasedo ingo embo rora ae embo gido kando itadewa awa mambudo embo berari da ingo ro etewa awa seove. Awodo adewa amone embo ise sarago edo era ainda wasiri ra. Awodo ise emboro da edo Jew embomei da dada ari oro da edo nati da tembuma era. Ari ewamei ise sarago euri embo mi sedo era embo omone embo ewamei ra sedo era. Awarate ruvegeove embo mi awodo sadera embo awa uso mina re matu betira. <sup>3-4</sup> Awarate imo rora atae embo awa kondade adesa awa gae unjugari da eio. Imo awodo adesa awa Mamo imo gae unjugari da ro esa awa gido iso yei mina itadira.

*BENUNU SARI DA ATOPATARI AWA*

<sup>5</sup> “Edo embo ise sarago ari embo mi erido Mamo da yei da ge sedo ira Jew embomei da dada ari yei da edo emboro da irari embo mi umo gorase. Awarate ruvegeove embo mi umo gadera awa embo awa uso mina awa matu betira.

<sup>6</sup> Awarate boroko Mamo da yei ge teta ise sarago ari embo mi sarago eove ta ingo Mamo da yei ge sari dipapa adewa awa mambuwo ingoda mando da mando be gajedo edo Mamo da yei ingo ingosuka ge save. Ingo Mamo da yei ge awodo sadewa awa Mamo mi ingoda ge awa ingido ingo gido edo ingoda yei mina itadira.

<sup>7</sup> “Edo ingo Mamo da yei ge sise gido ge dawadawa teta embo Mamo gae mi sarago eove. Edo ungo Mamo da yei ge awodo sise Mamo mi ungodaga ingari kotedo era. <sup>8</sup> Edo ingo Mamo da yei embomei omimi Mamo da yei ge sedo era da awodo seove ko ingoda Mamo ingo ro dipapa ewa amone matu gosira. Ingo mi uso yei sae gae rate umo umosuka gosira.

<sup>9</sup> “Edo Mamo da yei ge eiedo sewo.

<sup>10</sup> ‘Mamo nangoda utu da atima esa awa embo berari mi iso jawo jasiga ore. Nango imo burigi burigi bugudo gitijigasase dipapa era. Utu da iso wasiri era da awodo embo busu da awa imo ungo ro orase dipapa esa ore.

<sup>11</sup> Nangoda indari boroko da awa inono da itigae.

<sup>12</sup> Nangoda buria awa kotembedo dogae edo da awodo nango embo nenei da buria nangoda yei awa kotembedo dodo ore.

<sup>13</sup> Edo nango bawari da kundo yiose ta ko nango biae da yeorase soregegae. Imo awa ewamei edo inemi busu da embo berari awa simba edo esa.’

<sup>14</sup> “Imo embo iso yei biae oro kotembedo doadesa awa imo wasiri biae adesa awa Mamo iso utu da da amimi imo kotembedo doadira. <sup>15</sup> Awarate imo embo iso yei wasiri



biae oro kotembedo doae adesa awa imo wasiri biae adesa Mamo utu da amimi imo mana kotembedo doadira.

#### *NETA ARI AWA*

<sup>16</sup> “Iji dada imo Mamo da yei ge sari dipapa edo indari indae adesa awarate iso dombu awa doaso biae eure teta ise sarago ari embo da awodo. Edo ungo dubo vevera dombu ise temburoro embo mi ungo mamaso era awa gorase edo era te ungo mi era da awodo eove ta giwo ungo awa ungodu mina awa matu betera. <sup>17</sup> Awarate imo neta ise Mamo da yei ge sari dipapa edo re iso dombu segedo kopiri tu gaedo eio. <sup>18</sup> Awodo adesa amimi awa imo neta esa awa mana gadera. Awarate Mamo utu da mi iso wasiri gae esa awa gido iso yei mina itadira.

#### *RORA JIWAE AWA*

<sup>19</sup> “Edo ingo rora jiwae budo busu da einda dada eove ko wowo de siri sasove mi indoro edo biae adira o bengono embo mi bejedo torido bengono adera. <sup>20</sup> Awasedo rora jiwae utu da dada ewo awo wowo ta siri sasove mi mana usibesi adira edo bengono embo mi mana bejedo torido badera. <sup>21</sup> Edo ingoda rora rawainda atira ainda ingoda jo awa daedo ainda.

#### *TAMO DA USASA AWA*

<sup>22</sup> “Edo dombu awa teta tamo da usasa awodo. Edo iso dombu ewamei awa iso tamo awa bibinago adira te iso dombu biae awa iso tamo awa umenga adira. <sup>23</sup> Edo iso yei usasa awa umenga da awodo adira awa teta ge biae kotise edo atari biae da atadesa.

#### *GITIJIGARI ETOTO AWA*

<sup>24</sup> “Embo amemi mana gitijigari etoto kera adira. Awodo adira awa unemi gitijigari nei awa dubo burise nei awa biae adira o umo nei awa embo buro ewamei ise nei awa doadira. Da awodo imo mana Mamo sapo ise edo busu da rora awa jiwae dipapa adesa.

*INDARI DE OMBARI DIGARI AWA*

<sup>25</sup> “Awasedo na ingoda yei sena ingo indari nonda budo indido kumbudo evi edo bo nonda budo evevi awa sedo kotembari jiwae eove ko indari kumbari de bo de awa nembodiba aera awarate ko ingo be awa nembodiba be ra. <sup>26</sup> Edo ri memei inda giwo. Ungo ri ve gowae edo ungo indari dada edo budo indari atari yei da itae awodo aera te Mamo ingoda utu inda atima ira amimi ungo simba ise ungo kondade euri indari tambudo era. Edo ri memei da mina awa nembodiba awarate ingoda mina awa be nembodiba be ra awasedo Mamo mi ingo awa daedo simba adira. <sup>27</sup> Edo rora berari einda kotembari jiwae ise iji natopo adewa amimi ari mana busu da iji nei kiambu yise atadewa.

<sup>28</sup> “Awasedo kotembari jiwae eose imo bo ro evesi awasedo. Awarate ri wuji erido era awa koteio. Ungo buro aera te ungo erido era gari dagariae be. <sup>29</sup> Edo gitijigari Solomon awa umo rora embo edo umo ombari ewamei edo isira. Edo umo iwuga awodo edo isira amimi euri gari ewamei edo isira awarate ri wuji awa ewamei be ra.

<sup>30</sup> “Edo boroko Mamo mi etiri sasawa eiawa ribori edo goroba de eririra awarate amboda embo mi riawo mi itoro ewadira. Edo da awodo Mamo mi edo ira Mamo mi ingo simba adira. Edo Ingo Mamo awa gebe ae sumbae edo ewa. <sup>31-32</sup> Edo embo ave Mamo gae awa iji berari kotedo ira na indari kumbari de bo sini de nonda beni kotedo ira. Awarate awodo kotove ainda be awa Mamo ingoda utu da atira amimi ingo ro embo jarewa amone gosira amimi ingo simba adira. <sup>33</sup> Edo ingo iji berari Mamo ro awase dipapa ira awa adewa awa ingo awodo irirowo Mamo ingoda yei indari de rora nenei de awa itadira. <sup>34</sup> Awasedo ro euma bugadira awa kotembari jiwae eove ko euma bugadira awa iji ainde awa euma da buria awa kotadesa. Edo iji dada awa tetegurise atiwo.”

## 7

*EMBO NENEI KASARI ARI AWA*

<sup>1</sup> Edo Iesu uso ambojimbi atopapotise sisira, “Embo nei jigi gatove awodo adewa awa embo nenei mi mana ingo kiki diradera. <sup>2</sup> Edo ingo embo nenei gae tu sumbadewa awa da awodo embo nenei mi ingo gae tu sumbadera. Emboro rawodo da imo embo nenei da yei edo esa da awodo Mamo mi iso yei adira.

<sup>3</sup> “Edo imo iso diti joda ri dewo awa atirari embo nenei da diti joda ri momono awa geose. Edo imo iso diti da ri dewo awa atirari iso namendi da yei seose iso diti da ri momono awa bane seose. <sup>4-5</sup> Imo wasiri biae embo giti iso diti da ri dewo awa budo yei isaga ari gosise awa iso namendi da diti da ri momono awa badesa.

<sup>6</sup> “Edo embo ave Mamo da binga ewamei awa bae era awa teta sino inge ra awasedo Mamo da binga awa sekago ungodada yei itove ainda be awa teta sino inge awasedo ungo wareregedo ingo gambadera. Edo kotari ewagaewa Mamo mi ingoda yei ititira awa teta ingoda mamoumbogo da ri guri nembogambo ingege ra. Edo imo mamoumbogo da ri guri nembogambo awa pigae busu da pu da joda wosae ko awodo adesa awa pu mi yise puse ise patoro biae adira.

*SEDO GARI DE EURA ARI DE TAINAIN ARI DE AWA*

<sup>7</sup> “Edo Mamo da yei sedo gio itare. Edo eura edo imo tambadesa. Edo taintain deio mangiro pirigare. <sup>8</sup> Eiedo eio ainda be awa embo ave sedo gosera awa Mamo uso yei da itadira. Edo embo ave eura era amimi tambadera. Edo embo amemi taintain dorera ainda yei mangiro awa pirigadira.

<sup>9</sup> “Edo ingo mamono ingoda memei mi indari embo soro ingo mana ungodada yei ganuma itadewa. <sup>10</sup> Edo ungo wo embo soro ingo mana jingabu itadewa. <sup>11</sup> Edo ingo awa embo ewagaewa aera te ingo ingoda kinapeina da yei rora

ewagaewa itari dipapa edo ewa. Mamo da kando itari awa iso kando itari de inono aera awasedo iso Mamo utu da atima ira awa gari gido umo iji berari rora ewagaewa embo amemi uso yei sedo gido era ainda yei itido ira.

<sup>12</sup> “Edo imo embo nei mi iso yei rawodo orase dipapa edo esa da awodo ungoda yei eio. Eiawa Moses da agodari da ititisira edo Mamo da binga sari embo mi atopapotisera.

#### *EMBORO ETOTO AWA*

<sup>13</sup> “Edo be kiambu da torio. Emboro riawo matawa ewuse atira ainda tuturo awa be beraga be ra. Edo emboro ainda toradesa amone pepeta ari re isaga be ra awasedo embo jiwae be emboro ainda pepeta edo era. <sup>14</sup> Awarate emboro ingodena mambudo Mamo ga atadera ainda tuturo awa kiambu ra awasedo embo jiwae mi emboro awa tambae edo era. Edo emboro ainda toradesa awa okain be ra.

#### *RI DE USO BE DE AWA*

<sup>15</sup> “Edo dombu iso mi embo ave umo Mamo da binga sari embo sira awarate umo gebe moka awa atopatae awa gio. Edo umo iso yei teta iso otao edo teta atopatari Mamo da yei awodo bugari inge adira awarate uso kotari awa teta ambe sino da da awodo. <sup>16</sup> Edo imo umo ro adira awa gido imo umo gadesa. Imo mana maumesi awa ri bebe de ainda mana badesa edo daedo imo mana bijo sari awa ri nei bebe de ainda mana badesa. <sup>17</sup> Awarate ri ewamei awa indari ewamei edo ira awarate ri betari awa indari biae edo ira. <sup>18</sup> Edo ri ewamei mi mana be biae mana adira edo ri betari mi mana indari ewamei mana adira. <sup>19</sup> Edo ri indari ewamei ae adira awa ingo mi diugedo ingoda riawo adewa. Awasedo ingo ri be biae irirari gadewa awa ingo gadewa ri awa biae ra. <sup>20</sup> Edo ingo embo amimi ro era awa gadewa awa ungo embo averi awa gadewa.

#### *IESU SISIRA NA IMO GAERA*

<sup>21</sup> “Edo embo jiwae naso yei sera imo awa naso gitijigari sera awarate ungo berari awa mana Mamo mi gitijigadira ainda mana atadera. Edo embo ave ro naso Mama mi orase dipapa edo ira awa edo era iji ainde awa ainda atadera.

<sup>22</sup> Edo iji awa bugadira ainde embo jiwae mi naso yei sadera aio gitijigari iso jawo da nango Mamo da binga sedo era edo nango asisi bebegae ongoro ijegedo isera edo nango ari goroba neinde kainde edo isera sadera. <sup>23</sup> Soro na ungodu yei da sadena na matu ingo embo bebegae awa gae ewona awasedo naso yei dodo edo mambuwo sadena.

#### *MANDO ITARI EMBO ETOTO AWA*

<sup>24</sup> “Awasedo embo ave naso ge ingido na ro sena awa adira awa umo awa teta jiro gari embo inge adira. Jiro gari embo eiawa uso mando tutuvi ngambedo ganuma itiri wosedo etiri tutuvi awa derido goroba isira. <sup>25</sup> Edo amboda ga de bisi bisara de umo bojedu pusira te mando awa durae ko mando da tutuvi awa etiri goroba isira awasedo. <sup>26</sup> Awarate embo ave naso ge ingido na ro sena awa ae era teta embo jiro biae embo da awodo. Embo eiawa uso mando tutuvi awa ngambusira te umo tutuvi da ganuma itae uso tutuvi awa derido edo goroba ae. <sup>27</sup> Edo amboda ga de bisi bisara de umo bojisira etiri mando awa dudurisira. Edo mando dudurisira ainda amboda mando awa ainda atae.”

#### *IESU DA GOROBA AWA*

<sup>28-29</sup> Edo Iesu uso ambojimbi atopatido atae etiri embo jiwae uso ge ingisera amimi kove be edo sisera, “Embo oiawa ingodenaso agodari da atopapotegari awodo aera te awa goroba de da atopapotira.”

<sup>1</sup> Edo Iesu doriri awa dodo wowosiri embo jiwae be mi umo ambo ambo isera. <sup>2</sup> Edo Iesu uso ambojimbi de wosedo bugero embo da karu jawo leprosy bari amimi Iesu da yei bugudo Iesu da jo da baingo dederi edo sisira, “Bada imo dipapa adesa awa na egae seka ane.”

<sup>3</sup> Edo embo awa awodo setiri Iesu uso ingo gogorugedo embo awa tamesi ise embo ainda yei sisira, “Awara dipapa ena. Iso tamo awa ewamei adira.” Edo Iesu awodo sisira iji da ainde embo ainda tamo awa ewamei isira. <sup>4</sup> Edo Iesu mi embo ainda yei sisira, “Ro iso yei da ijegetira awa saso embo nenei mi geore ta dambuderari mambuio. Mambudo priest da yei mambaso iso tamo ujugedo gare. Gari awa rorou Moses da agodari mi sira awa itase. Awodo adesa awa embo mi imo karu jawo leprosy awa atae etesa awa gadera.”

### *IESU MI ISORO EMBOBO GITIJIGARI EWAMEI ISIRA*

<sup>5-6</sup> Edo Iesu Capernaum nati da toriri Rome isoro embobo ajigari 100 awodo gitijigedo isira embo da amimi Iesu tambudo umo kondade arase benunu sisira, “Bajari naso buro ari embo da awa karu edo memesi burise besi da pasido atira.”

<sup>7</sup> Setiri edo Iesu mi mina uso yei sisira, “Iso buro ari embo da yei amboda mambudo ano jebugadira.”

<sup>8</sup> Setiri Rome isoro embobo da gitijigari mi Iesu da yei mina sisira, “Na ewa raro naso mando da toresi ta ko ge mi segae naso buro ari embo awa ewamei are ko na gosena awodo re adira ainda be awa na awa gitijigari nembodiba da tuda edo isoro embobo nenei awa naso simba ari da atima era. Edo nanemi isoro embo da ainda sadena mambu sadena awa umo mambadira. <sup>9</sup> Edo nei da sadena po sadena awa umo puradira. Edo naso buro ari embo da sadena eiawa e sadena awa umo adira.”

<sup>10</sup> Edo embo awa awodo setiri Iesu ge awa ingido kove be edo embo umo ambo ambo isera ainda sisira, “Na ingoda yei gebe sena na Israel embo da mi embo emimi na gebe ira da awodo awa gae be ra giwo. <sup>11</sup> Edo na ro sena awa ruvegeove. Embo jiwae busu berari dodo bugadera amimi Mamo mi gitijigadira yei ainda dada adera. Edo anumbedo Abraham de Isaac de edo Jacob deda indido kumbudo ise atadera. <sup>12</sup> Edo Mamo mi yei eiawa Jew embomei embo sia ira te Mamo mi Jew embomei jiwae awa budo wawara ari ponda yei umenga da atadera. Edo ungo ainda mambudo di vegise de edo ji de daedo atadera.”

<sup>13</sup> Edo Iesu ge awawa sedo atae edo Iesu mi Rome isoro embo da gitijigari da yei sisira, “Imo ro gebe esa awa nanemi ano be bugadira.” Edo Iesu ge awodo sisira iji da ainde Rome isoro embobo da gitijigari embo da buro ari embo awa ewamei isira.

#### *IESU MI EMBOMEI JIWAE EWAMEI ISERA*

<sup>14</sup> Edo Iesu Peter da mando da mambudo Peter da umboti awa karu yauya budo besi da pasido atiri gosisira.

<sup>15</sup> Edo Iesu mi etetu ainda ingo awa jigiri uso yauya atae isira. Etiri Peter da umboti ewamei edo erido indari sia edo Iesu da yei ititisira.

<sup>16</sup> Edo ongobo etiri embo mi embo asisi bebegae mi sandari awa budo Iesu da yei bugusera. Bugero Iesu asisi bebegae da yei ge setiri edo asisi bebegae embo awa doturiser. Edo Iesu karu embomei ainda bugusera awa daedo etiri jebuguriser. <sup>17</sup> Edo Iesu awodo isira amimi ro Mamo da binga itari embo Isaiah mi sisira awa be isira. Isaiah mi sisira,

“Unemi ingodena ro etiri goroba ae etera awa soregedo edo ingodenaso karu amburo awa etiri ewamei etera.”

#### *AGODARI DA ATOPATARI EMBO AWA*

<sup>18</sup> Edo Iesu embo jiwae mi umo jinene burero gido uso ambojimbibi da yei sisira, “Nga sia ewo. Awo ingodena umo diuga benei da sembo.” <sup>19</sup> Siri iji ainde agodari da atopatari awa Iesu da yei bugusira. Bugudo sisira, “Atopatari imo yei rawainda yadesa awa na da aindi yadi sia etena.”

<sup>20</sup> Setiri Iesu mi uso yei mina sisira, “Ambe wo awa uso ngaja ewari yei atira edo daedo ri memei awa ungodana ngaja atira awarate na Mamo da mei busu da bugudo embo isena naso ewari yei atae ra.”

<sup>21</sup> Edo Iesu awodo siri embo nei ge ingido isira amimi Iesu da yei sisira, “Embo nembodiba na naso mama betari govedo aindi amboda awa na imo ambo ambo adena.”

<sup>22</sup> Setiri Iesu mi sisira, “Embo ave Mamo gae awa aindi dodo imo puio na ambo ambo ase.”

#### *IESU SETIRI BISARA JAMO JAMO ETIRA*

<sup>23</sup> Edo Iesu ge awa sedo Iesu nga da vivitisira uso ambojimbibi de edo yei awa dodo mambusera. <sup>24</sup> Edo kiambu yise Iesu pasido nga joda ewo isira. Edo Iesu ewo iri ga de bisi bisara de edo umo diuga awa teta ewa yawata ise arago edo sasaka nga joda vivitisira. Edo nga awa kununu badi isira. <sup>25</sup> Awodo iri Iesu da ambojimbibi mi Iesu da yei mambudo Iesu ewo wujido sisira, “Gitijigari nango betadi aikambu era mo goesita nango kondade egae.”

<sup>26</sup> Setero Iesu mi mina sisira, “Ingo na gebe edo gogo ae edo ewa awasedo ingo oju mi biae etewa.” Sedo Iesu erido bisara de kau yawata de aindi yei ge setiri bisara jamo jamo etiri sasaka ewamei isira.

<sup>27</sup> Etiri ambojimbibi wasiri awa gido kove be edo sisira, “Embo eiawa averi? Bisara de kau yawata de umo kera etera.”

#### *IESU MI ASISI BEBEGAE ONDIRI MAMBUSERA*



<sup>28</sup> Edo umo diuga awa sembudo Iesu Gadarene embo atima isera busu ainda bugusira. Ainda awa embo etoto meko to da embo govedo isera ainda atima isera. Edo embo etoto ainda atero asisi bebegae ungoda joda atima isera amimi eoro embomei eiawa tini gambari ise dombu gunjoro gido embo emboro awodo yari awa oju edo isera. <sup>29</sup> Edo ungoi Iesu gido Iesu da yei gogo dimbudo sisera, “Mamo da mei imo nangoda yei ro adi dipapa edo bugesi? Nangoda kasari iji awa bugae awasedo nangoda riroga itose.”

<sup>30-31</sup> Edo ungoi awa sero pu diti da ainda demonda durise atisera awasedo asisi bebegae embo etoto da joda amimi Iesu da yei benunu sisera, “Imo nango ondadi adesa re nango itio mambudo pu da joda torore.”

<sup>32</sup> Setero Iesu mi ungodu yei da sisira, “Mambuwo.” Setiri embo etoto awa dodo ungoi pu da joda totorisera. Etero pu mane mi sumbudo yei diwari awa dodo kekepunya edo umo da wosedo bebetegurisera.

<sup>33</sup> Edo pu simba ari embo sumbudo nati da mambudo embo etoto Iesu mi asisi bebegae etiri ewamei isera awa sisera. <sup>34</sup> Edo nati da embo berari mambudo Iesu tambudo gido ungodu yei awa dodo mambarase sisera.

## 9

### *IESU EMBO TEI INGO AMBARI ETIRI EWAMEI ISIRA*

<sup>1</sup> Edo Iesu nga da vitido umo diuga da awodo sembudo sekago uso nati be da bugusira. <sup>2</sup> Edo Iesu ainda bugiri embo mi embo tei ingo ambari awa apara da edo budo Iesu da yei bugusera. Etero Iesu ungo gebe era awa gido edo embo daguna da yei sisira, “Naso mei iso buria awa kotembedo doturena awasedo dubo ewamei eio.”

<sup>3</sup> Edo agodari da atopatari nenei mi ungo ungosuka ge mina sara edo sisira, “Embo emimi sira ro Mamo mi edo

ira awa umo daedo adira sira. Edo umo ge awodo sira awa umo Mamo da yei da ge biae sira.”

<sup>4</sup> Awarate Iesu umo ungo ge ro kotera awa gido edo ungodu yei sisira, “Ingo ro awasedo kotari biae kotevi? <sup>5</sup> Edo na ro seni? Na eiedo senita erido pepeta eio senita ko eiedo seni nanemi iso buria kotembedo doadena seni? Edo ge etoto einda ge rawa ge okain ri? <sup>6</sup> Na busu da atena ainde awa Mamo mi naso yei embo da buria kotembedo doanase goroba ari itisira. Edo boroko nanemi buro nembodiba awa ano ingo mi eiawa gadewa.” Edo Iesu ge awa sedo edo embo ingo tei ambari da yei sisira, “Erido iso ewari besi budo edo iso nati da mambuio.” <sup>7</sup> Setiri embo awawa erido uso nati da mambusira. <sup>8</sup> Edo embo awa mambiri embo mi wasiri awa gido oju mi biae isera te ko Mamo jasiga isera unemi embo da yei goroba ari itira awasedo.

#### *MATTHEW IESU AMBO AMBO ISIRA*

<sup>9</sup> Edo Iesu yei awa dodo mambuse Iesu tax bari embo jawo Matthew awa gosisira. Edo Matthew uso tax bari yei da anumbedo atiri edo Iesu mi uso yei da sisira, “Na ambo ambo eio.” Setiri Matthew erido Iesu ambo ambo isira.

<sup>10</sup> Edo Iesu uso ambojimbi de mando da indari indero tax bari embomei nei de embo bebegae de bugudo ungodu demondu anumburiseru. <sup>11</sup> Edo ungo anumbetero edo Pharisee embomei nei mi ungo gido edo Iesu da ambojimbi da yei sisira, “Ro awasedo ingodu atopatari embo bebegae de tax bari embo de da indari indiri?”

<sup>12</sup> Setero Iesu ingidu ungodu yei sisira, “Karu ari jebugari embo awa embo karu ae ainde yei manamambadira te umo embo karu de ainde yei mambadira. Edo da awodo na awa embo ewagaewa awa embo bugae rate na embo bebegae awa embo bugusena. <sup>13</sup> Jiwari ewamei be da sisira awa ingiwo, ‘Na wo mi rorou itawase awa dipapa aera

te ingo mi embo nenei dubo bawase dipapa ena.’ Awara mambuwo ge ainda be rori awa eura ave.”

*JOHN DA AMBOJIMBI IESU DA YEI SEDO GARI ITITISIRA*

<sup>14</sup> Edo John da ambojimbi mi Iesu da yei bugudo sisera, “Nango de Pharisee embomei deda wasiri awa nango iji dada neta kakana edo era. Edo ro awasedo iso ambojimbi wasiri da eiawa ambo ambo ae edo eri?”

<sup>15</sup> Edo ungo awodo setero Iesu mi mina sisira, “Edo jimbari iu seka awa jimbari da bondo da atadira mo esega embo mo dubo vevera erita? Awodo aera ungo awa dubo vevera adi aera. Edo na awa teta jimbari iu seka inge. Edo iji tupo na budo mambadera ainde awa naso ambojimbi awa dubo vevera ise neta kakana adera.

<sup>16</sup> “Naso atopatari awa seka. Edo na ingoda yei kiki etoto sano ingido edo ingo eiawa gadewa. Embo amemi mana bo matu da to awa bo seka mi mana tauta adira. Awodo adira awa bo seka mi bo matu awa budo isisibari keradira segadi adira iji ainde. Edo keradira ainde awa to nembodiba be adira.

<sup>17</sup> Edo embo amemi mana umo seka jawo wine awa utingi wo ando mi ari matu da mana itadira ko wo ando matu awa mana jitugadira awasedo umo wine awa porokukusedo sauma utingi wo ando matu mi ari awa bejadira. Edo awodo adira umo wine awa yoyogo edo busu da wosadira. Awodo aera embo mi awodo ae edo era te umo wine seka awa utingi wo ando mi ari seka da itido era awa etoto awa ewamei atima era. Da awodo naso atopatari seka de ingoda wasiri matu de awa ingo mi mana dada adewa.”

*IESU WASIRI EWAGAWEA JIWAE ISIRA*

<sup>18</sup> Edo Iesu ge awa ungodu yei sise atiri Jew embo da gitijigari nei mi bugudo Iesu da joda baingo dederi edo sisira, “Naso gagara ademei boroko betetira te pogae iso

ingo mi uso tamo da itaso gagara ewamei edo atare.”  
<sup>19</sup> Setiri gido Iesu erido edo uso ambojimbi deda gitijigari awa ambo ambo isera.

<sup>20-21</sup> Edo ungo mambutero evetu karu orobi budo ororo wowoseuri atise gaeko 12 atae isira amimi kotisira, “Na uso ombari begiti da jigadena awa na ewamei adena.” Awa kotedo evetu awawa gunda bugudo Iesu da gara begiti da jijigurisira.

<sup>22</sup> Edo evetu awodo etiri Iesu wareregedo evetu awa gido uso yei sisira, “Naso gagara goroba eio. Imo na gebe etesa amimi imo ewamei etesa.” Edo Iesu awodo setiri iji ainde evetu awa ewamei isira.

<sup>23</sup> Edo Iesu gitijigari da oro da bugudo joda totorisira. Edo Iesu joda torido embomei mi gauro pusero edo betari embomei awa embo jibia ero gosisira. <sup>24</sup> Edo Iesu mi ungodu yei sisira, “Ingo berari dodo mambuwo. Edo gagara ademei eiawa betae ra te ewo ira.” Edo Iesu awodo setiri ungoi berari iro jirisira. <sup>25</sup> Edo Iesu embo berari setiri ponda ijegetero Iesu gagara da diumba da torido gagara awa ingoda jigiri gagara awa eririsira. <sup>26</sup> Etiri ge eiawa yei berari da rawusira.

<sup>27</sup> Edo Iesu yei awa dodo mambutiri embo diti guba egeregari etoto mi umo ambo ambo ise Iesu da yei sisera, “David da orobe nango jo egae.”

<sup>28</sup> Edo Iesu uso mando joda toriri embo diti guba egeregari awa daedo totorisera. Etero Iesu mi ungodu yei nganega isira, “Ingo nanemi ingo kondade adena awa gebe evita?”

Setiri ungoi Iesu da yei mina sisera, “Embo nembodiba nango gebe era.”

<sup>29</sup> Setero Iesu mi ungodu diti awa jigido ungodu yei sisira, “Ingo ro gebe ewa awa awodo are.” <sup>30</sup> Edo Iesu awodo setiri ungodu diti ewamei etiri ungoi yei gosisera.

Etero Iesu mi ungoda yei ge tini javi de sisira, “Eiawa sawo embo nenei mi geore.” <sup>31</sup> Awarate Iesu ge awodo setiri ungo mando awa dodo yei berari da mambudo embo jiwae be setero gosisera.

<sup>32</sup> Edo embomei mando awa doturero embo nenei mi embo asisi biae mi joda aturi ge sae edo isira awa budo Iesu da yei bugusera. <sup>33</sup> Etero Iesu mi asisi biae awa budo pigetiri ijegetiri embo awa ge sadi tuturo isira. Etiri embo berari mi awa gido kove be isera edo sisera, “Nango Israel embomei wasiri eiedo irirae nango matu gae.”

<sup>34</sup> Awarate Pharisee embo mi sisera, “Amone asisi bebegae da bajari mi Iesu da yei asisi bebegae ondarase goroba itiri gido awodo re ira.”

### *IESU MI EMBOMEI AWA EMBO JO ISIRA*

<sup>35</sup> Awodo atae edo Iesu pepeta edo nati berari awa esega isira. Ise Jew embomei da dada ari mando mando da embo atopapotisira. Edo embo atopapotise binga ewamei Mamo mi embo gitijigadira iji awa sisira. Edo daedo Iesu embo jiwae karu amburo neinde kainde dubo vevera edo isera awa euri ewamei edo isera. <sup>36</sup> Edo Iesu embo eiawa gido ungo jo isira ko ungo bouga be burera awa ungo ro adera awa ungo gae. Edo embo amenda soro ungo kondade aderi awawa ungo awa teta wo jawo sheep mi wo simba ari embo ae gido tepo tapo tembuma era da awodo gosisira.

<sup>37</sup> Awasedo Iesu mi uso ambojimbi da yei sisira, “Indari be jiwae edo sia etira embo mi dada orase awarate indari dada ari embomei awa enumba ae mi dada edo era. <sup>38</sup> Awasedo busu da indari erido ira ainda topo da sewo, “Buro ari embomei jiwae itaso mambudo indari awa dada ore.”

## 10

*IESU AMBOJIMBI 12 JAWO SISIRA*

<sup>1</sup> Edo Iesu uso ambojimbi 12 setiri uso yei dada isera. Edo ungo dada etero Iesu ungodu yei asisi bebegae ta ko karu neinde kainde ari jebugari da goroba awa ititisira.

<sup>2-3</sup> Edo eiawa Iesu da ambojimbi 12 Iesu mi itiri mambusera awa Simon uso jawo nei Peter de uso namendi Andrew de edo James de uso namendi John Zebedee da memei de edo Philip de Bartholomew de Thomas de Matthew tax bari embo de edo James Alphaeus da mei de Thaddaeus de edo Cana embo Simon de daedo. <sup>4</sup> Edo Judas Iscariot umu Iesu Jew embomei da gitijigari da yei indiga sisira ainde.

*IESU AMBOJIMBI ITIRI MAMBUSERA*

<sup>5</sup> Edo Iesu embomei 12 eiawa itiri mambusera te giti awa Iesu ungo atopapotisira. Edo ungo atopapotise Iesu mi sisira, “Embo Jew ae jawo Gentiles ainde yei da mambove edo daedo Samaria busu ainde nati memeia da mambove. <sup>6</sup> Awarate Jew embomei awa teta wo jawo sheep inge edo jiwae jajovegari awasedo ungodu yei da mambuwo. <sup>7</sup> Mambudo ungodu yei save iji Mamo mi gitijigadira awa asusubetira sewo. <sup>8</sup> Edo karu embo ewo jebubugore. Betari embo awa jigiwo erore. Edo karu jawo leprosy awa ewo ewamei ore edo asisi bebegae awa ondewo ijegore. Na ingoda yei ro itena awa ingo mina itae awasedo ingo daedo itido edo mina bari dipapa eove. <sup>9-10</sup> Ungoi buro embomei awa indari de rora nenei de ungo dipapa era awa itadera awasedo ingoda rora da mana gano awa badewa. Edo daedo ingoda sapoia ta bo nei ta tei goru ta ko ketu awa mana badewa.

<sup>11</sup> “Edo ingo nati nei da mambudo embo ingo gadi dipapa ira awa tambudo edo embo ainga atiwo. Edo ingoda buro atae ari gido awa mando awa dodo mambuwo. <sup>12</sup> Edo

ingo mambudo mando da vivitise gido re jao namendi ari atega awodo ewo. <sup>13</sup> Awarate embo mando ainda mi imo atega adira awa mando ainda anumbedo daga kiki dirio. Awarate ungoi imo atega ae adera awa ainda atise ungodada yei ewamei eose. Edo embomei awa dowo.

<sup>14</sup> “Embo amemi ingo atega ae ise ingoda ge ingae adera awa yei awa doturise yei ainda konipo ingoda tei da awa dede ewo wosare. <sup>15</sup> Edo na ingoda yei sena Mamo da kasari iji bugadira. Iji awa bugadira iji ainde awa Mamo mi Sodom embo bebegae de edo Gomorrah embo bebegae de da yei riroga nembodiba itadira awarate nati awa embomei ingo atega ae etera ainda yei awa riroga nembodiba be nembodiba itadira.

#### *DARI GAIARI AWA BUGADERA*

<sup>16</sup> “Dengoro edo naso ge ingido gogowo ewo. Teta maine sino mi wo jawo sheep gambarago adera giwo na ingo iteno mambadewa iji ainde naso gitopo mi ingo gambadera awasedo jiro gari embo edo saboa ewo teta ri ribo inge ewo. <sup>17</sup> Edo sia ise tembuwo embo mi ingo bundedo budo Jew embomei da dada ari oro da mambadera. Mambudo ainda ungoi ingo kasedo edo ingo vejadera. <sup>18</sup> Edo embo mi daedo budo gitijigari kiambu da edo gitijigari nembodiba da yei mamboro ingo na ambo ambo edo ewa awasedo kasadera. Edo nanemi doano eiawa adera ainde ingo mi binga ewamei awa gitijijigegari embomei ainde edo daedo embo Jew ae ainda yei sadewa. <sup>19</sup> Edo ingo budo gitijijigegari da yei mamboro gido ae ro seni edo rawodo seni awa kotove awarate iji awa bugadira ainde awa nanemi ro sadewa awa sano sadewa. <sup>20</sup> Edo ge ro ingo mi sadewa awa ingoda ge aera ainda be awa Mamo da asisi mi ingoda joda atise ge amone sadira.

<sup>21</sup> “Edo iji ainde awa namendi mi namendi embo nenei mi doro betarase itadira. Edo da awodo mamono mi

kinapeina awa indiga sadera edo daedo kinapeina mi ai mamono awa embo nenei mi doro betorase indiga sadera. <sup>22</sup> Embo jiwae mi ingo ujo ae adera ko ingo awa naso topo awasedo. Awarate iji sangove be da awa embo amemi goroba edo atadira awa Mamo mi soregadira. <sup>23</sup> Edo ingo nati nei da dedo gaedo oro gido oju nati nei da mambuwo. Edo iji ainde na bugadena ainde awa ingo nati berari ainda esega ae atirowo bugadena.

<sup>24</sup> “Edo gari gadira embo awa kiambu rate umo atopapotira awa nembodiba ra. Edo buro ari embo awa kiambu rate bajari awa nembodiba ra. <sup>25</sup> Awasedo gari gadira embo ainde buro ira embo ainde awa teta atopatari inge edo bajari inge adera awa dowo inono be ore. Na awa orobe da gitijigari edo ungoi na awa Beelzelbul Satan da jawo nei awa sadera awa ungoi daedo ingoda jawo biae sadera.

### *OJU EOVE*

<sup>26</sup> “Edo wasiri embo mi ro unjugurera awa nanemi isaga adena edo embo da koma ge awa nanemi isaga adena awasedo embo oju eove. <sup>27</sup> Ro na ingoda yei umenga da sena awa ingo mi isaga da sadewa. Edo ro na ingoda yei gae sena awa ingo mi embo dada edo era ainda sadewa. <sup>28</sup> Edo embo deoro betedo era awa oju eove. Embo emimi tamo awa deoro betedo era te ungo mi mana embo da asisi awa mana doro betadira. Edo Mamo mi riawo mata awa ewuse atari ititisira ainda awa embo da tamo de asisi de awa dari betadera awasedo Mamo oju ewo. <sup>29</sup> Edo ingo mi ri memei etoto awa mina kiambu itido badewa te ri mei awa mana tepo busu da wosadira. Edo ri mei da awa busu da duradira awa iso Imamo awa gosisira. <sup>30</sup> Da awodo Mamo awa iji berari awa imo awa ruvegae iso kopiri tu roinge ri awa gosira. <sup>31</sup> Teta Mamo mi ri memeia simba ira da awodo ingo awa simba ira awasedo oju eove.



*EMBO NENEI SEWO GORE INGO AWA IESU DA TOPO RA*

<sup>32</sup> “Embo amemi arapa da umo na gari sadira awa na utu da atise na naso Mama da yei embo awa na gari sadena.

<sup>33</sup> Awarate embo amemi arapa da umo na gae sadira awa na utu da atise naso Mama da yei na embo awa na gae sadena.

*IESU MI ETIRI EMBO KAUSU KAUSU ISIRA*

<sup>34</sup> “Ingo ro kotevi? Ingo kotewa naso bugari mi ari embo dubo jamo de ateri ta? Ingo awa kotevita? <sup>35</sup> Awarate awodo kotove naso bugari mi ari embomei dubo jamo de atadi ari awa kotove ta embo ewoga ewoga adera. Embo nenei awa na gebe adera te embo nenei awa na gebe adi aera awawa eiedo adira. Memei de mamono de awa kausu kausu adera. Ai de meigagara de kausu kausu adera. Umboti de mei aro de kausu kausu adera. <sup>36</sup> Edo wasiri eiedo bugadira ainde awa embo uso gitopo awa topo adira.

<sup>37</sup> “Embo ave uso ai de mamono de dubo nembodiba burise na dubo bae sumbae ira edo na edo gogo edo sapo ae ira. Daedo embo ave uso mei ta gagara awa dubo burise na dubo bae sumbae ira awa naso ambojimbibi be aera.

<sup>38</sup> Embo amemi uso orega budo edo na pepeta ena emboro da ainda pepeta ae adira embo awa naso buro ari embo be aera. <sup>39</sup> Embo ave wasiri de atadi dipapa adira awa betadira awarate embo ave na awa embo betadira awa wasiri natopo atari badira.

*RIROGA AWA*

<sup>40</sup> “Embo ave ingo atega adira awa na atega adira. Edo embo ave na atega adira awa Mamo na itiri bugusena awa atega adira. <sup>41</sup> Embo ave Mamo da binga sari embo atega adira ko Mamo mi umo itiri bugira awasedo umone daedo awa binga sari embo da riroga awa umo daedo badira. Embo ave embo ewamei awa atega adira awa embo ewamei da riroga awa daedo badira. <sup>42</sup> Edo embo ave

sasaka jamo naso ambojimbi dubo gagara ira ainda itadira awa umo embo kiambu rate embo ainda Mamo mi mina itadira.”

## 11

### *JOHN DA AMBOJIMBI IESU ESEGA ISERA*

<sup>1</sup> Edo Iesu uso ambojimbi 12 awa atopatido atae etiri edo yei awa dodo nati demonda ainda mambudo embo ainda awa atopapotisira.

<sup>2</sup> John awa bundari oro da atise Keriso da buro da binga awa ingisira awasedo John uso ambojimbi nenei itiri Iesu da yei bugusera. <sup>3</sup> Edo ungoi Iesu da yei bugudo Iesu da yei nganega isera, “Imo mo embo John mi bugarase sevira awa tamo ko nango mo embo nei simba eri?”

<sup>4-5</sup> Setero Iesu mi mina sisira, “Engenembedo John da yei mambudo ingo ro ingewa edo gosewa awa John sewo gare edo sewo embo dombu guba ari yei gosera edo tei bebegae ari ewamei era edo karu jawo leprosy bari awa ewamei era edo dengoro junjugari ge ingera edo bebetegari sekago ererera edo rora ae embobo awa binga ewamei ingera. <sup>6</sup> Edo John da embo amende naso yei na nganega aera te na gebe era embo awa dubo ewamei adira awa sewo gare.”

<sup>7</sup> Edo John da ambojimbi engenemburero Iesu mi embo da yei John da jawo da ge sisira, “Iji da ainde ingo yei ro atae da John gadi mambusewa ingo ro gadi kotise mambusevi? Ingo embo teta openga bisara mi piguri mambudo bugudo ise atima ira da awodo gadi mambusevita? <sup>8</sup> Ta ingo embo rora embo ombari digari ewagaewa de awa gadi mambusevi? Embo ombari digari ewagaewa de awodo re gitijigari da mando da gitijigari mi atarago adera. <sup>9</sup> Awodo aera ingo embo awodo awa gadi mambae

rate ingo re Mamo da binga sari embo awa gadi mam-busewa. Edo John awa binga sari embo nenei derigadira. <sup>10</sup> John awa Mamo mi ove jiwari da sisira embo awa sisira, ‘Eiawa naso binga sari embo nanemi giti itano mambudo iso emboro ewamei adira.’

<sup>11</sup> “Edo emboevetu mi kinapeina budo era ainda teda John awa nembodiba be awarate John awa embomei Mamo mi gitijigido ira ainda atima era ainde inono ae. Embomei awa nembogambo ra te John awa nembodiba ae. <sup>12</sup> Edo John atopatadi tuturo isira ainda edo bugudo boroko awa embo jiwae be jo de berari simba ewora Mamo gitijigido ira amimi ungo ewamei arase. Awodo ise awa ungo goroba berari oro Mamo mi ungo ewamei arase edo era. <sup>13</sup> Binga sari embo berari de Moses da agodari de berari awa John bugae atiri awa sisera Mamo gitijigido ira amimi ari eiedo awa adira awa sedo isera. <sup>14</sup> Edo binga sari embo mi sedo era Elijah binga sari embo awa bugadira sedo era awasedo ingo ro binga sari embo mi sewora awa gebe adewa awa ingo mi gadewa John awa binga sari embo umo awa Elijah inge. <sup>15</sup> Ingo embo berari ro nanemi sena awa kotedo gogowo ewo.”

<sup>16</sup> Edo Iesu mi sisira, “Embo boroko atera awa embo gari rawodo ri? <sup>17</sup> Ungo awa teta kinapeina memeiako mi nati da usini ise mina sara arago edo era, ‘Nango jimbari da usini etera te ingo ya diwae awasedo nango betari da usini etera te ingo ji sae awasedo usini ingode ro eri awawa ingo dubo ewamei ae? <sup>18</sup> Awodo edo John bugusira iji ainde John neta edo umo wine indae edo isira awasedo embo berari mi sedo isera asisi biae uso joda atima ira sedo isera. <sup>19</sup> Edo na Mamo da mei awa embo isena awa bugudo indido kumbudo eono embo berari mi sedo isera embo oiawa giwo. Embo omone rora jiwae indise edo umo wine jiwae indido ira edo tax bari embo de embo bebegae nenei de da

otao edo ira sedo isera. Awarate imo ro esa awa embo mi gido awa imo jiro gari embo ta ko jiro gari embo ae ri awa gadera.”

*EMBO GEBE AE EDO ISERA*

<sup>20</sup> Edo embo nati nenei da Iesu mi uso wasiri jiwae ewamei uso goroba mi edo isira awa ungodu wasiri bebegae awa dodo Mamo da yei wareregae edo isera. <sup>21</sup> Awasedo Iesu mi embomei ainda yei tini gambari edo sisira, “Ingo Chorazin de Bethsaida embomei de gido gogowo ewo. Ingo naso goroba mi wasiri ewamei etena awa getewa awarate Tyre embomei de Sidon embomei bebegae de matu awa wasiri goroba de eiawa gae etera awa ungo ungodu wasiri bebegae awa dodo Mamo da yei wareregae eterita rora. Edo bo matu ewudo digido edo aviga budo beo da gutoro embo mi ungodu Mamo da yei wareregari awa gae etera. <sup>22</sup> Edo Mamo da kasari iji puradira ainde awa Mamo mi Tyre de Sidon embomei awa nembodiba kasadira te ingo Chorazin de Bethsaida embomei de awa kiambu ae kasadira.” <sup>23</sup> Edo Iesu mi Capernaum embomei da yei daedo sisira, “Ingo kotewa ingo mi utu da vitadewa ainda be awa naso ewamei ari jiwae ingoda yei bugudo ira awasedo awarate ingo awa riawo mata awa ewuse atira ainda wosadewa. Ingo getewa ingoda nati da wasiri goroba de etena awa awarate Sodom embomei mi wasiri eiawa gae etera awa ungodu nati awa boroko atae etira. <sup>24</sup> Kotewo Mamo da kasari iji bugadira ainde Mamo mi ingo awa nembodiba be kiambu ae kasise edo Sodom embomei awa kasari awa nembodiba itadira.

*IESU INGODENASO BOUGA BURISIRA*

<sup>25-26</sup> Iji ainde Iesu mi sisira, “Mamo imo busu de utu de gitijigido esa imo ro gari embomei da itae doturisesa awa kinapeina da yei ititisesa ko emboro awodo arase imo dipapa isesa awasedo.”

<sup>27</sup> Edo sekago Iesu uso ambojimbi da yei sisira, “Naso Mama mi rora berari awa naso ingo da itido nanemi simba anase sisira. Edo embo mi na awa gido gogo ae awarate naso Mama na awa gosira. Embo mi Mamo awa gido gogowo ae awarate embo amemi Mamo awa embomei ounda yei isaga arase dipapa ena ungo awa Mamo awa gosera.

<sup>28</sup> “Edo embo amemi bouga burise begogo adera embo awa naso yei puwo nanemi ano jango indave. Edo ingoda buro nangae otao ise ewo. <sup>29</sup> Edo ingo awodo irirowo awa nanemi ingo atopatane ainda be awa na awa jo sasainbari de ra. Edo nanemi sedo gano ingo buro ari katogo ae awa mana adewa. <sup>30</sup> Edo na buro ro ingoda yei itena awa ingo nangae otao edo buro ise awa dubo jamo de edo atadewa.”

## 12

### *PHARISEE EMBOMEI MI IESU DA SEDO GARI ITISERA*

<sup>1</sup> Edo iji tupo Jew embomei da tumondebain ari iji de Iesu uso ambojimbi de wheat buro da awodo pepeta ero Iesu da ambojimbi beji mi bebegae edo gido pisa nenei awa gavedo kandedo indisera. <sup>2</sup> Ero Pharisee embomei mi gido Iesu da yei sisera, “Gio nangoda agodari mi sira tumondebain ari iji de buro eose sira edo ro awasedo iso ambojimbi eiedo eri?”

<sup>3</sup> Setero Iesu mi mina sisira, “Ingo kiki gitijigari David da awa ajigedo gae ta iji ainde umo uso embomei de beji eteri? <sup>4</sup> Edo umo Mamo da tumondebain ari oro da torido edo Mamo da buro ari embo mi indari ambe awa itiri uso embomei deda indisera. Edo ambe amone Mamo da yei kando ititiserawo edo Mamo da agodari mi sira awa Jew embomei da priest ungo ungosuka indari ambe awa indadera te embo nenei mi mana indadera. <sup>5</sup> Edo ingo Moses da agodari ainda sira awa Mamo da buro ari embo awa tumondebain ari iji de buro edo era awa ajigedo

gae ta? Edo buro eiedo ise amimi ungo agodari awa diugae. <sup>6</sup>Edo na ingoda yei sena na awa teda ingoda embo nembodiba awarate tumondebain ari oro awa nembodiba aera. <sup>7</sup>Mamo jiwari ewamei be da sira, ‘Na wo mi rorou itawase awa dipapa ae awarate na dipapa ena awa ingo embo nenei dubo bawase.’ Edo ingo ge eiawa rori ainda be awa gadewa awa ingo mana embo nenei buria ae ingo mana dawo betadewa. <sup>8</sup>Na Mamo da mei embo isena awa daedo tumondebain ari iji awa gitijigido ena.”

*EMBO DA INGO AMBARI DE AWA EWAMEI ISIRA*

<sup>9</sup>Edo Iesu Jew embomei da dada ari oro da mambudo embo da ingo ambari awa gosisira. <sup>10</sup>Edo embo nenei mi Iesu bekuba adi dipapa edo gido Iesu da yei nganega isera, “Ingodenaso agodari mi sari tumondebain ari iji de embo oro ewamei eita?”

<sup>11</sup>Setero Iesu mi mina sisira, “Edo ingoda wo da awa tumondebain ari iji de kouro ngambari da durari mo jumbawo vitaetita? <sup>12</sup>Ingoda wo awa nembodiba awarate ingo awa nembodiba be ra. Awasedo ingodenaso agodari mi atopapotira awa tumondebain ari iji de embo nenei awa kondade adera.”

<sup>13</sup>Sedo Iesu mi embo ainda yei sisira, “Iso ingo awa besugeio.” Setiri embo awa uso ingo besugurisira. Etiri embo ainda ingo awa ingo be nei awodo ewamei isira.

<sup>14</sup>Etiri Pharisee embomei yei awa dodo mambudo Iesu doru betarase kiki dirisera.

*IESU AWA MAMO DA BURO ARI EMBO AWA*

<sup>15</sup>Edo Iesu ge awa ingido umo yei awa dodo mambusira. Mambutiri embo jiwae mi Iesu ambo ambo isera. Edo Iesu mi karu embobo berari awa etiri ewamei isera. <sup>16</sup>Etero embo nenei soro georase sisera. <sup>17</sup>Edo Iesu awodo isira awa ro Mamo mi binga sari embo Isaiah da yei matu sisira awa be isira. <sup>18</sup>Edo Mamo da ge awa binga sari embo Isaiah mi sisira,

“Naso buro ari embo awa giwo ave nanemi dubo budo ena edo daedo na umo awa embo na dubo ewamei edo ena. Edo buro ari embo eiawa na dipapa ena awasedo nanemi naso Asisi Ewamei uso yei itadena. Edo naso Asisi Ewamei uso yei itadena awa unemi naso wasiri ewamei awa embo Mamo da ge matu gae ainda yei karigadira. <sup>19</sup> Awarate ge sasainbedo sise tini gambari adi ae edo ge bagadi ae.

<sup>20</sup> “Edo embo ave goroba ae awa teta sasawa bainyedo atima ira da awodo. Edo naso buro ari embo awa mana sasawa bainyedo atira awa vejadira. Edo embo ave goroba ae awa teta goriwo da usasa ambadi aikambu edo ira awodo. Edo naso buro ari embo mi mana usasa awa ari atae adira te unemi mata buro ise atadira edo amboda ewamei mi derigari wasiri biae awa atae adira.

<sup>21</sup> “Edo embo neinde kainde mi naso buro ari embo da jawo awa ingido edo naso buro ari embo gebe adera.”

#### *IESU ASISI BEBEGAE AWA ONDETIRI IJEGURISERA*

<sup>22</sup> Edo embo nenei mi Iesu da yei embo diti guba ari edo ge sae awa budo bugusera ko asisi biae mi uso joda atima isira awasedo. Edo Iesu embo awa etiri ewamei edo sekago yei gosise edo ge sisira. <sup>23</sup> Etiri embo berari mi be gido jarisera edo sisera, “Embo emomo David da orobe ta?”

<sup>24</sup> Setero edo Pharisee mi ge awa ingido sisera, “Asisi biae da gitijigari jawo Beelzebul mi Iesu da yei goroba itiri asisi bebegae awa ondetiri mambera awarate embo nei mi goroba awa itae itaera.”

<sup>25</sup> Setero Iesu ungo ge ro kotera awa gido Pharisee embobo da yei sisira, “Embo busu da da amimi katabedo edo embogo adera amone borere ae atae adera. Edo daedo embo nati da da amimi katabedo embogo adera amone

borere ae atae adera. Edo daedo embo orobe nenei da da amimi katabedo edo embogo adera amone borere ae atae adera. <sup>26</sup> Edo da awodo Satan da ambojimbi asisi bebegae de embogo edo mina onda edo mambujegadera awa ungo ungosuka usibesi mina ara adera. <sup>27</sup> Edo ingo sewa na asisi bebegae ondeno ijegurera awa asisi bebegae da gitijigari jawo nei Beelzebul mi goroba itari ari ge sewa te na awodo ena awa ingoda ambojimbi da goroba mo amimi ititiri asisi bebegae onderi? Edo sewo ingoda ambojimbi mi naso yei ge ro sewa ainda mina awa soro gave. <sup>28</sup> Awarate Mamo da Asisi da goroba mi na asisi bebegae awa ondeno ijegurera gido re ingo gadewa Mamo awa ingoda joda matu buro tuturo etira.

<sup>29</sup> “Edo embo da mi embo goroba embo da ainda mando bejedo uso rora bengono adi ae etira awa rawodo ae etiri? Giti awa embo goroba embo awa bundedo awa uso mando bejedo torae etira.

<sup>30</sup> “Edo embo ave na kondade ae ira awa naso gitopo ra. Edo embo ave nangae dada ae ira amimi iri embomei ewoga ewoga era. <sup>31</sup> Edo na ingoda yei sena embo ave ge biae sise wasiri biae edo ira awa Mamo mi kotembedo doadira awarate embo amemi Asisi Kotopu da yei ge biae sadira awa Mamo mi mana embo awa kotembedo doadira. <sup>32</sup> Edo embo amemi na Mamo da mei bugudo embo isena naso yei biae sadira awa Mamo mi kotembedo doadira awarate embo amemi Asisi Kotopu da yei biae sadira awa Mamo mi mana embo awa kotembedo doadira. Edo embo amone da awodo mata atadira.

#### *RI DE USO BE DE AWA*

<sup>33</sup> “Edo imo ribe euri inda gido imo ri awa ro ri awa gido esa. Edo ri ewamei awa ribe ewamei edo ira edo embo mi ri awa ewamei awa gadera. Edo ri biae awa ribe biae ari embo mi ri biae awa gadera. <sup>34</sup> Ingo embo



bebegae awa teta jingabu ingege. Ingo awa embo bebegae awasedo ingo ge ewamei sae edo ewa. Edo ingo ingoda joda ro kotewa da awa ingoda be mi sadewa. <sup>35</sup> Edo embo ewamei da kotari awa ewamei awasedo embo awa ge ewamei sadira awarate embo biae da kotari awa bebegae awasedo umo ge bebegae sadira.

<sup>36</sup> “Edo na ingoda yei sena iji ge kasari bugadira ainde ge bebegae sewowa awa Mamo da yei ingo mi edo gogo edo sawo gadira. <sup>37</sup> Edo ingo mi Mamo da yei edo gogo edo sawo Mamo mi ingoda yei sadira ingo buria etewa saride o ingo buria aera sadira.”

*EMBO NENEI MI IWATA GARI DIPAPA ISERA*

<sup>38</sup> Edo Iesu ge awa setiri agodari atopatari embo jawo Scribe de agodari da simba ari embo jawo Pharisee de mi Iesu da yei sisera, “Atopatari nango inemi kariwa da goroba de asase dipapa era.”

<sup>39</sup> Setero Iesu mi ungoda yei sisira, “Embo boroko atima era awa bebegae edo ungo Mamo awa gae. Edo ingo naso yei da iwata goroba de gari dipapa ewa te na mana adena. Ro Mamo mi binga sari embo Jonah da yei isira amone iwata goroba de ra. Edo na mana ingoda yei iwata nei itadena. <sup>40</sup> Edo Jonah iji tamonde edo tumba tamonde wo nembodiba da tini da atisira da awodo na Mamo da mei umo embo isira da awodo iji tamonde edo tumba tamonde busu da joda atadena. <sup>41</sup> Edo iji ge kasari iji de Nineveh nati embo mi erido oro ingo me gadewa ainda be awa Jonah ungoda yei mambudo ungo atopatetiri ungo ungoda wasiri bebegae dodo Mamo da yei wareregurisera. Edo na awa Jonah derigedo edo boroko ingoda teda derido atena. <sup>42</sup> Edo iji ge kasari iji de daedo busu Sheba da gitijigari evetu mi erido ari ingo me gadewa ainda be awa matu be matu evetu awa yei besaun be edo Solomon da uso jiro gari ge awa gadi bugusira. Edo Solomon

awa gitijigari nembodiba awarate gitijigari nembodiba be nembodiba awa boroko ingoda teda atira.”

#### *ASISI BIAE ENGENEMBURISIRA*

<sup>43</sup> Sedo Iesu sisira, “Asisi biae embo da jo dodo wosedo mambudo yei embo atae da tembuma jango indari yei eura edo yei da tambae edo umo umosuka sedo ira, ‘Embo dodo bugena awa naso mando ra awasedo na ainda sekago engenembadena.’ <sup>44</sup> Awasedo engenembedo mambudo mando ainda mambudo mando awa jo ewamei gadira. <sup>45</sup> Jo ewamei gido dodo wosedo ponda mambudo asisi biae mi asisi bebegae nenei 7 awodo budo mando ainda daga atorase bugadira. Edo asisi biae awa biae ra awarate asisi bebegae nenei 7 awa be bebegae be bebegae ra. Edo embo asisi biae uso joda atima isira awa giti da awa biae atima isira te boroko awa biae be biae atira. Emboro eiedo awa embo bebegae boroko atera ainda bugadira.”

#### *IESU DA OROBE BUGUSERA*

<sup>46</sup> Edo Iesu embo da yei ge sedo atae adi iri uso ai de nanonamendi de bugusera. Bugudo ponda derido embo da yei sisera, “Nango Iesu ga da ge sadi dipapa era.” <sup>47</sup> Setero embo da ainda atisira amimi Iesu da yei sisira, “Gi. Iso ai de nanonamendi de ponda derido ingae da ge sadi dipapa era.”

<sup>48</sup> Setiri Iesu mi mina sisira, “Naso aia de nanonamendi de mo averi?” <sup>49</sup> Sedo Iesu ingo mi uso ambojimbida yei ujiji ise sisira, “Giwo. Eiawa naso aia de nanonamendi de ra. <sup>50</sup> Embo ave ro naso Mamo utu da mi arase dipapa ira awodo ira awa naso namendi de naso ru de naso aia dera.”

## 13

#### *MAMO DA GE AWA TETA VE INGE RA*

<sup>1</sup> Iji ainde Iesu mando awa dodo umo diuga da bengi da mambudo anumbedo atopapotisira. <sup>2</sup> Edo Iesu ainda

anumbedo atiri embo jiwae be mi bugudo umo jinene burisera. Etero gido Iesu erido nga da vivitisira. Vitido Iesu anumbetiri embo umo diuga da bengi da derido atisera. <sup>3</sup> Edo embo ainda atero Iesu inia ge mi ungo atopapotisira.

Iesu embo da yei kiki eiawa sisira, “Embo da amimi uso buro da ve gowadi mambusira. <sup>4</sup> Edo embo awa uso buro joda tembuse ve budo yei berari da pigedo isira. Edo ve nenei awa emboro da dudurisera. Etero ri memei mi wosedo ve awa indisera. <sup>5</sup> Edo ve nenei awa busu ganuma de ainda dudurisera ko ainda awa busu awa kiambu awasedo ve awa burigi erisera ainda be awa busu awa kiambu awasedo. <sup>6</sup> Edo waiko vitido ve seka awa ewusira. Edo ve awa ambulira ainda be awa ve ainda besisi awa be wosae awasedo. <sup>7</sup> Edo ve nenei awa bebe soropuda dudurisera. Edo bebe erido nembodiba etiri ve seka awa uso teda awasedo erae sumbae isera. <sup>8</sup> Edo ve nenei awa busu ewamei da wowosisera edo ewamei be erisera. Edo ve ewamei eiawa erido ve nenei awa be 100 edo ve nenei awa be 60 edo nenei awa 30 awodo isera.” <sup>9</sup> Edo Iesu kiki eiawa atae edo ungodu yei sisira, “Ingo ingoda dengoro atira awasedo naso ge eiawa ingido gogo ewo.”

#### *RO AWASEDO IESU INIA GE MI SISIRI*

<sup>10</sup> Edo Iesu kiki awa sedo atae etiri uso ambojimbi mi bugudo uso yei nganega isera, “Imo embo da yei ge sise ro awasedo imo inia ge mi sedo esi?”

<sup>11</sup> Setero Iesu mi mina sisira, “Mamo mi iji nonde unemi gitijigadira awa ingoda yei tu ge awa isaga etira awarate ungodu yei tu ge awa isaga aera. <sup>12</sup> Embo ave uso jiro kotari nembodiba atirari gido re jiro kotari awa jingama ira Mamo mi uso yei jiro kotari nenei jiwae itadira. Edo embo awa jiro kotari embo are. Edo embo ave uso jiro kotari kiambu awa jingama ae edo ira awa Mamo mi embo

ainda jiro kotari kiambu awa badira. <sup>13</sup> Na embo da yei ge inia da mi sena ainda be awa,  
 ‘Ungoda diti awa pirigedo atira te ungo gae edo era edo ungodada dengoro awa pirigari rate ungo ingae edo era.’

<sup>14</sup> “Edo ge ro Mamo da binga sari embo Isaiah mi sisira awa be etira. Edo Isaiah mi sisira,  
 ‘Ingo ingido ingido ewa te ingo kotae. Ingo gido gido ewa te ingo gae.’

<sup>15</sup> Embomei ainda jiro awa okain edo ungodada dengoro mi ro ingae edo ungodada diti awa ewo ditivi ira. Awarate ungo ungodada diti mi gosise edo ungodada dengoro mi ingise edo ungodada jiro mi kotadera awa ungoi naso yei da wareregadera. Edo ungoi naso yei wareregoro awa nanemi ungo ano ewamei adera.’ ”

<sup>16</sup> Edo Iesu ge awa uso ambojimbi da yei sedo sisira, “Awarate ingo awa isaga gosewa edo ewamei ingewa awasedo ingo awa awara atima ewa. <sup>17</sup> Ko na ingoda yei gebe sena binga sari embo jiwae de embo ewagaewa jiwae de ingo mi ro gosewa awa gadi dipapa isera te ungoi gae. Edo ungoi ingo ro ingewa awa ingadi dipapa isera te ungoi ingae.”

#### *VE GOWARI EMBO AWA INIA GE DA BE*

<sup>18</sup> Iesu mi uso ambojimbi da yei sisira, “Ingido gogo ewo na inia da mi ve gowari embo da ge setena ainda be awa ujgedo sano gave. <sup>19</sup> Embo ave Mamo da gitijigari iji awa ingido edo be gae edo ira amone teta ve emboro da dudurisira awodo ra. Edo umo ge awa ingiri ainda amboda Satan mi bugudo uso joda ge awa sounbedo burisira. <sup>20</sup> Edo embo ave ge awa ingido edo iji da amimi budo dubo ewamei edo ira awa teta ve ganuma tamo da dudurisira da awodo. <sup>21</sup> Edo uso kotari awa teta besisi tutupo awodo. Edo umo ge ainda be awa edo gogo edo kotae edo ira

awasedo Mamo da ge awa sedo dari gaiari uso yei buguri umo burigi be Mamo da emboro awa dodo ira. <sup>22</sup> Edo embo ave Mamo da ge ingido ira te rora jiwae badi dipapa edo ira amone teta ve bebe da soropuda wosedo isira da awodo ko uso rora jiwae da dipapa edo ira edo wasiri einda dubo vevera amimi euri uso joda ge awa atae ambudo ira. <sup>23</sup> Edo embo ave Mamo da ge ingido edo gebe edo era amone teta ve yei busu ewamei da durido isira awodo ungoi ge awa atopapotise Mamo da buro edo era. Edo embo nenei Mamo da buro nembogambo edo era amimi embo 100 awodo kondade eoro Mamo gido era. Edo embo nenei Mamo da buro nei kiambu nembogambo edo era amimi kondade eoro embo 60 awodo Mamo gido era. Edo nenei awa buro kiambu Mamo awasedo eoro embo 30 awodo awa Mamo gido era.”

*PISA DE VIVE DE DA INIA GE AWA*

<sup>24</sup> Edo Iesu inia ge mi kiki nei sisira, “Mamo da gitijigari iji awa teta embo mi uso buro da pisa ve gowarago adira. <sup>25</sup> Edo ve govetiri tumba de embo berari evero gitopo embo mi bugudo pisa teda vive govedo edo umo mambusira. <sup>26</sup> Edo amboda pisa erido edo be adi tuturo isira. Edo vive awa teta pisa inge edo daedo eririsira. <sup>27</sup> “Edo embo ainda buro ari embo mi bugudo uso yei sisera, ‘Gitijigari imo iso buro da ve ewamei gowusesa. Edo ro awasedo vive eiawa daedo erereri?’

<sup>28</sup> “Setero embo mina sisira, ‘Gitopo mi eiedo etera.’

“Setiri buro embomei mi uso yei sedo gosisera, ‘Imo vive awa sokorase dipapa esi ta?’

<sup>29</sup> “Setero embo amimi mina sisira, “Awodo aera mana vive awa sokadewa ko awodo ise pisa nenei de daedo sokadewa awasedo dowo. <sup>30</sup> Pisa de vive de dada erore. Edo erido sari oro awawa nanemi buro ari embomei da yei sane giti awa vive awa sokedo dada digiwo edo riawo da

pigave. Edo ingo vive awa ri da pigedo awa pisa awa dada edo budo naso indari atari yei da itave.’”

*VE KIAMBU DA INIA GE AWA*

<sup>31</sup> Edo Iesu mi inia ge mi kiki nei ungodada yei sisira, “Mamo da gitijigari da iji amone teta ri ve jawo mustard inge awa embo mi uso buro da govedo era da awodo. <sup>32</sup> Edo ve eiawa ve nembogambo nenei awodo ae amone kiambu be rate ri awa erido ri nembodiba be nembodiba euri ri memei mi uso patu da ungodada ngaja itido era.”

*AMBE DA INIA GE AWA*

<sup>33</sup> Edo Iesu inia ge mi kiki nei ungodada yei sisira, “Mamo da gitijigari iji amone teta evetu mi ambe bajari siwo jawo yeast sedo era awa budo ambe de da jigido ira. Edo evetu awodo euri siwo yeast mi ambe awa euri bajido ingari katogo euri riawo da ingedo ira.”

*PISA DE VIVE DE DA INIA GE DA BE AWA*

<sup>34</sup> Edo Iesu inia ge mi embo ainda dada isera awa atopapotisira. Edo Iesu ungodada yei ge nei mi sae rate ungodada yei inia ge mi sedo isira. <sup>35</sup> Edo Iesu ge eiedo sedo isira amimi ro Mamo da binga sari embo mi sisira awa be edo isira. Edo binga sari embo mi sisira, “Na ungodada yei ge sadena awa inia da mi sadena. Edo tuturo da Mamo mi utu de busu de isira iji ainde edo bugudo boroko da einde da kotari embo nenei mi gae awa nanemi boroko ungodada yei isaga adena.”

<sup>36</sup> Edo Iesu nga dodo wosedo edo embo jiwae be awa dodo mando joda vivitisira. Etiri uso ambojimbimi mi uso yei da bugudo nganega isira edo sisira, “Inia da mi pisa de vive de da setesa ainda be awa ujuge gore.”

<sup>37</sup> Setero Iesu mi mina sisira, “Embo ve ewamei gowusira amone Mamo da mei mi busu da wosedo embo isira awa ra. <sup>38</sup> Edo buro amone busu eire. Edo ve ewamei amone Mamo da embomei Mamo ga da gitijigadera awa

ra. Edo vive amone Satan da embomei awa ra. <sup>39</sup> Edo gitopo mi vive gowusera amone Satan awa ra. Edo pisa sari ari iji amone busu eiawa atae adira iji awa ra. Edo buro ari embomei amone asisi ewagaewa awa ra.

<sup>40</sup> “Edo embo mi vive sokedo ri da pigoro evedo era da awodo awa iji amboda adira. <sup>41</sup> Edo ainde Mamo da mei busu da bugudo embo isira amimi uso asisi ewagaewa itari bugudo asisi ewagaewa amimi embo wasiri biae ise eoro embo nenei wasiri biae edo era embobo awa tambudo asisi ewagaewa mi embomei eiawa Mamo da embo Mamo gada gitijigadera ainda teda budo pigoro riawo matawa atari da ewadera. <sup>42</sup> Edo embo bebegae eiawa riawo matawa atari da atise awa ungoi ji sise di gambuse atadera. <sup>43</sup> Edo Mamo mi gitijigadira ainde awa uso embomei awa waiko mi janibarago adera. Edo ingo embomei dengoro de ra ingido gogo ewo.”

#### *IESU INIA GE NEI SISIRA*

<sup>44</sup> Edo Iesu inia da mi sisira, “Eiawa Mamo da gitijigari da iji da awodo. Embo da amimi busu ngambedo gano jiwae be gowusira. Edo embo nei mi busu awa ngambuko gano awa tambusira te sekago govedo embo awa mambudo dubo ewamei de iaviri ise uso rora berari awa ori isira. Edo engenembedo mambudo busu awa mina itido burisira.”

<sup>45</sup> Edo Iesu ge awa atae edo inia da mi ge nei sisira, “Mamo da gitijigari iji awa teta embo da mi nati da ingo ove ewamei awa mina itido ari dipapa edo gido yei berari da eura isira. <sup>46</sup> Iko nati da ingo ove da ainda mina awa nembodiba awa tambudo gido mambudo uso rora berari awa ori ise edo engenembedo mambudo nati da ingo ove uso mina nembodiba awa mina itido burisira.”

<sup>47</sup> Edo Iesu ge awa atae edo inia da mi ge nei sisira, “Eiawa Mamo da gitijigari da iji da awodo. Embo mi

komboro ewa da wo badi pigisera. <sup>48</sup> Edo komboro awa wo neinde kainde mi beda etiri edo oiro embo mi komboro awa jumbero ombo da vitiri edo oiro embo anumbedo wo awa katabadera. Katabedo wo indari ewamei awa ungodu kande da ititise edo indapu awa wawara oro mambadera. <sup>49</sup> Da awodo utu de busu de atae adira ainde asisi ewagaewa mi wosedo embo bebegae de ewagaewa de awa katabadera. <sup>50</sup> Edo katabedo atae edo asisi ewagaewa mi embo bebegae awa riawo matawa atari da pigoro ainda atise embo bebegae mi ungodu di gambuse ji de atadera.”

<sup>51</sup> Edo Iesu inia da mi kiki sisira awa atae edo ungodu yei nganega isira, “Ingo kiki ainda be mo gosevita?”

Setiri ungoi mina sisera, “En nango gosera.”

<sup>52</sup> Setero Iesu mi mina sisira, “Moses da agodari da atopatari awa Mamo da gitijigadira iji ainda gari seka awa budo edo jiro gari seka de jiro gari matu de awa atopapotira.”

### *NAZARETH EMBOBO MI IESU UJO AE ISERA*

<sup>53</sup> Edo Iesu inia da mi kiki sisira awa atae edo yei awa dodo umo engenembedo uso nati topo da mambusira.

<sup>54</sup> Edo ainda mambudo Iesu Jew embobo da dada ari yei da mambudo embo atopapotisira. Atopapotiri ingido embo mi be gido jarisera edo sisera, “Jiro gari edo kotari nembodiba eiawa nonda burisiri? Edo wasiri ewagaewa eiawa rawodo iri? <sup>55</sup> Umone ri mi buro ari embo da mei ra edo uso ai re Mary ra edo James de Joseph de Simon de Judas de re uso nanonamendi ra. <sup>56</sup> Edo uso ru aimono ne nati da atima era.” <sup>57</sup> Awasedo ungoi tini gambari edo ungoi Iesu ujo ae isera.

Edo ungoi Iesu da yei awodo etero Iesu mi ungodu yei sisera, “Yei berari da embomei awa binga sari embo awa sapo edo era awarate binga sari embo da nati da embobo de uso orobe de awa umo sapo ae edo era.”



<sup>58</sup> Edo Iesu ge awodo sedo edo sekago wasiri ewagaewa nembogambo nenei awa ae doturisira ainda be awa embo ainda mi umo gebe ae isera awasedo.

## 14

### *UNGOI JOHN DORISERA*

<sup>1</sup> Iji ainde Herod Galilee busu simba edo isira amimi Iesu ro ira awa binga ingisira. <sup>2</sup> Ingido uso gitijijegari nenei da yei sisira, “Embo eiawa John umo mi ewamei ari embo umo betedo erido bugira awodo da umo goroba budo ari wasiri goroba de awa ira.”

<sup>3-4</sup> Iji nei giti da awa Herod mi setiri ungoi John budo bundedo budo gajari oro da ititisera. Edo Herod mi uso namendi Philip da aro Herodias awa bengono isira awarate John mi iji berari Herod da yei sedo isira, “Namendi da aro awodo burisesa amone biae ra awasedo doio.” Edo John umo iji berari awodo seuri Philip da aro Herodias awa tini gambari edo Herod iji berari bagedo isira awasedo Herod mi setiri ungoi John budo doro betarase sedo gajari oro da ititisera. <sup>5</sup> Edo Jew embo berari kotedo isera John awa binga sari embo awasedo Herod ungo oju edo John dae betae doturisira.

<sup>6</sup> Amboda Herod da kumbari iji bugiri umo bondo nembodiba sia isira. Etiri embo jiwae be bugusera. Edo bugero Herodias da gagara mi ungododa teda ya diwusira. <sup>7</sup> Etiri Herod dubo ewamei edo jo iaviri ise gagara ainda yei sisira, “Ro naso yei da dipapa adesa awa na iso yei da adi adi sari sena nanemi iso yei itadena.” <sup>8</sup> Edo Herod awodo setiri gagara uso ai Herodias mi ro sadira awa sisira. Setiri gagara mi Herod da yei sisira, “John umo mi ewamei ari embo da kopiri awa tewo da itido naso itio bane.” <sup>9</sup> Setiri gitijigari nembodiba awa dubo vevera isira. <sup>10</sup> Awarate Herod umo adi sari sisira awa embo berari uso ge awa

ingisera awasedo John umo gajari oro da atiri Herod mi ge setiri ungoi uso koma kausugurisera. <sup>11</sup> Kausugedo ungoi tewo da itido budo torido ungoi gagara ainda ititiseru. Itero gagara amimi budo uso ai da yei mambudo ai da ititisira. <sup>12</sup> Edo John da ambojimbi mi gajari oro da mambudo John da tamo budo mambudo gowusera. Govedo mambudo Iesu setero gosisira.

*IESU EMBO JIWAE BE DA INDARI ITITISIRA*

<sup>13</sup> Edo Iesu binga awa ingido yei awa dodo umo umosuka nga da vitido yei embo atae da mambusira. Awarate embomei mi ge awa ingido nati awa dodo tei mi umo bengi da awodo pepeta edo yei Iesu mambutira ainda mambusera. <sup>14</sup> Edo Iesu yei ainda mambudo nga dodo wosedo embo diti nembodiba gosisira. Gido Iesu embomei awa jo isira. Etiri ungodu karu amburo embomei ewamei isira.

<sup>15</sup> Edo ongobo edo piri Iesu da ambojimbi mi uso yei sisira, “Yei eiawa ro atae ra edo daedo ongobo ira awasedo embomei eiawa itio mambudo nati da indari mina itido indore.”

<sup>16</sup> Setero Iesu mi mina sisira, “Ro awasedo na ungo itano mamberi? Ingo mi indari itiwu indore.”

<sup>17</sup> Setiri ungoi Iesu da yei sisira, “Nangoda indari kiambu be atira ambe ingari 5 edo wo kiambu etoto de amimi atira.”

<sup>18</sup> Setero Iesu mi ungodu yei sisira, “Indari awa naso yei budo pou.” <sup>19</sup> Sedo Iesu setiri embomei awa sasawa da anumburiseru. Anumbetero Iesu ambe ingari 5 de wo etoto de awa ingo mi kumbudo diti utu inda edo Mamo da yei ategari ititiseru. Ategaru sedo atae edo Iesu ambe awa gavedo memeia edo uso ambojimbi da yei ititiseru. Edo Iesu mi ambe gavedo uso ambojimbi da ititiseru awa ungoi budo ambe awa embomei da yei ititiseru. Edo ungoi

ambe awa itero embomei mi indari awa indido inono be isera. <sup>20</sup> Edo ungoi indido atae etero indari buso awa dada edo kande 12 awodo beda isira. <sup>21</sup> Edo embo indari awa indisera ainda ajigari awa 5,000 awodo. Edo daedo evetu de kinapeina de indari awa indisera.

### *IESU UMO TAMO DA PEPETA ISIRA*

<sup>22</sup> Edo Iesu mi setiri uso ambojimbini nga da vitido giti umo diuga da sembusera. Edo ungo sembutero Iesu embomei itiri mambutero Iesu umo umosuka doriri da Mamo ga da ge sadi vivitisira. <sup>23</sup> Edo tumba jijiriri Iesu umo umosuka ainda atisira. <sup>24</sup> Edo Iesu ainda atiri nga awa umo soropuda mambusira. Mambiri edo bisi bisara de edo umo diuga de awa teta ewa yawata ise arago edo amimi nga awa budo vitido wosedo benei da sembari katogo ae isira.

<sup>25</sup> Edo sipo tu busedo piri Iesu umo tamo da pepeta edo uso ambojimbini da yei asusubedo bugusira. <sup>26</sup> Edo uso ambojimbini Iesu umo tamo da pepeta iri gido ungo oju mi biae isera edo gogo dimbudo sisera, “Asisi ra.”

<sup>27</sup> Setero Iesu ungodu yei ge sisira, “Goroba ewo. Oju eove. Amone namona.”

<sup>28</sup> Setiri Peter mi sisira, “Gitijigari imo be gadera awa ge segae edo na umo tamo da pepeta edo iso yei yane.”

<sup>29</sup> Setiri Iesu mi sisira, “Puio.”

Setiri Peter nga dodo wosedo umo tamo da pepeta edo Iesu da yei mambusira. <sup>30</sup> Awarate pepeta ise bisara kiambu ae gido Peter oju isira. Oju edo umo kununubadi isira. Kununuburise Peter Iesu da yei gogo dimbudo sisira, “Bada na kondade e.”

<sup>31</sup> Setiri Iesu burigi be ingo kerere edo Peter da ingo da budo Peter da yei sisira, “Imo tumonda ari kiambu embo ro awasedo imo na tumonda ae etesi?”

<sup>32</sup> Sedo ungo etoto nga da vivitiseru. <sup>33</sup> Vitero bisara atae isira awasedo ambojimbi nga da mi Iesu tumondebain edo Iesu da yei sisera, “Gebe imo awa Mamo da mei.”

*IESU GENNESARET EMBOMEI ETIRI JEBUGURISERA*

<sup>34</sup> Edo umo diuga awa sembudo busu Gennesaret umo bengi da vivitiseru. Edo ainda bugero embomei ainda awa Iesu awa gari awasedo binga Iesu bugira awa embo berari da yei itero mambusira. <sup>35</sup> Edo binga awa ingido ungoi karu embomei budo Iesu da yei bugusera. <sup>36</sup> Budo bugudo ungoi Iesu da yei sedo gosiseru, “Karu embomei mi uso ombari begiti jigadera awa imo ungo ondose.” Awa setero embo amemi Iesu da ombari begiti jigido isera awa embo awa ewamei edo isera.

## 15

*MAMOUMBOGO DA ATOPATARI AWA*

<sup>1-2</sup> Edo Pharisee embo nenei de agodari da atopapotegari embo nenei mi Jerusalem dodo Iesu da yei bugudo sedo gosiseru, “Ro awasedo iso ambojimbi ingodenaso mamoumbogo da atopatari awa kera ae edo eri? Ko ungo indari indae giti da awa ingodenaso agodari da ingo segari awa ambo ambo ae edo era.”

<sup>3</sup> Setero Iesu mi mina sisira, “Edo ingo ingoda mamoumbogo da atopatari awa ingido ewa awa ro awasedo ingo Mamo da agodari awa kera ae edo evi? <sup>4</sup> Edo Mamo mi sisira aimamo iso sapo eio. Edo embo amemi uso aimamo da yei biae sadira awa embo mi dadera sisira. <sup>5</sup> Edo ingo re eiawa atopapotewa embo da uso kando atadira gido kando awa aimamono da yei itae dodo Mamo da yei itadira. <sup>6</sup> Eiedo ise embo awa uso aimamo simba ae sumbae edo ira awa awara sewa. Edo ingo atopatari eiedo ise ingo ingoda mamoumbogo da ari awa Mamo da agodari da tamo da ititewa. <sup>7-8</sup> Ingo ise sarago ari embobo

Isaiah gebe sisira Mamo mi ro ingoda jawo da sira awa sisira,  
 ‘Embomei eiawa tepo ge mi na sapo edo era te ungodada  
 jo mi na sapo aera. <sup>9</sup> Edo na tumondebain awodo  
 edo era ainda joda be atae ra ainda be awa ungo  
 ungodada mamoumbogo da wasiri da awa atopatido  
 era.’”

*RO MI EURI EMBO BIAE EDO ERA*

<sup>10</sup> Edo Iesu mi ge setiri embo jiwae be bugutero ainda yei sisira, “Naso ge ingido edo gido gogo ewo. <sup>11</sup> Ro embo da be da mambutira amimi ae embo awa embo biae aera te ro embo da joda edo bugutira edo embo amimi be mi sira amimi iri embo awa embo biae ira.”

<sup>12</sup> Setiri ainda amboda Iesu da ambojimbibi uso yei bugudo Iesu da yei sisira, “Pharisee embomei ge setesa awa ingido ainda amboda ungo awa ujo ae etera awa imo goesita?”

<sup>13</sup> Setero Iesu mi mina sisira, “Rive berari naso Mama utu da amimi gowae awa embo mi sokadera. <sup>14</sup> Edo embomei awa dowo. Ungo awa gitijijigegari diti ambubura. Edo diti guba ari embo nei mi diti guba ari embo nei awa gitijigadira amone embo etoto emone mambudo koto ngambari nembodiba da wosadera.”

<sup>15</sup> Setiri Peter mi sisira, “Nangoda yei ge ingari sago ae ainda be awa ujuge gore.”

<sup>16</sup> Setiri Iesu mina sisira, “Iso jiro okain embo nenei da da awodo ta?” <sup>17-18</sup> Imo goesita ro embo da be da torido ira awa mambudo embo da tini da edo ijegedo ira awarate embo da joda kotari awa be mi sira emimi euri embo wasiri biae edo ira. <sup>19</sup> Edo kotari bebegae jiwae joda edo bugutera amimi embo dadira edo viro bengaba adira edo bengono adira edo gebusadira edo embo nei bekuba adira edo wasiri bebegae nenei jiwae adira. <sup>20</sup> Edo kotari

biae amimi ari embo wasiri biae adira awarate ingo segari wasiri amimi ari ae mana embo wasiri biae awa mana adira.”

*EVETU GOROBA BE EDO TUMONDA ISIRA*

<sup>21</sup> Edo Iesu yei awa dodo mambudo busu nati Tyre de Sidon de da demo da ainda bugusira. <sup>22</sup> Edo Iesu ainda bugiri Cana evetu busu ainda atinatina amimi Iesu da yei bugudo sisira, “Bada David da orobe na jo egae ko asisi biae mi naso gagara da joda atise amimi euri gagara atari biae atima ira.”

<sup>23</sup> Sisira te Iesu evetu ainda ge mina sae. Etiri uso ambojimbi uso yei bugudo sedo gosisera, “Evetu eiawa ingodena ambo ambo ise ingodenaso yei gogo dimbira awasedo evetu oiawa itiu mambare.”

<sup>24</sup> Setero Iesu mi sisira, “Mamo mi na awa Israel embomei teta wo sheep mi jajovegari inge edo atima era ainda yei itiri bugusena awarate umo na embo Israel embo ae ainda yei itae bugaera.”

<sup>25</sup> Awa setiri evetu bugudo Iesu da jo da baingo dederi edo Iesu da yei sisira, “Gitijigari na kondade egae.”

<sup>26</sup> Setiri Iesu mi mina sisira, “Embo mi kinapeina da indari awa budo mana sino da itadira.”

<sup>27</sup> Setiri evetu mi mina sisira, “Gitijigari gebe setesa awarate indari momono mamo da tewo da edo busu da wosedo ira amone sino mi indadira amone awara.”

<sup>28</sup> Setiri Iesu mi evetu da yei mina sisira, “Evetu gebe setesa edo tumonda ari nembogo etesa awasedo imo ro dipapa esa awa adena.” Setiri edo iji da ainde evetu ainda gagara awa ewamei isira.

*IESU EMBO NENEI JIWAE EWAMEI EDO ISIRA*

<sup>29</sup> Edo yei awa dodo Iesu pepeta edo Galilee umo bengi da awodo mambudo doriri da vitido anumberisira.

<sup>30</sup> Anumbetiri embo jiwae be mi Iesu da yei tei ingo ambari de diti guba ari de tei ingo ambari de ge segeregae de

edo karu embo nenei jiwae deda budo bugusera. Bugudo embomei eiawa Iesu da jo da itero Iesu mi berari ewamei isera. <sup>31</sup> Edo Iesu ungo ewamei etero ge segeregae ge sera edo tei ambari pepeta era edo ingo ambari ewamei isera edo diti guba ari yei gosisera. Edo ungoi awodo etero embo berari mi awa be gido jarisera edo gido ungoi Israel embomei da Mamo awa jasiga isera.

*IESU EMBO NENEI AWASEDO INDARI ITITISIRA*

<sup>32</sup> Edo Iesu mi setiri uso ambojimbi uso yei bugero Iesu ungodu yei sisira, “Embomei eiawa nangae atise iji tamonde atae etera edo indari atae etera awasedo na ungo jo ira. Edo indari itae dodo ungo itano mambadera edo ungo pepeta edo mambuse awa ambadera awasedo na ungo mana itano mambadera.”

<sup>33</sup> Setiri Iesu da ambojimbi mi uso yei sisira, “Yei ro atae einda nango indari embo berari eiawa embo nonda indari inono budo embomei eiawa underi?”

<sup>34</sup> Setero Iesu ungodu yei sedo gosisira, “Ingoda yei ambe ingari roinge atiri?”

Setiri ungoi mina sisera, “Nango da yei ambe ingari 7 edo wo memeia de ra.”

<sup>35</sup> Setero Iesu mi setiri embo berari anumburisera.

<sup>36</sup> Anumbetero Iesu ambe ingari 7 edo wo de awa Mamo da yei ategari ititisira. Ategari itido Iesu mi ambe de wo de awa gavedo memeia edo memeia itido isira awa ambojimbi da itiri ambojimbi mi embo da yei itido isera.

<sup>37</sup> Itero embo berari mi indido embo inono be isera. Edo ungoi indido atae etero indari buso doturisera awa ambojimbi mi dada isera edo kandea 7 awodo awa beda isera. <sup>38</sup> Edo embo indari awa indisera ainda ajigari awa 4,000 edo emboevetu de kinapeina de indari indisera awa ajigae. <sup>39</sup> Edo Iesu embomei itiri mambusera. Mambudo Iesu nga da vitido nati Magada busu ainda mambusira.

## 16

*EMBO NENEI MI WASIRI EWAMEI GADI DIPAPA ISERA.*

<sup>1</sup> Edo Iesu ainda bugutiri edo Pharisee de Sadducee embomei de mi uso yei da bugusera. Bugudo Iesu bagedo gadi isera edo ungoi Iesu da yei wasiri Mamo da goroba mi ungodu yei arase sisera ainda be awa Iesu mi awodo adira amimi ungo gadera awa Mamo mi Iesu itiri bugusira awa gadera sisera. <sup>2</sup> Awarate ungoi awa setero Iesu mi ungodu yei mina sisira, “Waiko wowoseuri ongobo euri ingo sedo ewa euma awa yei ewamei adira ainda be awa poroga awa kokoi etira awasedo. <sup>3</sup> Edo sipo de erido ingo sedo ewa yei umenga etira awasedo ga dadira sedo ewa. Edo ingo utu da iwata awa ewamei gido ewa awarate ingo iwata Mamo mi busu atae adira ainda ititira awa ingo gae jarewa. <sup>4</sup> Embo boroko atera awa embo bebegae edo ungo Mamo dubo bae. Edo ingo nanemi ari wasiri goroba de anase sedo gosewa te mana adena. Mamo mi ari wasiri goroba de awa adira teta ari Jonah da isira awodo edo ari awa ingo mi gadewa awarate nanemi nei mana adena.” Edo Iesu awa sedo ungo dodo mambusira.

*PHARISEE DE SADDUCEE EMBOMEI AWA JINJIBEWO*

<sup>5</sup> Edo ambojimbi mi umo diuga da sembusera awarate ungoi ambe nenei bae ruvegurisera. <sup>6</sup> Etero Iesu mi ungodu yei sisira, “Pharisee de Sadducee embomei da ambe bajari siwo jawo yeast awa jinjibewo.”

<sup>7</sup> Setiri edo ambojimbi ungosuka ge ainda be ro ri awa eura isera edo sisera, “Iesu ge awa setira ainda be awa ingodena ambe bae bugera awasedo.”

<sup>8</sup> Edo ungo awa sero Iesu ungo ro sera awa gido ungodu yei sedo gosisira, “Ro awasedo ingo ingosuka ambe bae bugewa awasedo ge mina sara evi? Ingo awa embo da embo ingoda tumonda ari awa kiambu ra. <sup>9</sup> Ingo naso ge



ainda be awa gadi jarewa. Edo ambe ingari 5 mi embo 5,000 awodo undutana amomo ingo mo ruvegetevita? Edo kande roinge awa indari buso mi siritavi? <sup>10</sup> Edo ingo kotevita ainda amboda ambe ingari 7 mi embo 4,000 awodo awa nanemi undetena mo gosevita? Edo iji ainde indari buso mi kande roinge siritavi? <sup>11</sup> Na ingoda yei ambe da ge saera mo ro awasedo ingo gadi jarevi? Pharisee de Sadducee embomei da ambe bajari siwo jawo yeast awa jinjibewo.” <sup>12</sup> Setiri edo uso ambojimbi gosisera ko Iesu awa ambe bajari jawo yeast awa jinjiborase saera te Iesu awa ungodaya yei sisira Pharisee de Sadducee embomei da atopatari awa teta ambe bajari siwo jawo yeast mi rawarago ira awa jinjiborase sisira.

*IESU USO AMBOJIMBI DA YEI SEDO GARI ITTISIRA*

<sup>13</sup> Amboda Iesu busu Caesarea Philippi demonda ainda bugusira. Ainda bugudo Iesu uso ambojimbi da yei sisira, “Embo mi na Mamo da mei busu da bugudo embo isena awa ave sedo eri?”

<sup>14</sup> Setiri ungoi mina sisera, “Embo nenei sedo era John umo mi ewamei ari embo edo nenei sedo era Elijah edo nenei sedo era Jeremiah o Mamo da binga sari embo nenei awodo sedo era.”

<sup>15</sup> Setero Iesu ungodaya yei sedo gosisira, “Edo ingo na awa ave sedo evi?”

<sup>16</sup> Setiri Simon Peter mi sisira, “Imo awa Soregari Embo Mamo mi itari bugarase sisira Mamo natopo atari da mei.”

<sup>17</sup> Setiri Iesu mi mina sisira, “Simon Jonah da mei Mamo mi imo ewamei be etira. Edo embo nei mi gebe awa iso yei saera te naso Mama utu da atima ira amimi iso yei setira awasedo na iso yei sena imo awa Peter edo iso jawo ainda be awa ganuma. <sup>18</sup> Edo ganuma einda tamo da nanemi naso gebe ari embomei awa itadena. Itano betari matawa atari da goroba mi mana ari duradera. <sup>19</sup> Edo nanemi

Mamo da atari yei da mangiro pirigari rora awa iso yei itadena. Emboro busu da rawa gajadesa da awodo Mamo mi utu da emboro gajadira. Emboro busu da rawa gajadi ae da awodo Mamo mi utu da gajadi aera. <sup>20</sup> Awa sedo Iesu mi ambojimbida da yei sisira, “Na Soregari Embo Mamo mi itari bugarase sisira awa embo nenei da yei sawo geore.”

### *IESU USO BETARI DA GE SISIRA*

<sup>21</sup> Edo iji ainda edo Iesu uso ambojimbida isaga da atopapotise ungodada yei sisira, “Na Jerusalem da mambadana ainde awa Jew embomei da gitijijigegari de Priest da gitijijigegari edo agodari atopatari embomei mi oro na memesi nembodiba be badena. Edo ungoi awodo na doro betadana awarate iji tamonde atae ari Mamo mi na awa betari da edo jigari sekago wasiri de eradena.”

<sup>22</sup> Awodo setiri Peter mi Iesu budo demonda yiko Iesu da yei sisira, “Kotari biae awa do. Na wasiri awodo awa iso yei ijegeurase ujo ae ena.”

<sup>23</sup> Setiri Iesu wareregedo Peter da yei sisira, “Satan imo naso buro awa beitiguresa awasedo na dodo mambuio. Edo imo awa embo da kotari awa kotesa te Mamo da kotari awa kotaera.”

<sup>24</sup> Awasedo Iesu mi uso ambojimbida da yei sisira, “Embo ave na ambo ambo ari dipapa edo gido re dowo uso dipapa berari awa dodo edo orega uso awa budo na ambo ambo are. <sup>25</sup> Edo embo ave betari oju ise kakana ira awa amboda betadira awarate embo ave na awasedo betadira awa natopo atadira. <sup>26</sup> Edo embo ave busu da rora berari awa badira te wasiri natopo atari awa bae adira amone biae be ra. Edo embo da rawa mi mana uso asisi da natopo atari awa rora mi mana mina itido badira. <sup>27</sup> Edo na Mamo da mei bugudo embo isena awa naso asisi ewagaewa de edo Mamo da goroba ewamei de mi jinenebari mi bugadana. Awodo bugudo embo dada ungo ro isera ainda mina awa

itadena. <sup>28</sup> Edo kotembewo embo nenei boroko einda derido atera awa ungoi na Mamo da mei embo isena awa gitijigadi bugutinono gadera. Gido amboda ungo betadera awarate giti gadera.”

## 17

### *IESU DA DOMBU TETA WAIKO MI JATEBARAGO ISIRA*

<sup>1</sup> Iji 6 atae etiri Iesu Peter de nanonamendi etoto James de John de budo daedo doriri inda ungo ungosuka vivitiseru. <sup>2</sup> Edo ungoi Iesu ditini ero Iesu dombu nei isira. Edo uso dombu teta waiko mi janibarago isira edo uso bosini awa teta poroga parara inge isira. <sup>3</sup> Edo wasiri eiawa ijegetiri ambojimbi tamonde mi Moses de Elijah de awa Iesu ga ge sero gosisera.

<sup>4</sup> Gido Peter mi Iesu da yei sisira, “Gitijigari na dubo ewamei ena ingodena einda atera awasedo. Edo imo dipapa adesa awa nanemi boga tamonde adena imo da Moses da edo Elijah da.”

<sup>5</sup> Edo Peter umo ge awa sise atiri poroga parara mi ungo dogisira. Edo ge poroga da awodo bugudo sisira, “Emone naso mei na awa na dubo burena. Na uso yei iaviri ena awasedo uso ge ingiwo.”

<sup>6</sup> Edo ambojimbi ge awa ingido oju edo gido dombu mi busu da papisera. <sup>7</sup> Edo pasetero Iesu ungodu yei bugudo sisira, “Oju eove ta eriwo.” <sup>8</sup> Setiri ambojimbi diti inda edo Iesu gosisera awarate ungo embo nenei gae.

<sup>9</sup> Edo ungo doriri da edo wowosero Iesu mi ungodu yei sisira, “Ingo ro getewa awa embo nenei da yei seove. Amboda na Mamo da mei embo isena awa betedo eradena ainde awa sadewa.”

<sup>10</sup> Edo Iesu awa setiri uso ambojimbi uso yei sedo gosisera, “Ro awasedo agodari da atopapotegari embomei mi siseri Elijah awa giti bugadira siseri?”

<sup>11-12</sup> Setero Iesu mi mina sisira, “Gebe Elijah giti bugari rora berari awa sia adira awarate umo bugusira awa embo mi umo gae awasedo uso yei wasiri bebegae isera da awodo embo mi na Mamo da mei busu da bugudo embo isena ainda yei biae adera ko ungo na gae awasedo. <sup>13</sup> Edo Iesu ge awa setiri uso ambojimbi mi umo John umo mi ewamei ari embo da ge setira awa gosisera.

*IESU EMBO DA AINDA MEI EWAMEI ISIRA*

<sup>14-15</sup> Edo ungoi engenembedo embo jiwae be da yei mambero embo da amimi Iesu da yei bugudo jo da baingo dederi edo sisira, “Gitijigari naso mei jo egae. Naso mei awa jiro biae awasedo umo iji dada riawo da edo umo da wosedo ira. <sup>16</sup> Edo na naso mei budo iso ambojimbi da yei bugena te ungoi naso mei ari ewamei ari sago ae etera.”

<sup>17</sup> Setiri Iesu mi mina sisira, “Ingo awa jiro okain embomei. Na iji roinge ingo awa embo eni? Mei awa budo naso yei pou.” <sup>18</sup> Sedo Iesu mi ge asisi biae da yei setiri asisi biae ijegetiri iji ainde mei awa ewamei isira.

<sup>19</sup> Edo Iesu da ambojimbi mi ungo ungosuka bugudo Iesu da yei nganega isera, “Ro awasedo nango asisi biae mei kiambu da joda awa ro embo ondae wosae eteri?”

<sup>20</sup> Setero Iesu mi mina sisira, “Ingoda gebe ari awa atae ra awasedo ingo asisi biae ondae wosae etewa. Edo na ingoda yei gebe sena awasedo ingiwo. Ingo ingoda gebe ari awa kiambu teta ve kiambu jawo mustard awodo awa ingo mi doriri ainda sae etewa erido ounda mambu sae etewa awa doriri awa mambae etira. Edo ingo mi rora neinde kainde ae etewa. Edo Mamo ga daedo ge sae etewa edo neta ae etewa amimi ari ingo asisi bebegae nenei awa ondawo ijegae etera. <sup>21</sup> Awarate ingo Mamo ga da ge sae edo neta ae awa ingo mi mana asisi bebegae awa mana ondae etewa.”

*IESU USO BETARI DA GE SEKAGO SISIRA*

<sup>22</sup> Edo iji tupo Iesu da ambojimbi Iesu ga Galilee busu da dada etero Iesu mi ungodu yei sisira, “Iji bugutira ainde embo mi na Mamo da mei bugudo embo isena awa ungo mi embo na doro betadena ainda ingo da na itadera.

<sup>23</sup> Awarate ungoi doro iji tamonde atae ari unemi sekago eradira.” Awa setiri uso ambojimbi dubo vevera isera.

*IESU USO TAX GANO ITITISIRA*

<sup>24</sup> Edo Iesu uso ambojimbi de Capernaum nati da bugusera. Bugero Jew embomei da tumondebain ari oro da tax bari embo mi bugudo Peter da yei sisera, “Iso atopatari tumondebain ari oro da tax itido ita?”

<sup>25</sup> Setero Peter mi sisira, “En umo itido ira.”

Sedo mando joda totorisira. Etiri Iesu mi ge giti sisira, “Simon imo ro kotesi? Gitijigari embo nembodiba da kinapeina mi uso yei tax gano itido eri ta embo nenei mi uso yei tax gano uso yei itido eri?”

<sup>26</sup> Setiri Peter mi mina sisira, “Embo nenei mi tax gano uso yei itido era.”

Setiri Iesu mi mina sisira, “Gebe mei uso mamo da yei tax gano itae edo ira. <sup>27</sup> Awarate ingae na mana ano embo tini gambari eorase ujo ae era awasedo ingae itadena. Imo umo diuga da mambudo guti pigeio. Edo wo giti dimbadesa ainda joda awa gano tambadesa. Edo gano badesa amone imo de namo da Jew embomei da tumondebain ari oro da tax itari inono ra gio. Edo gano awa budo mambudo tax bari embo da yei itio bore.

## 18

*IESU DA AMBOJIMBI IESU DA YEI NGANEGA ISERA*

<sup>1</sup> Iji nei Iesu da ambojimbi mi bugudo uso yei sisera, “Mamo atima ira yei ainda mo embo ave awa nembogori?”

<sup>2</sup> Setero Iesu mi setiri mei kiambu bugudo Iesu da jo da dederisira. <sup>3</sup> Derido atiri Iesu uso ambojimbida da yei sisira, “Ingo nei edo tetakinapeina memeia inge ae adewa awa imo mana Mamo da atari yei da toradewa. <sup>4</sup> Edo embo ave saboa edo mei kiambu inge adira amone Mamo da atari yei ainda umo embo nembodiba adira. <sup>5</sup> Edo embo ave mei kiambu naso jawo da awa kondade adira awa embo awa na kondade ira.

### *IESU KINAPEINA DA JAWO DA ATOPAPOTISIRA*

<sup>6</sup> Iesu mi sisira, “Embo amemi ari mei kiambu na gebe ira awa na dodo wareregadira awa wasiri biae adira. Embo awa wasiri biae awa ae giti da awa embo mi ganuma nembodiba awa embo ainda dubo da kikivi edo ewa kapuru da pigadera awa uso yei awa ewamei. Awarate embo awa atise wasiri biae awa adira awa embo ainda yei awa biae be ra.

<sup>7</sup> “Edo wasiri bebegae busu berari da jiwae atira amimi euri embo ungodada gebe ari awa jajovegedo era awa biae be ra. Wasiri biae awa yei berari ijegedo ira awarate embo amemi euri wasiri biae awa bugudo ira awa embo ainda yei biae adira.

<sup>8</sup> “Iso ingo ta tei mi ari wasiri biae edo re diugedo pigeio. Imo iso tei da ta ingo da ta awa diugedo pigedo utu da toradesa awa ewamei ra te iso ingo etoto de tei etoto de atadera edo ungoi pigoro riawo matawa atari da mambadesa awa biae ra. <sup>9</sup> Imo iso diti mi ari wasiri biae edo re diti gurugedo budo pigeio. Edo imo iso diti da de utu da toradesa awa ewamei ra te iso diti etoto atadera edo ungoi pigoro riawo matawa atari da toradesa awa biae ra.

<sup>10</sup> “Awasedo kinapeina memeia awa ujo ae eove. Ingido gogowo ewo. Ungoda asisi ewagaewa utu da awa iji berari naso Mamo da diti da atera. <sup>11</sup> Edo Mamo da mei bugudo embo isira awa embo jajovegari awa soregadi bugusira.

*WO AWA JAJOVEGURISIRA*

<sup>12</sup> “Kotedo gogowo ewo. Embo da uso wo jawo sheep awa 100 edo da jajovegae etira awa ro ae etiri? Edo wo nenei 99 awa doriri da dodo mambae etira umo wo sheep jajovegetira awa eura adira. <sup>13</sup> Edo ingoda yei sena umo eura ima tambudo dubo ewamei adira. Edo umo eura ima wo sheep da munenegurisira awa tambudo uso iaviri wo sheep 99 munenegae awa derigadira. <sup>14</sup> Edo da awodo ingoda Mamo utu da atira awa kinapeina memeia da awa riawo mata awa ewuse atira ainda mamborase ujo ae edo ira.”

*RAWODO EDO EMBO NEI DA JO ESI?*

<sup>15</sup> Iesu mi sisira, “Embo nei mi iso yei biae ari gido uso yei mambudo gae unjugari da ro etira awa ujugeo gare. Edo umo iso ge ingadira awa ingo sekago otao adewa. <sup>16</sup> Awarate umo iso ge ingae adira awa embo da ta etoto awodo budo ingae embo ainda yei da mambuio edo sekago seio gare jiwari mi sira da awodo. Jiwari mi sira, ‘Embo ave embo nei bekuba ari gido embo etoto ta tamonde mi bekuba ge sera da awodo awa soro kasari embo mi gadira bekuba ge sera awa gebe ra.’ <sup>17</sup> Ungo embo ainda ge sadera awa awarate embo awa ungodu ge ingae adira awa gebe ari embomei dada oro ainda edo gogowo edo seio gore. Saso ungoi embo ainda yei ge sore awarate umo ungodu ge ingae adira awa demonda itiwosare. Awodo ise umo teta aumo o tax bari embo awodo jijipo eio.

<sup>18</sup> “Na ingoda yei gebe sena awasedo ingido gogowo ewo. Emboro busu da rawa gajadesa da awodo Mamo mi utu da emboro gajadira. Emboro busu da rawa gajadi ae da awodo Mamo mi utu da gajadi aera.”

*IESU USO EMBOMEI DEDA DADA ADIRA*

<sup>19-20</sup> Iesu mi sisira, “Ge nei ingoda yei sadena. Embo etoto ungo jiro da edo Mamo da yei ro embo sadi adera

awa ungo awa embo adira ainda be awa embo etoto ta tamonde naso gebe ari embo mi dada adera awa na awa ungo de daedo ra.”

*IJI BERARI EMBOMEI DA BURIA KOTEMBEDO DOIO*

<sup>21</sup> Peter mi Iesu da yei bugudo sisira, “Bada embo nei mi naso yei iji berari biae ari mo iji roinge na umo kotembedo doeni? Iji 7 awodo kotembedo doenita?”

<sup>22</sup> Setiri Iesu mi mina sisira, “Awodo aera iji 7 aera te ajigari da aera te iji berari kotembedo doio.

<sup>23</sup> “Edo Mamo da gitijigari iji awa teta gitijigari da mi uso gano roinge uso buro embomei mi jingama edo mina itadi siseri awa gadi dipapa isira. <sup>24</sup> Edo umo awa tuturo iri ungoi embo da uso gano nembodiba jingama isira te mina itae awa budo totorisera. <sup>25</sup> Edo buro embo awa gano mina itari sago ae gido gitijigari mi sisira ungoi uso buro embo de uso aro de uso kinapeina de edo uso rora topo berari awa ori orase sisira. Edo ungoi awodo adera awa buro embo awa gitijigari da mina awa sekago itadira awa gitijigari mi sisira.

<sup>26</sup> “Edo buro embo ge awa ingido gitijigari da jo da baingo dederi edo gegeta edo sisira, ‘Iji tupo simba egae sekago iso yei itore.’ <sup>27</sup> Setiri edo gitijigari awa buro embo awa jo edo gido kotembedo doturisira. Edo buro embo awa mina itae.

<sup>28</sup> “Edo embo awa ijegedo buro embo nei tambusira. Edo embo ainda yei gano kiambu ititisira te mina uso yei awa itae. Edo buro embo nei awa gido dubo da kundo uso yei sisira, ‘Naso gano awa sekago naso yei iti.’

<sup>29</sup> “Setiri buro embo nei uso jo da durido gegeta edo uso yei sisira, ‘Imo iji tupo simba adesa awa na iso gano awa sekago iso yei itadena.’ <sup>30</sup> Setiri embo awa simba ae edo embo mi sisira, “Gajari oro da itiwo. Edo atare.

<sup>31</sup> Etero buro embo nenei mi ro isera awa gido dubo vevera



edo gido ungoi gitijigari nembodiba da yei mambusera. Mambudo ungoi uso yei ro berari ijegurisira awa sisera.

<sup>32</sup> “Edo ungoi awa setero gitijigari mi setiri buro embo giti da bugusira awa totorisira. Toriri gitijigari mi uso yei sisira, ‘Imo awa buro embo biae. Imo naso yei gegeta etesa na naso gano awa simba anase edo na imo kotembedo doetena. <sup>33</sup> Awodo na imo jo etena edo imo daedo buro embo nei da jo ae etesa.’ <sup>34</sup> Edo gitijigari tini gambari edo setiri ungoi buro embo awa bundari oro da ititisera. Edo gitijigari mi sisira amboda buro embo mi uso gano berari awa sekago itarase sisira.

<sup>35</sup> “Edo ingo berari ingoda jo mi embo nenei da buria awa kotembedo doae adewa awa naso Mamo mi ingoda buria awa mana kotembedo doadira.” Edo Iesu awa sedo uso ambojimbi da yei ge awa atae isira.

## 19

### *IESU ARO ASINI DOARI DA ATOPAPOTISIRA*

<sup>1</sup> Edo Iesu ge awa atae edo Iesu Galilee dodo Judea busu da mambusira Jordan umo benei da. <sup>2</sup> Edo mambiri edo embo jiwae be umo ambo ambo edo mambero embomei awa etiri ewamei isera.

<sup>3</sup> Edo Pharisee embomei mi bugudo Iesu bagadi sedo uso yei sisera, “Embo ave uso aro tepo doadi dipapa adira amomo nangoda agodari mo awara seita?”

<sup>4</sup> Setero Iesu mi mina sisira, “Ingo jiwari ewamei be ajigedo gaeta, “Tuturo da Mamo mi janja edo poega isira. <sup>5</sup> Edo umo awodo edo Mamo mi daedo sisira embo awa uso aimamo ga dodo uso aro ga dada edo ungo etoto awa da adera sisira.’ <sup>6</sup> Edo ungo awa etoto aera te ungo awa da awasedo ro Mamo mi pundegetiri dada etera awa doawo ungo awa embo nenei mi ewoga ewoga eore.”

<sup>7</sup> Setiri Pharisee embomei mi uso yei sedo gosisera, “Awa gebe edo ro awasedo Moses mi sisiri embo ave uso aro doari dipapa edo awa umo aro doari da ge gaedo edo aro doari mambarase sisiri?”

<sup>8</sup> Setero Iesu mina sisira, “Moses mi sisira ingoda aro asini doadewa awa awara sisira ainda be awa ingoda jo awa bebegae awasedo awarate tuturo da Mamo wasiri awawa umo dipapa ae isira. <sup>9</sup> Edo na ingoda yei sena embo ave uso aro doadira awa evetu awa viro aera edo embo awa evetu nei jimbadira awa viro adira. Edo daedo embo ave evetu jimbudo doari jimbadira awa viro adira giwo.”

<sup>10</sup> Edo Iesu ge awa setiri uso ambojimbi mi uso yei sisera, “Awodo da embo uso aro ga dada atadera gido re ewamei awa embo awa masewo atadira awa ta rora.”

<sup>11</sup> Setero Iesu mi mina sisira, “Embo amenda yei Mamo atopatari eiawa isaga ira embomei amimi atopatari eiawa ambo ambo adira awarate embo nenei ambo ambo ae. <sup>12</sup> Edo be neinde kainde mi euri embo jimbae masewo atima era. Embo nenei ungodu aimono mi budo era ainde awa ungu ve ae awasedo ungu jimbae atima era. Edo embo nenei awa kasiwo mi diugedo era awasedo ungu jimbae atima era. Edo embo nenei awa iji berari Mamo da agipo adi awasedo dipapa edo gido jimbae edo era. Edo embo ave atopatari eiawa badira gido bare.”

### *IESU KINAPEINA NENEI EWAMEI ISIRA*

<sup>13</sup> Embo nenei awa Iesu mi uso ingo awa ungodu kinapeina da beo da itido Mamo da yei ungu awasedo gegeta arase dipapa edo gido ungodu kinapeina awa budo bugusera.

<sup>14</sup> Edo budo bugero Iesu da ambojimbi mi embomei awa isiburisera awarate Iesu mi sisira, “Kinapeina naso yei puradi iriroro beitigeove. Na ungu naso yei purorase dipapa ena ainda be awa embo amenda yei saboa ari teta

kinapeina einda ainda awodo awa Mamo da gitijigari yei da toradera.”<sup>15</sup> Edo Iesu uso ingo ungodu kopiri da itido Iesu mambusira.

*MEI SINGA RORA JIWAE DE MI IESU NGANEGA ISIRA*

<sup>16</sup> Iji da mei singa da mi Iesu da yei bugudu sedo gosisira, “Atopatari na wasiri ewamei ro edo wasiri ewamei natopo atari awa beni?”

<sup>17</sup> Setiri Iesu mi mina sisira, “Ro awasedo imo naso yei ro ewamei awa nganega esi? Mamo umo umosuka awa ewamei ra. Edo imo wasiri matawa atari dipapa adesa awa Mamo da agodari awa kera eio.”

<sup>18</sup> Setiri mei singa mi nganega isira, “Agodari mo rori?”

<sup>19</sup> Setiri Iesu mi mina sisira, “Embo nei deose. Ipu da eose. Bengono eose. Ge busose. Iso ai de mamo de sapo eio. Imo imosuka dubo buresa da awodo embo nenei dubo buio.”

<sup>20</sup> Setiri mei singa mi mina sisira, “Agodari berari awa na kera emona. Edo nei ro eni.”

<sup>21</sup> Setiri Iesu mi mina sisira, “Imo ewamei teta Mamo ewamei awodo adi dipapa adesa awa mambuio. Mambudo iso rora berari awa ori edo gano awa embo rora ae ainda itio. Edo rora jiwae awa imo simba ise utu da atira awasedo puio na ambo ambo ase.”

<sup>22</sup> Setiri mei singa awa ge awa ingido dubo vevera de mambusira ko umo awa rora jiwae de awasedo.

<sup>23</sup> Edo Iesu ge awa sedo atae edo Iesu uso ambojimbida yei sisira, “Na ingoda yei sena embo rora jiwae de embo mi Mamo da gitijigari yei da torari awa okain be ra. <sup>24</sup> Edo na ingoda yei ge nei sane. Wo nembodiba camel mi ningu to da torari awa okain be ra awarate embo rora jiwae embo mi Mamo da gitijigari yei da torari awa okain be okain ra.”

<sup>25</sup> Edo Iesu uso ambojimbi ge awa ingido kove be kove edo Iesu da yei nganega isera, “Awodo re awarate ko Mamo mo embo ave awa soregeiri?”

<sup>26</sup> Setero Iesu ungo gon edo ditini edo mina sisira, “Embo mi eiawa ari sago aera te Mamo mi rora berari awa adira.”

<sup>27</sup> Setiri Peter mi sisira, “Nango rora berari dodo imo ambo ambo era awasedo imo nangoda yei ro itesi?”

<sup>28</sup> Setiri Iesu mi mina sisira, “Na iso yei gebe mi sedo ena awasedo ingio. Edo busu seka bugadira ainda Mamo da mei busu da bugudo embo isira awawa uso anumba ewamei parara de ainda anumbadira. Edo daedo ingo naso ambojimbi 12 awa gitijigari da anumba da anumbedo ingo mi Israel da orobe 12 awa kasadewa. <sup>29</sup> Edo embo ave na awa embo mando de namendi de ru de ai de mamo de edo kinapeina de ba buro da awa doadira nanemi embo ainda rora da awodo jiwae de edo wasiri natopo atari de awa itadena. Edo embo jiwae boroko embo nembogambo era awa nembogambo adi aera. <sup>30</sup> Edo embo jiwae boroko embo nembogambo ae etera awa nembogambo adera.”

## 20

### *BA BURO ARI EMBO NENEI DA KIKI*

<sup>1</sup> Iesu mi sisira, “Mamo da gitijigari da iji awa teta buro da ainda topo mi ribe jawo grape gowusira. Sipo kiambu de embo eiawa buro embomei budo uso buro da buro orase eura adi mambusira. <sup>2</sup> Mambudo embo nenei tambudo daedo umo ge sisira gano roinge ungodaya yei mina itadira awa ge sisira. Edo sisira umo ungo iji da da mina awa itadira sisira. Setiri ungo awara sisera. Setero buro topo mi setiri buro adi mambusera.

<sup>3-4</sup> “Edo waiko beo da ae atiri buro topo sekago origarori ari yei da mambudo embo nenei tepo awodo buro ae

dederigedo atero gido sisira, ‘Daedo mambuwo naso buro yei da buro ave. Awo nanemi mina inono da awodo itane.’

<sup>5</sup> “Setiri ungo mambusera. Edo waiko beo da edo waiko wareregurisira awa buro topo ari da awodo isira. <sup>6</sup> Edo ongobo de sekago origarori ari yei da mambudo embo nenei iji natopo dederigedo atero gosisira. Gido ungodu yei sisira, ‘Ro awasedo ingo einda ro ae tepo awodo atevi?’

<sup>7</sup> “Setiri ungoi sisera, ‘Embo nenei nangoda yei buro itae etera awasedo nango einda dederigedo tepo atera.’

“Setero buro topo mi mina sisira, ‘Awara ingo daedo mambuwo naso buro yei da buro ave.’

<sup>8</sup> “Edo ongobo etiri buro topo mi buro embo da gitijigari da yei sisira, ‘Buro embomei jawo seio. Bugoro ungodu mina itase. Edo buro embobo ongobo de bugera ainda mina awa giti itio. Edo amboda awa buro embo sipo kiambu de bugera ainda mina awa itio.’

<sup>9</sup> “Setiri buro da gitijigari setiri buro embo ongobo de bugusera awa totorisera. Torero ungodu iji da da mina awa ititisira. <sup>10</sup> Awasedo buro embo sipo kiambu de bugusera awa kotisera awa ungo mina nembodiba badera awasedo bugusera awarate ungo daedo iji da da mina awa burisera. <sup>11-12</sup> Edo ungodu gano awa budo tini gambari edo buro topo da yei sisera, ‘Embomei eiawa ongobo be de bugudo edo buro kiambu be etera. Edo nango awa sipo de waiko wevera janibetiri derera te imo nango de edo ungo de awa gano inono da itesa.’

<sup>13</sup> “Setero buro topo mi buro embo dakain da yei sisira, ‘Naso otao ingio. Na imo potaera te ingode gano da ge awa dada setera edo imo iji da da mina da buro adi setesa awasedo iso mina budo iso nati da mambuio. <sup>14</sup> Na embo buro adi bugera berari ainda mina da awodo itadi dipapa etena. <sup>15</sup> Na naso gano topo awasedo na ro adi adena

amone adena. Edo imo tini gambari esa ainda be mo na ewamei etena awasedo ta? ”

<sup>16</sup> Edo Iesu ge awa atae edo sisira, “Embo ave giti na ambo ambo adi setera edo embo ave amboda na ambo ambo adi setera embomei awa simba ari da awodo adena.”

*IESU USO BETARI AWA SEKAGO SISIRA*

<sup>17</sup> Edo Iesu Jerusalem kena pepeta ise uso ambojimbibudo demonda mambusira. <sup>18</sup> Edo ungo ungosuka mambuse ungodaya yei sisira, “Ingodena Jerusalem vivitera. Edo ainda mambadera ainde na Mamo da mei busu da embo isira awa ungoi budo Priest gitijigari de edo agodari da atopapotegari de da ingo da itadera. <sup>19</sup> Edo embomei omimi budo embomei Jew ae jawo Gentile da yei itadera. Edo embomei omimi dedogaedo gandubedo edo benema mi ri orega da dadera awarate iji tamonde atae ari Mamo mi betari da edo wasiri de atari da jigari sekago eradira.”

*ZEBEDEE DA MEMEI DA AI IESU DA YEI BUGUSIRA*

<sup>20</sup> Zebedee da memei da ai mi uso memei de Iesu da yei bugusira. Bugudo tumondebain isira uso dipapa awa Iesu da yei sadia.

<sup>21</sup> Edo evetu awa bugiri Iesu uso yei nganega isira, “Imo ro dipapa esi?”

Setiri evetu mi mina sisira, “Na imo gitijigadesa iji ainde naso memei etoto eiawa mei da iso ingo be da mei nei awa iso ingo anda da anumborase sasase sedo kundo bugena.”

<sup>22</sup> Setiri Iesu ungodaya yei mi mina sisira, “Ingo gae ro embo sedo gosewa. Ingo na memesi badena da awodo bevita?”

Setiri ungoi mina sisira, “Nango adera.”

<sup>23</sup> Setero Iesu mi sisira, “Ingo gebe setewa. Ingo na memesi badena da awodo badewa awarate anumba etoto awa naso ae awasedo nanemi amemi anumbadera awa sadia aera. Mamo mi anumba etoto awa sia etira awasedo amemi anumbadera awa sadira.”

<sup>24</sup> Edo ambojimbini nenei 10 mi ge awa ingido ungoi namendi namendi ga da yei tini gambari isera awasedo Iesu mi setiri ungo berari Iesu ga dada isera. <sup>25</sup> Etero Iesu mi ungodawa yei sisira, “Ingo gosewa aumo embo awa dombu okain de gitijigido era awarate ingo mana awodo gitijigari mina mina adewa. <sup>26</sup> Embo amemi embo nembodiba adi dipapa adira awa embo nenei kondade adira. <sup>27</sup> Edo embo ave ingoda gitijigari adi dipapa adira awa umo ingoda buro embo adira ainda be awa na Mamo da mei embo isena awa da awodo isena. <sup>28</sup> Na embo nei mi na kera orase bugaera te na embo berari awa kera adi bugusena. Bugudo naso betari mi embo jiwae wasiri biae da agipo embobo ewora awa wujegadira.”

*IESU DITI GUBA ARI EMBO ETIRI EWAMEI ISIRA*

<sup>29</sup> Iesu uso ambojimbini de Jericho nati awa doturero embo jiwae be mi Iesu ambo ambo isera. <sup>30</sup> Edo embo etoto diti guba egeregari awa emboro be aikambu da anumbedo atisera amimi Iesu bugudo mambari awa setero gido edo gogo dimbudo sisera, “Gitijigari David da orobe nango jo egae.”

<sup>31</sup> Setero embo mi ungo isiburisera edo ge dorase sisera te ungo sekago gogo dimbudo kiambu ae be sisira, “Gitijigari David da orobe nango jo egae.”

<sup>32</sup> Setero Iesu ainda petedo ungodawa yei sisira, “Ingo ro anase dipapa evi?”

<sup>33</sup> Setiri ungoi mina sisera, “Gitijigari nango aso sekago yei gadi sera.”

<sup>34</sup> Setero Iesu ungo jo edo gido ungodawa diti jijigiri ungoi yei sekago gido Iesu ambo ambo isera.

<sup>1</sup> Iesu uso ambojimbi de Jerusalem nati aikambu ise ungoi nati Bethphage Olive doriri tamo da ainda bugusera.

<sup>2</sup> Edo ainda bugudo Iesu umo uso ambojimbi etoto giti itari mamborase sedo sisira, “Nati nei da ounda mambudo ingo wo donkey poega de uso mei de awa digari atirari gadewa. Gido wujegedo budo naso yei da buguwo. <sup>3</sup> Edo embo amemi ro ewa awa nganega oro gido ungodu yei sewo gitijigari mi dipapa ira sewo. Sawo ungoi ingoda yei itore.”

<sup>4</sup> Ko Mamo da binga sari embo mi matu be sisira awasedo Iesu mi awodo sisira. <sup>5</sup> Mamo da binga sari embo mi sisira,

“Zion embomei awa seio gore ungodu gitijigari bugutira awa embo nembodiba awodo bugadi aera te wo donkey da mei da tamo da vitido bugadira seio gore.”

<sup>6</sup> Awasedo Iesu da ambojimbi etoto giti giti mambudo ro Iesu mi orase sisira awa berari isera. <sup>7</sup> Ungoi wo donkey de uso mei de awa budo bugusera. Edo ungodu ombari wo etoto da tamo da itero Iesu vitido wo mei tamo da anumburisira. <sup>8</sup> Edo embo jiwae be bugudo nenei ungodu ombari totedo emboro da besi isera. Edo nenei awa ri papatu divedo budo emboro da itido isera. <sup>9</sup> Edo embo nenei Iesu da dombu da Iesu soropu da embo nenei gun da awodo mambusera. Edo ungoi mambuse iaviri edo gogo dimbudo sisira,

“Nango David da orobe awa jasiga era. Embo eiawa Mamo da jawo da bugira Mamo mi umo ewamei are. Embo berari Mamo jasiga ore.”

<sup>10</sup> Edo Iesu Jerusalem nati da toriri edo nati embomei berari awa iaviri be iaviri edo sisira, “Embo eiawa averi?”

<sup>11</sup> Setero embo Iesu ambo ambo isera amimi sisira, “Emone binga sari embo Iesu ra busu Galilee edo nati Nazareth embo ra.”



*IESU TUMONDEBAIN ARI ORO DA TOTORISIRA*

<sup>12</sup> Iesu Jew embomei da tumondebain ari oro joda torido embo mina itido budo ise atisera awa ondetiri bugusera. Edo embo mi gano mina ita edo isera ainda tendeba jigido kapotegedo edo ribo rorou itari embo da anumba budo wawara isira. <sup>13</sup> Edo ungodada yei sisira, “Jiwari ewamei be mi sira Mamo mi sisira, ‘Naso mando awa embo da benunu sari yei.’ Awarate ingo mi ewo bengono embomei da meko to ira.”

<sup>14</sup> Edo Iesu umo Jew embomei da tumondebain ari oro joda atiri embo diti guba egeregari de tei ambari de mi uso yei bugero unemi etiri berari ewamei isera. <sup>15</sup> Edo priest da gitijijigegari de agodari da atopapotegari mi Iesu wasiri ewagaewa ira awa gosisera. Edo ungo kinapeina gogo dimbudo isera embo eiawa David da orobe awa jasiga ewo sero ingisera.

Ingido edo gido priest gitijijigegari de edo agodari da atopapotegari de awa tini gambari edo gido Iesu da yei sisera, “Imo ro sera awa ingesita?”

<sup>16</sup> Setero Iesu mi mina sisira, “En na ingena. Edo jiwari ewamei be mi sira ingo mi kinapeina awa jasiga orase atopapotisewa edo ingo ajigedo gaeta?”

<sup>17</sup> Sedo Iesu ungo dodo edo Jerusalem nati dodo umo mambudo Bethany nati ainda tumba de eusira.

*IESU ENGENEMBEDO JERUSALEM MAMBUSIRA*

<sup>18</sup> Iesu ainda euko sipo atae erido nati dodo sekago Jerusalem da engenemburise beji tambusira. <sup>19</sup> Edo ri betora awa emboro demonda gido gadi mambusira awarate be ae igi berari mi atisira awasedo Iesu mi ri ainda yei sekago be eurase sisira awasedo ri awa ambusira.

<sup>20</sup> Ambiri edo ambojimbi awa gido kove be isera. Edo kove be edo Iesu da yei sisera, “Rawodo edo ri eiawa burigi be garasa etiri?”

<sup>21</sup> Setero Iesu mi mina sisira, “Ingiwo. Ingo jo de Mamo gebe adewa awa ro ri einda etena da awodo ingo adewa. Edo daedo ingo doriri einda sae etewa erido ewa da woseio sae etewa awa doriri awa wosae etira. <sup>22</sup> Ingo na gebe adewa awa ro Mamo da yei sedo gadewa amone badewa.”

### *EMBOMEI IESU NGANEGA ISERA*

<sup>23</sup> Edo Iesu engenembedo Jew embomei da tumondebain ari oro da bugudo embo atopapotisra. Edo Iesu atopapotiri Priest da gitijijigegari de Jew embomei de embo nembogambo mi bugudo Iesu da yei nganega isera, “Goroba amenda mi imo wasiri eiawa esi? Edo goroba emomo amemi iso yei ititisiri?”

<sup>24</sup> Setero Iesu mi mina ungodu yei sisira, “Na ingoda yei sedo gari da itadena. Edo ingo naso yei mina sadewa awa na goroba eiawa amemi etiri budo buro eiawa edo eni awa sadena. <sup>25</sup> Edo John goroba mo amemi itiri budo embo umo mi ewamei edo isiri? Embo mi goroba amo itero burisita ko Mamo mi ititisiri?”

Setiri ungo ungosuka ge mina бага edo sisera, “Ingode ro seri? Ingode Mamo mi John da yei goroba ititisira sadera awa Iesu umo ingodenaso yei sadira ro awasedo ingo John gebe ae edo iseve sadira. <sup>26</sup> Awarate ingode embo mi John da yei goroba ititisira awodo sadera awa embo awa oju adera ko embo berari mi kotedo era John awa binga sari embo awasedo.”

<sup>27</sup> Awasedo ungoi Iesu da yei mina sisera, “Nango gaera.”

Setero Iesu mi ungodu yei sisira, “Awasedo na goroba amemi ituri wasiri eiawa edo eni awa na ingoda yei sadi aera.”

### *IESU MEMEI ETOTO DA INIA GE MI ATOPAPOTISIRA*

<sup>28</sup> Iesu mi sisira, “Inia ge eiawa kotewo. Edo memei etoto da mamu mi mei bego da yei sisira, ‘Naso mei boroko mambuio grape buro yei da buro ase.’

<sup>29</sup> “Setiri uso mei bego mi sisira, ‘Na buro ari ujo ae ena.’ Awarate amboda umo jiro nei kotedo buro yei da mambudo buro isira.

<sup>30</sup> “Edo Mamu mi mambudo uso mei ambo da yei sari da awodo sisira. Setiri mei ambo mi mina sisira awara na buro adena sisira awarate umo buro da mambae.

<sup>31</sup> “Edo mei rawa mi Mamu da dipapa awa isiri?”

Setiri embo berari mi Iesu da yei mina sisira, “Mei bego mi.”

Setero Iesu mi ungodu yei sisira, “Edo na ingoda yei eiawa sano gadewa. Tax bari embomei de edo viro emboevetu de mi Mamu da atari yei da toradera te ingo mo torevi ta ko toradi aeri? <sup>32</sup> John umo mi ewamei ari embo ingoda yei bugusira edo ingoda yei emboro ewamei da pepeta awase ujugurisira. Edo ingo John gebe ae isewa te tax bari embomei de viro emboevetu de awa umo gebe isera. Edo embomei awodo etero ingo gosisewa te ingo ingoda jiro wareregedo John gebe ae isewa.”

#### *INIA GE BURO TOPO DA JAWO DA AWA*

<sup>33</sup> Edo Iesu awa sedo sisira, “Inia da kiki nei eiawa sadena ingiwo. Embo da amimi ve jawo grape awa sokedo buro da gowusira. Edo tano itido edo grape jasari yei edo simba ari embo da gaga de didigurisira edo buro awa embomei nei mi simba orase sedo sisira. Edo sisira grape be sari ari awa be nenei awa ungo mi badera edo be nenei awa unemi badi sisira. Edo buro ainda topo awa yei awa dodo busu nei da mambusira. <sup>34</sup> Edo ainda amboda grape be awa sari etiri buro topo awa ri be awa uso tega awa badi dipapa edo uso buro embomei itiri badi mambusera.

<sup>35</sup> “Edo buro embobo awa buro da mambero edo simba ari embo amimi buro embo awa sandido nenei awa ituka

mi dedo gaedo ise nenei awa deoro betedo isera. Edo nenei awa ganuma mi doro betorase wawara edo isera.

<sup>36</sup> Awasedo buro topo mi buro ari embomei nenei jiwae ituri mambudo isera awarate ungo buro da mamboro edo buro simba ari embo mi ari da awodo edo isera.

<sup>37</sup> Awasedo ambo be amboda awa buro topo uso mei awa ititisira edo sisira ungo mi uso mei awa sapo orase sisira.

<sup>38</sup> “Awarate buro simba ari embomei mi uso mei gido ungosuka sisera, ‘Buro topo da mei re bugutira. Edo ingode uso mei doro betadira ainda amboda uso rora berari awa ingodenaso topo adira.’ <sup>39</sup> Awasedo ungoi mei awa buro ponda pigetero wosetiri edo ungoi detero bebetisira.”

<sup>40</sup> Edo Iesu awa sedo ungodada yei nganega isira. “Buro topo engenembedo mo buro simba ari embo da yei ro eiri?”

<sup>41</sup> Setiri ungoi mina sisera, “Embo bebegae awa dari betoro ainda amboda buro awa embo nei da itari simba adera. Edo ri be awa sari ari awa buro topo ga kando edo badera.”

<sup>42</sup> Setero Iesu mi ungodada yei sisira, “Ingo jiwari ewamei be ro sira awa ajigedo gaeta? Jiwari mi sira, ‘Ganuma mando itari embobo mi ujo ae isera awa tutuvi sangove da derari inge etira. Eiawa kove ari be awa Mamo mi etira.’

<sup>43</sup> “Awasedo nanemi ingoda yei sena Mamo mi ingoda anumba utu da atira awa budo embo nenei Mamo da buro edo gogo edo era ainda yei itadira. <sup>44</sup> Edo embo ave ganuma ainda tamo da duradira awa embo awa bejedo memeia adira. Edo embo ave ganuma emimi tamo da wosadira awa jasedo busu inge adira.”

<sup>45-46</sup> Edo priest gitijijigegari de Pharisee embomei de Iesu inia da ge sisira awa ingido gosisera Iesu awa ungodada jawo da ge sira awasedo ungoi Iesu sandadi dipapa isera

te ungo gosisera embo jiwae be awa Iesu awa binga sari embo awodo kotedo era awasedo oju isera.

## 22

### *INIA GE JIMBARI BONDO AWA*

<sup>1</sup> Iesu sekago inia da mi embo da yei ge sisira. <sup>2</sup> Iesu mi sisira, “Mamo da gitijigari da iji awa teta gitijigari nembodiba da amimi uso mei da jimbari bondo isira da awodo. <sup>3</sup> Edo gitijigari awa embo bugorase matu sedo gosisira awasedo uso buro embomei ainda yei bondo da sari bugorase itiri mambusera.

<sup>4</sup> “Awarate ungo bondo da purari ujo ae isera awasedo gitijigari buro embomei nei itiri mambusera embomei ainda yei edo sorase, ‘Naso bondo awa boroko sia etera edo na naso wo memei detena bondo adi edo berari awa sia etera. Jimbari bondo da puwo.’

<sup>5</sup> “Awarate embomei awawa binga sari embomei da ge awa ingaera te ungo ro era awa ise atisera. <sup>6</sup> Embo nenei ungodu buro da mambutero embo nenei ungodu ori garori ari yei da mambutero edo embo nenei awa binga sari embomei awa sandido ituka mi dedo gaedo edo detero bebetisera. <sup>7</sup> Edo gitijigari nembodiba tini gambari edo uso isoro embo itiri mambusera. Mambudo embo detero bebetisera embomei awa dorise ungodu oro mando dungetero ewusira.

<sup>8</sup> “Edo gitijigari uso buro embobo jawo setiri bugusera. Bugero ungodu yei sisira, ‘Naso jimbari bondo awa sia etera awarate embo bugorase tuturo da sega etena awa bugari ujo ae etera awasedo ingo emboro da mambuwo. <sup>9</sup> Edo ingo emboro da yima itido puma itido ise embo gadewa berari awa sega ewo bondo da purore.’ <sup>10</sup> Setiri buro embomei mambusera. Mambudo yima itido puma itido ise embo ewa de embo bebegae de gosisera awa budo

bugusera. Budo bugero edo jimbari bondo awa embo mi ato ae be isira.

<sup>11</sup> “Edo gitijigari nembodiba embo bugusera awa gadi torido embo da awa jimbari bondo da iwuga awa ae atiri gosisira. <sup>12</sup> Gido gitijigari mi uso yei nganega isira, ‘Otao imo awa jimbari bondo da iwuga awa ae etesa. Embo amemi awara setiri imo toresi?’”

<sup>13</sup> “Setiri embo awa ge mina gitijigari da yei ge da sae isira awasedo gitijigari mi uso buro embomei da sisira, ‘Tei bundedo ingo bundedo edo pigewo ponda umenga da atise ji de di vegise atare.’”

<sup>14</sup> Edo inia kiki einda amboda Iesu mi sisira, “Mamo mi embo jiwae jawo setira te embo enumba ae awa katabetira.”

*EMBO NENEI MI IESU DA YEI SEDO GARI OKAIN ITITISERA*

<sup>15</sup> Pharisee embo nenei mi Iesu ga ge sadi dipapa isera wao adi sedo mambusera. <sup>16</sup> Mambudo ungosuka ge ro sadera awa dada edo sisera. Ge sedo ungodu ambojimbi de Herod da ambojimbi de awa itero Iesu da yei bugusera. Bugudo ungoi Iesu da yei sisera, “Atopatari nango gido era imo gebe sedo esa. Imo Mamo da emboro awa edo gogowo edo atopatido esa. Embo nenei awa nembogambo edo embo nenei awa nembogambo aera awarate imo ungo oju ae awasedo imo ungo awa da awodo ewamei edo esa. <sup>17</sup> Edo nango agodari nangoda awa kera adera mo nango Rome embomei da gitijigari nembodiba da yei tax gano mo iterita mo itadi aeri? Se gore imo ro kotesi?”

<sup>18</sup> Setero Iesu ungodu kotari biae awa gido gido ungodu yei mina sisira, “Ingo ise sarago ari embomei ro awasedo ingo na wao ari dipapa evi? Ingodu tax gano awa eu gane?” <sup>19</sup> Setiri ungoi gano uso yei ititiseru. <sup>20</sup> Etero ungodu yei sisira, “Gano tamo da dombu ove ari edo jawo mo amenda ri?”

<sup>21</sup> Setiri ungoi gano awa gido sisera, “Emone gitijigari nembodiba Caesar da ove de edo uso jawo de ra.”

Setero Iesu mi ungodu yei sisira, “Ro Caesar da awa Caesar da itiwu edo ro Mamo da awa Mamo da itiwu.”

<sup>22</sup> Setiri ungo be gido jarisera edo Iesu dodo mam-busera.

<sup>23</sup> Edo iji da ainde Sadducee embo mi embo betedo awa sekago wasiri de atadi ae awa atopatido isera amimi Iesu da yei bugusera. <sup>24</sup> Bugudo Iesu da yei sisera, “Atopatari Moses mi atopapotisira embo ave kinapeina itae betadira awa embo ainde namendi da aro rori awa jimbudo namendi betari ainde kinapeina itadira awa Moses mi atopapotisira. <sup>25</sup> Boroko imo nangoda ge ingio. Nanonamendi 7 einda atima isera. Edo bego mi aro jimbusira te evetu awa kinapeina ingae. Edo mei bego awa betetiri uso namendi mi namendi da aro rori awa jimbusira awarate sekago evetu awa kinapeina ingae. <sup>26</sup> Edo namendi awa bebetisira daedo edo nanonamendi berari da awodo isera. <sup>27</sup> Edo ambo be ambo da evetu awa bebetisira awasedo betari da edo eradera ainde evetu amomo uso iu be mo averi? <sup>28</sup> Edo busu einda atise nanonamendi berari mi evetu da awa jimbusera awasedo evetu iu be mo averi?”

<sup>29</sup> Setero Iesu mi mina sisira, “Ingo jiwari ewamei be de edo Mamo da goroba de awa gae awasedo ingo ge busetewa. <sup>30</sup> Awarate embo de evetu de bebetegari awa sekago wasiri de atadera ainde awa ungo teta utu da asisi da awodo adera awasedo mana jimbadera. <sup>31</sup> Edo ge embo betari awa wasiri de sekago eradera awa kotewo. Ingo ro Mamo mi ingoda yei sisira awa ajigedo gaeta? <sup>32</sup> Mamo mi sisira, ‘Na awa Abraham da Mamo edo Isaac da Mamo edo Jacob da Mamo.’ Edo uso ge da be awa Mamo awa embo wasiri de atari da Mamo awarate Mamo awa betari da Mamo aera.”

<sup>33</sup> Setiri embo jiwae be mi uso atopatari awa gido ungo be gido jarisera.

*AGODARI RAWAWA AGODARI NEMBODIBA RI?*

<sup>34</sup> Edo Pharisee embomei Iesu mi awa setiri Sadducee embomei ge atae etero gido ungo dada isera. <sup>35</sup> Dada edo Pharisee embo agodari da atopatari embo da amimi Iesu da yei sedo gari mi itido gadi dipapa isira. <sup>36</sup> Edo Iesu da yei sedo gari ititisira, “Atopatari agodari rawawa agodari nembodiba ri?”

<sup>37</sup> Setiri Iesu mina sisira, “Imo iso jo berari mi edo jiro iso berari mi edo asisi iso mi Mamo dubo buio. <sup>38</sup> Eiawa agodari nembodiba ra. <sup>39</sup> Edo eiawa agodari nembodiba nei ra. Imo imosuka dubo buresa da awodo embo nenei dubo buio. <sup>40</sup> Edo Moses da agodari de edo binga sari embomei de mi ro atopapotisera awa agodari etoto einda orereka ise atima ira.”

*IESU KERISO AWA EMBO MO AVERI?*

<sup>41</sup> Edo amboda Pharisee embomei dada etero Iesu mi ungodu yei nganega isira, “Soregari Embo Mamo mi itari bugarase sisira awa ingo ro kotevi? Umo mo amenda orobe ri?”

<sup>42</sup> Setiri ungoi mina sisera, “Umone David da orobe ra.”

<sup>43</sup> Setero Iesu mi nganega isira, “Ro awasedo Asisi Kotopu mi David da yei jiro gari nembodiba be ititisiri edo David Keriso awa gitijigari sedo isita? <sup>44</sup> Ko David mi sisira, ‘Mamo mi naso gitijigari da yei sisira naso ingo be da anumbeio. Edo anumbedo atise iso gitopo berari awa simba ase Mamo mi sisira.’”

<sup>45</sup> Edo David awa uso gitijigari sisira mo rawodo edo Soregari Embo Mamo mi itari bugarase sisira amomo David da orobe ge siri?”

<sup>46</sup> Setiri ungo oju edo sekago ungo uso yei nganega nenei ae doturisera.



## 23

*IESU EMBO DENGORO ISIRA*

<sup>1-2</sup> Edo Iesu mi embo jiwae de edo uso ambojimbi de da yei sisira, “Agodari da atopapotegari de agodari simba edo era embo jawo Pharisee de awa Moses da goroba budo ge sedo era awasedo ungo ro awase sadera awa ewo. <sup>3</sup> Awarate ungo ro era awa gido eove ainda be awa ungo embo nenei mi ro orase sera awa ungo daedo ae era. <sup>4</sup> Ungo ungodada agodari bouga be embo nenei da saga da itido era te ungo embomei awa ungodada bouga awa kondade ae edo era.

<sup>5</sup> “Edo ungo embo mi ungo ro era awa gorase dipapa edo era awasedo ungo awodo era. Giu Mamo da ge jiwari awa ungoi kera edo digido ungodada ingo da edo beo da digido era kera memeia aera te kera nembodiba ra. Giu ungodada ombari begiti riribori. <sup>6</sup> Edo ungo embo mi ungo gorase iwuga oiedo edo tembuma era. <sup>7-8</sup> Edo ungo bondo da ta ko Jew embomei da dada ari oro da embo berari mi gadera ainda ungo anumbedo era. Edo ungo mina itido kundo ari yei da mambudo era awa embo mi ungo awa saboa edo atega orase dipapa edo era. Edo ungo tembuse embo mi ungo awa atopatari sorase dipapa edo era.

“Awarate ingo awa nanonamendi edo na awa ingoda atopatari awasedo embo nenei da yei atopatari seove. <sup>9</sup> Edo busu ainda embo nenei awa mama seove ainda be awa ingoda Mamo da awa utu da matawa atira awasedo. <sup>10</sup> Edo daedo na Soregari Embo Mamo mi itari bugarase sisira awa ingoda gitijigari da awasedo embo nenei awa gitijigari seove. <sup>11</sup> Edo embo ave ingoda teda awa embo nembodiba adi dipapa adira awa umo ingoda buro ari embo adira. <sup>12</sup> Edo embo ave umo umosuka edo embo nembodiba sadira awa Mamo mi ari embo kiambu adira.

Edo embo ave umo umosuka kiambu adira awa Mamo mi ari embo nembodiba adira.

*IESU PHARISEE EMBOBO DE AGODARI DA ATOPAPOTEGARI DE BEKUBA ISIRA*

<sup>13</sup> “Ingo agodari da atopapotegari de Pharisee embomei de ingoda kasari iji re bugadira giwo. Ingo ise sarago ari embobo ingo mi Mamo da gitijigari yei da torari emboro awa embo nenei mi tororase sedo gajedo ewa. Ingo ingosuka awa mana toradewa te embo nenei toradi eoro ingo mi gajedo ewa.

<sup>14</sup> “Ingo agodari da atopapotegari edo Pharisee embomei ingoda kasari iji awa bugadira ingo gosewa. Edo embo mi ditini ero ingo gegata riribori edo ewa awarate ijegedo bugutewa awa ingo emboevetu rorigarori awa kondade ae edo ingo ungodu mando bengono edo ewa awasedo ingoda kasari awa nembodiba be ra.

<sup>15</sup> “Ingo agodari da atopapotegari de Pharisee embomei de ingoda kasari iji awa bugadira awasedo giwo. Ingo ise sarago ari embobo ingo embo nenei mi ingoda ambojimbi orase dipapa ise gido ingo ewa sembudo busu sembudo ise embo awa eura edo ewa. Ingo embo bebegae awarate embo nei ingoda ambojimbi adira awa embo awa embo biae be adira. Awodo ise awa ingo etoto awa riawo natopo atari da mambadewa.

<sup>16</sup> “Ingo agodari da atopapotegari de Pharisee embomei de ingoda kasari iji awa asusubetira giwo. Ingo embo nenei dedegedo ewa awarate ingo awa diti guba egeregari. Ingo sedo ewa, ‘Embo ave Jew embomei da tumondebain ari oro da jawo da ro adi sadira edo amboda embo awa ari dipapa ae adira awa umo mana adira. Awarate embo ave tumondebain ari oro jo da rora mina nembogambo de atira ainda jawo da ro adi sari sadira awa adira.’ <sup>17</sup> Ingo diti guba ari edo embo bebegae. Rora tumondebain ari

oro jo da atira awa nembodiba ra ta ko tumondebain ari oro mi euri tumondebain ari oro da rovi ravi awa ewamei be ewamei edo ira awa nembodiba ri? <sup>18</sup> Ingo daedo atopatido ewa, 'Embo ave rorou itari yei da jawo da ro adi sari sadira awarate amboda embo rora awa ari ujo ae adira awa mana adira. Awarate embo ave kando rorou itari yei da ainda itira ainda jawo da ro adi setira awa adira.' <sup>19</sup> Ingo diti guba ari embomei. Rora kando awa nembodiba ta ko rorou itari yei mi euri kando awa ewamei be ewamei edo ira awa nembodiba ri? <sup>20</sup> Awasedo embo ave rorou itari yei da jawo da ro adi sadira amone sira rorou itari yei da jawo da edo kando berari tamo da atira ainda jawo da sira awa unemi adira. <sup>21-22</sup> Edo embo ave Jew embomei da tumondebain ari oro da jawo da ro adi sadira amone sira Mamo da gitijigari anumba da jawo da edo Mamo ainda anumbedo atira ainda jawo da sira amone adira.

<sup>23</sup> "Ingo agodari da atopapotegari de Pharisee embomei ingoda kasari iji re bugutira giwo. Ingo ise sarago ari embomei ingo ingoda rora be da edo indari buro da be da awa itido ewa agodari mi sira awodo awarate agodari nembogambo nenei embo da yei ewamei ewo edo embomei jo ewo edo bengono eove eiawa ingo ae ewa. Agodari memeia awa iji berari edo ewa te agodari nembodiba daedo ari ruvegeove. <sup>24</sup> Ingo gitijigari dombu ambubu. Ingoda indari tewo da someni memeia awa gido budo wawara ewa te someni nembogambo indari tewo da ainda awa gae dodo nukewa.

<sup>25</sup> "Ingo agodari da atopapotegari de Pharisee embomei de ingoda kasari iji awa bugutira awasedo giwo. Ingo ise sarago ari embomei. Ingo ingoda tewo de adego de da pon awa segedo ewa te ungodajo awa indari kumbari bengono isera amimi dongono ira. <sup>26</sup> Ingo Pharisee embomei diti guba egeregari. Ingo ingoda adego jo awa segadewa awa

adego pon awa tepo ra.

<sup>27</sup> “Ingo agodari da atopapotegari de Pharisee embomei de ingoda kasari iji awa bugutira awasedo giwo. Ingo busari embomei. Ingo awa embo gowari yei da awodo uso tamo awa gari ewamei ra te uso jo awa embo da vetu mi beda ari edo rora bebetegari jiwae atira. <sup>28</sup> Da awodo ingoda tamo de dombu de awa gari ewamei ra te ingoda jo awa biae edo kotari bebegae awodo atima ira.

<sup>29</sup> “Ingo agodari da atopapotegari de Pharisee embomei de ingoda kasari iji awa aikambu etira awasedo giwo. Ingo binga sari embomei da kokobo be awa simba edo gogo ise embo matu wasiri ewamei ise atima isera ainda kokobo be da giro edo ewa. <sup>30</sup> Awodo ise ingo sedo ewa nango nangoda mamoumbogo da iji de atae etera awa binga sari embomei awa mana dae etera sedo ewa. <sup>31</sup> Ingo awodo sewa amone ingo eiedo sise sewa nango awa embo detero bebetegurisera ainda orobe ra sewa. <sup>32</sup> Awasedo ingo ingoda mamoumbogo da wasiri bebegae tuturo isera awa ingo mi atae ewa awara.

<sup>33</sup> “Ingo awa jingabu edo jingabu da ve ra. Ingo ro edo riawo natopo atari ainda mambae doevi? <sup>34</sup> Awasedo nanemi ingoda yei sena nanemi ingoda binga sari embomei de jiro gari embomei de atopapotegari de itano bugadera te nenei awa ingo mi dawo betadera nenei awa ingo mi benema mi ri orega da dawo betadera nenei awa ingoda dada ari oro berari da bugoro vejedo dedo ondawo ijegadera. <sup>35</sup> Ingo mi ondawo ijegedo ungo mi nati nei da edo mambudo nati nei da adera. Edo embo ewagaewa embo Abel da iji de edo mambudo embo Zachariah da ingoda mamoumbogo detero bebetegurisera ainda riroga awa Mamo mi itari badewa. Edo embo Zachariah awa Jew embomei da tumondebain ari oro joda rorou itari yei edo yei ewamei be ewamei ainda soropu da ingoda

mamoumbogo dorisera amone embo Berakiah da mei ra. <sup>36</sup> Edo nanemi ingoda yei sena Mamo mi embomei eiawa dorisewa ainda tamo da riroga awa itari badewa.

<sup>37</sup> “Ingo Jerusalem nati embomei nango jo era. Ingo Mamo da binga sari embomei dedo isewa edo ingo Mamo mi embo ituri bugudo isera awa ganuma mi dedo isewa. Na ingo teta kokora mi uso piki mi memeia rou edo apuregedo simba edo ira da awodo simba ari dipapa ena te ingo naso simba awa ujo ae ewa. <sup>38</sup> Awasedo na boroko ingo doturena ingo ingosuka simba ewo. <sup>39</sup> Edo boroko tuturo edo ingo mana na gadewa te na ingoda yei sena amboda ingo na embo Mamo da jawo da bugutena awa sise atega adewa iji ainde awa ingo mi sekago na gadewa.”

## 24

### *IESU DA KASARI RO BUGUTIRA AWA SISIRA*

<sup>1</sup> Iesu Jew embomei da tumondebain ari oro dodo mambutiri uso ambojimbi mi uso yei bugudo sisera, “Puio tumondebain ari oro awa gase.” <sup>2</sup> Setero Iesu mi ungodu yei mina sisira, “Boroko ingo oro eiawa gosewa awarate na ingoda yei sena iji nei de awa tumondebain ari oro awa ganuma mi ititiseru awa duradira edo tumondebain ari oro awa bebegae adera.”

<sup>3</sup> Edo Iesu Olives doriri da anumbedo atiri uso ambojimbi mi uso yei bugudo ungo ungosuka sisera, “Se gore iji nonde tumondebain ari oro eiawa dureiri? Edo iso bugari iji edo busu da sangove awa bugadi asusubetira awa ro ijegari nango mi iji awa geri?”

<sup>4</sup> Setero Iesu mi mina sisira, “Gido gogowo ewo. Doawo embo nenei mi ingo gandubeore. <sup>5</sup> Embo jiwae mi naso jawo da bugudo sadera, ‘Namone Soregari Embo Mamo mi itari bugarase sisira awara.’ Edo ungoi awodo sedo amimi embo jiwae gandubadera. <sup>6</sup> Edo ingo mi jawi embo

aikambu embogo era ainda awa ingadewa. Edo embo yei besaun embogo era ainda binga awa ingadewa awarate oju eove. Eiawa be bugadira te busu da sangove awa ainde awa aera. <sup>7</sup> Embo busu neinde kainde da mi mina dara adera edo embo gari neinde kainde mi mina dara adera. Edo busu jiwae da baimana bugadira edo busu jiwae da didira adira. <sup>8</sup> Edo rora berari eiawa tuturo adira ainde awa embo mi memesi awa teta evetu mi kinapeina badi jarise memesi budo ira da awodo tuturo edo badera.

<sup>9</sup> “Edo daedo iji ainde embo mi imo bundadera edo imo dedo gaedo adera. Edo yei berari da awa embo mi imo ujo ae adera ko imo awa na ambo ambo ari embo awasedo. <sup>10</sup> Edo naso ambojimbi nenei jiwae mi iji ainde na dodo ungosuka bekuba mina ara ise ujo ae mina ara adera. <sup>11</sup> Edo iji ainde ge busari da binga itari embomei mi bugudo ganduboro embo jiwae mi ungo ambo ambo adera. <sup>12</sup> Embo bebegae mi wasiri bebegae oro gido embo jiwae begogo edo dubo bari awa doadera. <sup>13</sup> Awarate embo amemi busu sangove ari iji de na doae na ambo ambo ira embo awa Mamo mi soregadira. <sup>14</sup> Edo naso ambojimbi busu berari da mi embo da yei Mamo iji nonde gitijigadira awa soro gadera. Awa sadera iji ainde awa busu da sangove iji awa bugadira.”

#### **RORA BIAE BUGADIRA**

<sup>15</sup> Edo Iesu mi sisira, “Ro Mamo da binga sari embo Daniel matu be matu sisira awa ingo mi gadewa. Daniel mi sisira, ‘Embo mi rora biae awa Jew embomei da tumondebain ari oro da yei ewamei be ewamei da itoro deradira.’ (Ingo ge eiawa ajigurewa awa gido gogo ewo.) <sup>16</sup> Edo ingo Judea busu embomei wasiri eiawa bugadira gido re oju sumbudo doriri da mambuwo. <sup>17</sup> Embo ave uso mando gaga inda anumbedo atira awa mana wosedo mando joda uso rora mana badira. <sup>18</sup> Embo ave uso buro

da ira awa mana engenembedo uso tamo da ombari awa mana badira. <sup>19</sup> Edo iji ainde evetu ave gasou de edo evetu ave mei emi gaira awa okain be adira. <sup>20</sup> Edo Mamo da yei sedo giwo ga iji de o Jew embomei tumondebain ari iji de ingo sumbowase sedo giwo. <sup>21</sup> Edo wasiri bebegae busu neinde kainde berari da awa atima ira busu tuturo isira ainde edo bugudo boroko awa nembodiba ra te iji ainde wasiri bebegae awa nembodiba be nembodiba adira. Embo iji ainde atadera amimi ari wasiri biae awodo awa ungo matu gae. <sup>22</sup> Edo wasiri biae awa iji ribori adira awa embo berari betadera awarate Mamo mi uso embo awasedo matu sisira iji awa tupo kain adira sisira.

<sup>23</sup> “Edo iji ainde embo ave iso yei sadira gi Soregari Embo Mamo mi itari bugarase sisira eire sadira o Soregari Embo oure sadira awa embo awa gebe eose ainda be awa embo teta Keriso awodo inge edo ge busari binga sari embobo jiwae be bugadera. <sup>24</sup> Edo ungo bugudo ari wasiri goroba de ise edo iwata neinde kainde adera amimi awa ungo Mamo da embo jiwae be tei jumbadera. <sup>25</sup> Amboda emone bugadira te nanemi boroko ingoda yei sena.

<sup>26</sup> “Edo iji ainde embo nenei mi sadera Keriso re yei embo atae da ra sadera awa ainda mambose. Edo embo nei mi iso yei sadira Keriso re ainda unjugedo atira sadira awa embo gebe eose. <sup>27</sup> Edo Mamo da mei busu da bugudo embo isira awa bugadira awa teta birigi mi iji vitari da edo jaririgedo mambudo iji wosari da edo ira da awodo bugadira.

<sup>28</sup> “Edo tamo betari rawainda atira ainda oga mi indari dipapa edo mambadira.

### *IESU KERISO ENGENEMBEDO BUGADIRA*

<sup>29</sup> “Edo wasiri bebegae eiawa atae ari iji tupo,

‘Waiko ambudo umenga adira edo kariga janibadi ae adira edo damana utu dodo sokedo wosadera edo utu wasiri adira.’

<sup>30</sup> “Edo na Mamo da mei embo isena awa naso iwata awa utu da bugadira. Edo busu da embo berari naso iwata awa gido ji sadera. Edo na Mamo da mei bugudo embo isena awa poroga da naso goroba de edo usasa nembodiba de bugutinono embo berari mi na gadera. <sup>31</sup> Edo utu da javi nembodiba be sadira teta puin da javi da awodo. Ainde awa Mamo mi uso asisi ewagaewa itari busu berari da edo ewa berari ainda mambadera. Edo asisi ewagaewa eiawa iji vitari da edo iji wosari da edo ijari edo sawari da awodo mambudo Mamo da katabari embomei awa budo dada adera.

<sup>32</sup> “Ingoda buro da ri ve eririra awa giwo. Edo ve seka koru edo vitari ingo gadewa ga dari iji tuturo etira awa ra. <sup>33</sup> Da awodo ingo rora eiedo ijegurirari gido awa ingo gadewa naso bugari iji awa aikambu etira. <sup>34</sup> Edo rora eiawa bugutirari awa ingoda orobe nenei awa iji ainde awa wasiri de atadera. <sup>35</sup> Edo utu de busu de awa atae adira te naso ge awa matawa atadira.

### *IESU DA BUGARI IJI AWA EMBO MI GAERA*

<sup>36</sup> “Awarate naso bugari iji awa embo mi gaera. Asisi utu da awa gae edo na Mamo da mei awa gae awarate Mamo umosuka garira. <sup>37</sup> Edo na Mamo da mei busu da bugudo embo isena naso bugari awa teta ro Noah da iji de isira da awodo. <sup>38</sup> Iji ainde embo ro bugutira awa gae awasedo ungo rawodo atima isera da awodo atisera. Edo Noah nga nembodiba da totorisira iji ainda edo embobo awa indido kumbudo ise edo embo de evetu de jimbudo isera. <sup>39</sup> Edo Noah awa nga nembodiba vivitisira edo umo bojetiri embo nga pon da awa berari umo da indido ambujegurisera. Da awodo Mamo da mei bugudo embo



isira awa bugadira iji ainde ro embo mi adi dipapa era awa ungoi ise atadera. <sup>40</sup> Edo iji ainde embo etoto buro da buro ise atadera edo nanemi da awa burise da awa doadena. <sup>41</sup> Edo evetu etoto indari sia ise atadera edo da awa nanemi burise da awa doadena.

<sup>42</sup> Edo ingo ingoda gitijigari iji nonde bugadira awa ingo gae awasedo gido gogo ewo. <sup>43</sup> Embo mando topo awa bengono embo iji nonde bugadira awa gido awa embo awa ewae mando simba edo gogowo ise atadira bengono embo awa torurase. <sup>44</sup> Awasedo ingo iji berari sia ewo ainda be awa ingo na Mamo da mei bugudo embo isira awa boroko bugadi aera awodo kotadewa te iji ainde awa na bugadena.

*BURO ARI EMBOBO EWAMEI DE BIAE DE AWA*

<sup>45</sup> “Embo ave awa saboa edo jiro gari buro embo ri? Mando topo da amimi uso buro embo da yei uso buro embo nenei awa simba arase sisira. Edo embo awa sipo de ongobo de ungodu indari sia adira awa embo awa saboa edo buro ari embo ra. <sup>46</sup> Edo mando topo awa engenembae etira edo buro embo awa awodo ae etira awa buro embo awa jo iaviri ae etira. <sup>47</sup> Edo na ingoda yei sena mando topo awodo gido awa buro embo awa sari uso busu de edo uso rora berari de awa simba ae etira. <sup>48</sup> Awarate buro embo awa biae awa umo kotae etira naso gitijigari da bugari iji awa asusubae ra. <sup>49</sup> Awodo kotedo umo buro embo nenei awa dedo umo embo umo okain iji berari indido era ainde indido kumbudo ae etira. <sup>50</sup> Edo buro embo awa uso gitijigari iji nonde bugadira awa kotae adira edo iji ainde awa uso gitijigari awa bugadira. <sup>51</sup> Edo gitijigari bugudo buro embo ainda riroga itae etira edo itari ise sarago ari embomei deda atae etira. Edo ainda daedo itido unemi ungo berari da riroga itari ungoi ji sise di vegise atadera.”

<sup>1</sup> Iesu mi sisira, “Mamo da gitijigari iji awa eiedo ra. Meigagara ademei 10 ungodu diti usasa ari rora budo jimbari embo tambadi mambusera. <sup>2</sup> Meigagara 5 awa kotari de ra te meigagara nenei 5 awa kotari ae. <sup>3</sup> Edo meigagara kotari egeregae awa ungodu diti usasa ari rora awa burisera te ainda goriwo da ngamo awa bae. <sup>4</sup> Edo meigagara kotari de awa ungodu diti usasa ari rora burisera edo daedo goriwo dangamo burisera. <sup>5</sup> Edo jimbari embo awa burigi bugae etiri gido memeigagara ademei awa diti bouga etiri gido pasido ewo isera.

<sup>6</sup> “Edo tumba soropu da embo da amimi minonu sisira, ‘Jimbari embo bugutira. Puwo umo tambave.’

<sup>7</sup> “Setiri meigagara berari erido ungodu diti usasa ari rora jigeru eririsira edo gaisera. <sup>8</sup> Edo meigagara ademei kotari atae amimi meigagara kotari de ainda sisera, ‘Nango ingoda goriwo da ngamo awa kiambu iti gave ko nangoda diti usasa ari rora awa ambadi aikambu ira.’

<sup>9</sup> “Setero meigagara kotari de mi mina ungodu yei sisera, ‘Awodo aera nangoda goriwo da ngamo awa ingodena berari einde inono aera awasedo ingo mina itido kundo ari oro kire da mambudo ingoda goriwo da ngamo mina itido kumbuwo.

<sup>10</sup> “Awasedo meigagara kotari egeregae awa goriwo da ngamo mina itido badi mambusera. Mambero jimbari embo seka bugusira. Edo meigagara ademei 5 sia isera awa jimbari embo seka de jimbari bondo da mambusera. Etero mangiro gajisira.

<sup>11</sup> “Amboda ademei nenei 5 bugudu sisera, ‘Embo nem-bodiba mangiro pirigegae nango torore.’

<sup>12</sup> “Setero jimbari embo seka mi mina sisira, ‘Na ingo gaera.’”

<sup>13</sup> Edo Iesu mi inia da kiki awa atae edo sisira, “Iji nonde na bugadena awa ingo gae awasedo gido gogowo ewo.”

*BURO EMBO TAMONDE DA INIA DA KIKI*

<sup>14</sup> Iesu mi sisira, “Mamo da gitijigari iji awa eiedo ra. Embo nembodiba awa esega busu nei da adi sia isira. Sia edo setiri uso buro ari embomei bugusera. Bugero uso busu de uso mando de uso rora berari de awa simba orase sisira. <sup>15</sup> Edo daedo uso buro embomei da yei gano itido uso jawo da buro orase ititisira nei da awa K5,000 edo nei da awa K2,000 edo nei da awa K1,000. Edo buro ari embomei einda jiro gari awa neinde kainde ra awasedo buro embomei berari tamonde einda gano ajigari da awodo itae ra. Edo gano awa itido embo nembodiba awa mambusira. <sup>16</sup> Edo buro embo gano K5,000 burisira awa burigi be mambudo gano awa jingama edo rora mina itido kundo isira. Awodo edo sekago tamo da K5,000 nei burisira. <sup>17</sup> Edo da awodo buro embo nei K2,000 burisira awa gano awa jingama edo rora mina itido kundo isira edo sekago K2,000 nei tamo da burisira. <sup>18</sup> Awarate buro embo K1,000 burisira awa mambudo uro ngambedo uso gitijigari da gano awa gousira.

<sup>19</sup> “Edo amboda iji ribori be atae etiri embo nembodiba engenemburisira. Engenembedo uso buro embomei da yei gano rawodo jingama iseri awa nganega isira. <sup>20</sup> Edo buro embo ave K5,000 burisira awa K5,000 nei budo ainda bugusira. Budo bugudo sisira, ‘Gitijigari imo naso yei K5,000 ititisesa edo na K5,000 nei betena eire.’

<sup>21</sup> “Setiri edo gitijigari mi mina sisira, ‘Naso tumonda ari edo buro embo ewamei imo buro ewamei be etesa. Edo imo gano kiambu eiawa edo gogo edo jingama etesa awasedo nanemi iso yei gano nembodiba itano jingama adesa. Edo torio edo nangae atise dubo ewamei ase.

<sup>22</sup> “Edo buro embo nei K2,000 burisira awa torido sisira, ‘Gitijigari imo naso yei K2,000 ititisesa te gi K2,000 nei eire.’

<sup>23</sup> “Setiri uso gitijigari mi uso yei sisira, ‘Tumonda ari edo buro embo ewamei imo buro ewamei be etesa. Buro awodo edo awa gano kiambu eiawa jingama edo gogowo etesa awasedo nanemi iso yei gano nembodiba itano jingama adesa. Edo torio nangae atise dubo ewamei ase.’

<sup>24</sup> “Edo buro embo K1,000 burisira awa torido sisira, ‘Gitijigari na gari imo awa embo okain be. Edo embo nenei iso buro era awasedo imo buro da uredo govedo aera te imo indari jiwae budo esa. <sup>25</sup> Edo na awa oju edo mambudo iso gano awa busu da govedo unjugurana. Gio iso gano eire kumbuio.’

<sup>26</sup> “Setiri gitijigari mi mina sisira, ‘Imo awa embo biae edo begogo embo ra. Edo imo na uredo govedo ae edo ena te indari jiwae budo ena awa imo garira awa imo ro edo naso gano awa atari oro da itae mo etesi? <sup>27</sup> Imo ainda iteso awa na engenembedo bugudo naso gano berari budo edo nei kiambu tamo da banesae etesi?

<sup>28</sup> “ ‘Awasedo embo ainda gano awa ingo da kumbudo embo K10,000 burisira embo ainda itio ainda be awa embo ave rora jiwae de awa rora nenei jiwae badira. <sup>29</sup> Awarate embo ave rora enumba ae de awa rora uso yei dodo soubadera. <sup>30</sup> Edo buro embo biae eiawa budo pigewo ponda umenga da atise ji de di gambuse atare.’ ”

#### **KASARI AMBO BE AMBO AWA**

<sup>31</sup> Iesu mi sisira, “Na Mamo da mei bugudo embo isena awa gitijigadi bugadena awa asisi ewagaewa berari awa daga bugadera. Umo bugudo uso anumba parara de ainda anumbadira. <sup>32</sup> Ainda anumbedo sari busu berari da embo awa uso yei dada adera. Dada oro gitijigari mi embo katabadira teta wo sheep simba ari embo mi wo sheep de goat de ewoga ewoga edo ira da awodo. <sup>33</sup> Awodo edo unemi embo wo sheep inge awa budo uso ingo be da itido edo embo wo goat inge awa budo uso ingo anda da itadira.

<sup>34</sup> “Edo gitijigari mi embo uso ingo be da ainda sadira, ‘Ingo awa naso Mama mi ewamei etira awasedo puwo. Puwo Mamo da gitijigari yei da atari ewamei tuturo ase Mamo mi imo awa sedo sia isira awodo. <sup>35</sup> Edo na beji tambuteono ingo mi na indari itido isewa. Edo na sasaka ujo tambuteono ingo mi na sasaka itido isewa. Edo na bugudo isena edo ingo na matu gaera te ingo embo topo awodo edo na atega edo isewa. <sup>36</sup> Edo naso bosini atae adi aikambu euri ingo mi na bosini nenei itido isewa. Edo na karu eono ingo mi na simba edo isewa. Edo na bundari oro da atono ingo mi na esega edo isewa.’

<sup>37</sup> “Sari Mamo da embo mi uso yei mina sadera, ‘Gitijigari nanjigo imo beji tambuteoso nango gido indari itido iseri? Edo nanjigo imo umu ujo mi biae eoso gido umu itido iseri? <sup>38</sup> Edo nango imo nanjigo gido edo embo topo awodo atega edo iseri? Edo nanjigo iso bosini atae adi aikambu euri gido bosini nenei itido iseri? <sup>39</sup> Edo nanjigo imo karu eoso imo simba edo iseri? Edo nanjigo imo bundari oro da atoso imo esega edo iseri?’

<sup>40</sup> “Awodo soro gitijigari mi mina ungodu yei sadira, ‘Na gebe sena giwo. Ingo naso ambojimbi kiambu be da yei wasiri eiedo edo isewa amone naso yei da edo isewa.’

<sup>41</sup> “Awodo sedo gitijigari mi embo uso ingo anda da ainda sadira, ‘Ingo embo bebegae. Edo Mamo mana ingo ewamei adira awasedo na dodo mambuwo. Mamo mi Satan de uso asisi bebegae de awasedo riawo matawa atari sia isira ainda mambuwo. <sup>42</sup> Na beji tambuteono ingo naso yei indari itari ujo ae edo isewa. Na umu ujo tambuteono ingo na umu itae edo isewa. <sup>43</sup> Ingo na gaera te ingo na atega ae edo isewa. Naso bosini atae adi aikambu isira te ingo naso yei bosini seka itari ujo ae edo isewa. Na karu edo isena te ingo na simba ae edo isewa. Na bundari oro da atima isena te ingo na esega ae edo isewa.’

<sup>44</sup> “Sari ungoi mina sadera, ‘Gitijigari nanjigo imo beji de edo sasaka ujo mi biae eoso edo nango imo gae edo iso bosini atae adi aikambu euri edo karu eoso edo bundari oro da atoso imo gido kondade ae edo iseri?’

<sup>45</sup> “Awodo soro gitijigari mi mina ungodu yei sadira, ‘Na gebe sena awasedo ingiwo. Iji ainde ingo naso ambojimbi kiambu be awa kondade ari ujo ae edo isewa amone ingo na kondade ae edo isewa.’

<sup>46</sup> “Awasedo embomei eiawa riawo matawa ewuse atira ainda mambadera te Mamo da embomei awa wasiri natopo atari ainda mambadera.”

## 26

### *IESU DADI SIA ISERA*

<sup>1</sup> Iesu atopatido atae edo uso ambojimbi da yei sisira, “Iji etoto atae ari Jew embomei da jarusegari bondo da iji bugadira ingo gosewa. <sup>2</sup> Iji ainde embo mi na Mamo da mei embo isena awa ungo mi na awa embo da ingo da itadera. Itido ungoi orega itido benema mi dadera.”

<sup>3</sup> Edo priest gitijijigegari de Jew embo nembogambo de priest nembodiba jawo Caiaphas de Caiaphas da mando da dada isera. <sup>4</sup> Ungo da edo Iesu gae unjugari da budo doro betarase ainda kiki dirisera. <sup>5</sup> Edo ungoi sisera, “Ingode bondo iji de adera awa embo tini gambari edo embogo adera awasedo iji ainde awa mana adera.”

### *IESU SIMON ESEGA ISIRA*

<sup>6</sup> Iesu Bethany nati da bugudo Simon karu leprosy bari embo awa ewamei isira ainda mando da mambusira. <sup>7</sup> Edo Iesu anumbedo indari indise atiri evetu da mi utingi kiambu ganuma mi ari awa joino muno ewamei de mi beda ari uso mina nembodiba awa budo bugusira. Bugudo totorisira. Torido utingi kiambu be awa bejedo awa Iesu da beo da jojisira.

<sup>8</sup> Edo Iesu da ambojimbi evetu mi ro isira awa gido ungo tini gambari edo sisera, “Evetu ro awasedo eiedo etiri?  
<sup>9</sup> Ko joino oiawa ori edo gano nembodiba bae etira. Edo gano bae etira awa embo rora ae embomei da itae etira.”

<sup>10</sup> Edo Iesu ungo ro sera awa gido ungodu yei sisira, “Ingo ro awasedo evetu einda yei kotari bebegae evi? Evetu eiawa ro etira awa ewamei be etira. <sup>11</sup> Edo embo rora ae embomei awa iji berari ingode daedo atadera awarate na awa ingode einda iji berari atadi aera. <sup>12</sup> Edo evetu eiawa joino naso tamo da jojetira awa naso tamo gowari da sia etira. <sup>13</sup> Mamo mi evetu eiawa mana ruvegadira. Busu yei rawainda Mamo da binga ewamei sadera ainde embo berari mi evetu emimi etira awa ingadera.”

#### *JUDAS KOTARI BIAE KOTISIRA*

<sup>14</sup> Judas Iscariot awa Iesu da ambojimbi 12 da teda amimi priest gitijijigegari da yei mambudo sisira, “Na Iesu ingoda ingo da itano ingo naso yei ro itadevi?” <sup>15</sup> Setiri ungoi K25 uso yei ititiseru. <sup>16</sup> Edo itero Judas iji ewamei budo Iesu indiga sadi simba isira.

#### *IESU USO AMBOJIMBI DE JARUSEGARI BONDO INDISIRA*

<sup>17</sup> Bondo da iji tuturo da ungo ambe indisera ambe bajari siwo jawo yeast ae ainde Iesu uso ambojimbi mi bugudo uso yei nganega isera, “Yei rawainda jarusegari bondo sia oro imo indadi dipapa esi?”

<sup>18</sup> Setero Iesu mi mina sisira, “Ingo nati da joda torido embo da tambadewa ainde sewo atopatari mi setira naso iji bugira awasedo na naso ambojimbi de jarusegari bondo awa iso mando da indadana sewo.” <sup>19</sup> Setiri Iesu uso ambojimbi unemi ro sisira awa edo jarusegari bondo awa sia isera.

<sup>20</sup> Edo ongobo etiri Iesu uso ambojimbi 12 de indari indadi anumberiseru. <sup>21</sup> Edo ungoi indari indise Iesu mi

sisira, “Na ingoda yei sena ingoda teda da amimi na indiga sadira.”

<sup>22</sup> Setiri uso ambojimbi dubo vevera edo dada uso yei sisera, “Gitijigari nanemi imo indiga senita?”

<sup>23</sup> Setero Iesu mi mina sisira, “Embo ave nangae indari dada betari embo amimi na indiga sadira. <sup>24</sup> Jiwari mi sira da awodo Mamo da mei bugudo embo isira awa betadira te embo na indiga sadira embo ainda yei awa biae be biae ra. Edo embo ainda ai mi umo kumbae doae etira awa uso yei awa ewamei ae etira.”

<sup>25</sup> Edo Iesu awodo setiri Judas Iesu indiga sadira embo amimi Iesu da yei nganega isira, “Awodo enita ko awodo adi aeri?”

Setiri Iesu mi mina sisira, “Gebe imo awa awodo adesa embo awa ra.”

<sup>26</sup> Edo ungo indari indise atero Iesu ambe budo Mamo da yei ategari sedo ngaugedo uso ambojimbi da yei memeia ititisira. Edo ititise ungodu yei sisira, “Emone naso tamo. Kumbudo indiwo.”

<sup>27-28</sup> Awodo sedo aga kumbudo Mamo da yei ategari sedo ungodu yei ititise sisira, “Emone naso ororo amimi etiri Mamo da adi sari awa be etira. Nanemi naso ororo awa jojano Mamo mi embo jiwae da buria kotembedo doadira. <sup>29</sup> Edo na ingoda yei sena na ingode daedo ribe grape da ngamo indena awarate na mana ingode daedo sekago indadena boroko edo mambudo iji na ingode wine seka awa naso Mama da gitijigari yei da ingode indadena.”

<sup>30</sup> Edo awodo sedo ungoi jasiga ari ya awa sise mando dodo wosedo Olives doriri da mambusera.

### *IESU USO AMBOJIMBI DA YEI GE SISIRA*

<sup>31</sup> Edo ungo doriri da vitido Iesu ambojimbi da yei sisira, “Boroko tumba de ingo berari sumbuse na nasuka doadewa edo ro jiwari da sisira awa be adira. Edo jiwari mi sira,



‘Mamo mi wo sheep simba ari embo dadira ainde wo sheep awa sisikakain adera.’

<sup>32</sup> Awarate na betadena ainda amboda Mamo mi na jigari wasiri de sekago erido na ingoda giti da Galilee busu da mambadena.”

<sup>33</sup> Edo Iesu awodo setiri Peter mi uso yei sisira, “Berari emimi imo doadera te na mana imo doadena.”

<sup>34</sup> Awodo setiri Iesu mi Peter da yei sisira, “Boroko tumba de kokora egoro sae atirari imo na iji tamonde imo na gae sadesa.”

<sup>35</sup> Setiri Peter mi mina sisira, “Na ingae betadena te na mana imo gae mana sadena.” Edo Peter awodo setiri ambojimbi berari sari da awodo berari sisera.

#### *IESU GETHSEMANE AINDA MAMO DA YEI GE SISIRA*

<sup>36</sup> Edo yei awa dodo Iesu uso ambojimbi de yei jawo Gethsemane ainda mambusera. Ainda mambudo Iesu mi ungodaya yei sisira, “Na ounda Mamo gada ge sadi mambutinono ingo einda anumbedo atiwo.” <sup>37</sup> Edo Iesu Peter de Zebedee da memei etoto de kundo mambusera. <sup>38</sup> Edo dubo vevera tambudo ungodaya yei sisira, “Naso dubo vevera nembodiba mi na dadi aikambu ira awasedo einda nangae atise na kondade ewo.”

<sup>39</sup> Awodo sedo Iesu kiambu yarago ise baingo dederi edo dombu mi busu da gaedo edo Mamo da yei sisira, “Naso Mamo iso dipapa mi naso memesi eiawa kumbuio awarate imo ujo ae edo re doio. Edo naso dipapa awa eose ta iso dipapa mi awa eio.”

<sup>40</sup> Edo Iesu awodo sedo umo sekago uso ambojimbi da yei engenemburisira awarate ungo awa ewo ise atisera. Edo ungo gido Peter da yei sisira, “Ro awasedo ingo tamonde nangae tepo iji tupo simba edo gae evi? <sup>41</sup> Simba edo gogo ise Mamo da yei ge sewo. Awodo adewa amimi bawari nembodiba ingoda yei bugadira awa ingo mana

duradewa. Ingo ingoda jo berari mi ro ewamei awa adi dipapa ewa te ingoda tamo awa goroba ae ira.”

<sup>42</sup> Edo Iesu sekago kiambu yarago ise Mamo da yei sisira, “Mamo naso yei memesi eiawa bae etesita awarate imo ro adi dipapa esa awa eio.”

<sup>43</sup> Edo Iesu awodo sedo sekago engenembedo ambojimbi da yei bugusira te ungo ewo ise atisera. Ungo erido atari awa inono ae edo gido.

<sup>44</sup> Edo Iesu ungo sekago dodo sekago Mamo da yei sari da awodo sisira. <sup>45</sup> Sedo engenembedo uso ambojimbi da yei bugusira edo ungodawa yei sisira, “Ingo jango indise ewo ise atewa? Giwo na Mamo da mei embo isena awa embo mi budo embo bebegae da ingo da itari iji awa bugira. <sup>46</sup> Eriwo edo ingode mambore edo giwo embo na indiga sira embo awa bugutira.”

#### *UNGOI IESU BUNDISERA*

<sup>47</sup> Edo Iesu ge sise atiri Judas ambojimbi 12 da teda amimi embo jiwae be deda kokoro de kasiwo deda kundo bugusera. Edo priest gitijijigegari de edo Jew embobo embo nembogambo mi setero gido bugusera. <sup>48</sup> Edo Judas indiga sari embo mi matu embo da yei sisira, “Embo nanemi sandido muno adena embo amone ingo dipapa ewa embo ra awasedo bundewo.”

<sup>49</sup> Edo Judas bugudo dambuderari Iesu da yei da mambudo Iesu muno ise sisira, “Atopatari na imo atega ena.”

<sup>50</sup> Setiri Iesu mi uso yei sisira, “Otao imo ro adi bugesi awa eio.”

Setiri ungoi bugudo Iesu sandisera. <sup>51</sup> Edo ambojimbi da mi uso kasiwo gorugedo budo priest da gitijigari da buro ari embo ainda dengoro awa diugurisira.

<sup>52</sup> Etiri Iesu mi uso yei sisira, “Embo ave kasiwo mi embogo adira awa kasiwo mi doro betadira awasedo iso kasiwo awa sekago uso atari yei da itio. <sup>53</sup> Edo eiawa

kotewo. Na dipapa adena awa na naso Mamo da yei kondade dipapa adena sedo gadena. Edo uso yei sedo gano unemi uso asisi ewagaewa ajigari nembodiba be itari bugudo na kondade adera. <sup>54</sup> Awarate na awodo adena awa ro jiwari mi be arase sisira awa be adi aera.”

<sup>55</sup> Edo Iesu ge awa sedo wareregedo embo da yei sisira, “Ingo na awa teta bengono embo oju sumbudo mambari badi ingoda kokoro de kasiwo deda na badi bugevi? Iji jiwae be na Jew embomei tumondebain ari mando da anumbedo atise atopatido isena te ingo na bundae. <sup>56</sup> Edo rora berari eiawa be bugiri ro Mamo da binga sari embo mi jiwari ewamei be joda jiwusira awa be isira.”

Edo Iesu awodo setiri ambojimbi berari umo dodo sumbudo mambusera.

#### *UNGOI IESU BUDO CAIAPHAS DA MANDO DA MAMBUSERA*

<sup>57</sup> Edo embo Iesu bundisera amimi Iesu budo Caiaphas embo nembodiba priest da gitijigari da mando da budo mambusera ainda agodari da atopapotegari de Jew embo nembogambo dada edo atisera.

<sup>58</sup> Edo Peter Iesu ambo ambo ise ambo da bugudo Caiaphas da ara da bugusira. Edo Peter ainda bugudo mando simba ari embomei deda anumburisira ainda be awa Peter umo ro aderi awa gari dipapa isira awasedo.

<sup>59</sup> Edo priest gitijigegari de edo Jew embo nembogambo berari de awa Iesu bekuba edo biae da tambudo Iesu dadi dipapa isera. <sup>60</sup> Edo embo jiwae bugudo Iesu da jawo da ge busedo isera awarate Iesu buria nei ro ae awasedo ungo Iesu bekuba ari sago ae isera. <sup>61</sup> Edo ambo be ambo da embo etoto mi bugudo sisera, “Embo emimi sisira nanemi Mamo da tumondebain ari oro eiawa arasegedo edo iji tamonde de sekago jigano eradira sisira.”

<sup>62</sup> Setero priest gitijigari nembodiba mi erido Iesu da yei nganega isira, “Imo bekuba era ainda mina ro sesi.”

<sup>63</sup> Setiri Iesu mina ro sae isira.

Edo sekago priest gitijigari mi Iesu da yei sisira, “Mamo wasiri de atima ira ainda jawo da gebe seio. Imo Soregari Embo Mamo mi itari bugarase sisira edo Mamo da mei ta mo?”

<sup>64</sup> Setiri Iesu mi mina sisira, “Imo gebe setesa edo na ingo berari da yei sena amboda na Mamo da mei embo isira awa Mamo goroba jiwae de da ingo be da anumbedo atinono gadewa. Edo amboda poroga da bugutirari ingo mi daedo gadewa.”

<sup>65</sup> Setiri priest gitijigari nembodiba mi tini gambari edo uso ombari kerise sisira, “Umo ge biae Mamo da jawo da setira awasedo ingode mana bekuba embo nenei soro toradera. Edo ingo boroko uso ge biae awa ingewa. Ingo ro kotevi?”

<sup>66</sup> Setiri embo berari mi mina sisera, “Umo buria etira awasedo umo betadira.”

<sup>67</sup> Edo ungoi awodo sedo uso dombu da kosiwa edo Iesu dorisera. <sup>68</sup> Edo embo umo dorisera amimi Iesu gandubedo sisera, “Imo sesa imo awa Keriso awasedo embo amemi imo detiri awa se gore.”

#### *PETER IESU GAE SISIRA*

<sup>69</sup> Edo Peter awa mando demonda anumbedo atiri buro ari gagara da amimi bugudo Peter da yei sisira, “Imo awa Iesu Galilee busu embo ainda ambojimbi ra.”

<sup>70</sup> Setiri Peter embo berari da jo da sisira, “Imo ge ro sesa awa na gaera.” Sedo Peter wosedo ara be da awodo wowosisira.

<sup>71</sup> Edo buro ari gagara nei mi Peter gido embo atisera ainda sisira, “Umone Iesu Nazareth nati embo da ambojimbi ra.”

<sup>72</sup> Setiri Peter mi sisira, “Na gebe sena na embo awa na gaera.”

<sup>73</sup> Edo iji tupo embo derido atisera amimi Peter da yei bugudo sisera, “Nango gosera imo awa Iesu da ambojimbira aindabe awa iso ge de Iesu da ge awa da awara.”

<sup>74</sup> Setero Peter mi sisira, “Na ge busae ra. Na gebe sena. Edo na ge busadena awa Mamo mi na dari betadena. Edo na embo awa na gaera.”

<sup>75</sup> Edo Peter awa siri kokora egoro sisira. Edo kokora egoro setiri Peter Iesu mi ro sisira awa kotisira. Edo Iesu mi sisira, “Kokora egoro sae giti da imo iji tamonde na gae sadesa.” Sisira awa Peter kotedo arapa da bugudo dubo vevera mi biae edo ji sisira.

## 27

### *UNGOI IESU BUDO PILATE DA YEI MAMBUSERA*

<sup>1</sup> Sipo be sipo de priest gitijijigegari de Jew embo nembogambo de mi Iesu dadi ge dada sisera. <sup>2</sup> Edo ungoi Iesu da ingo awa dada bundedo budo Rome embomei da gitijigari Pilate da yei mambusera edo ungoi Iesu Pilate da yei ititiser.

### *JUDAS BEBETISIRA*

<sup>3</sup> Edo indiga sari embo Judas umo Iesu doro betarase era awa gido umo jiro wareregurisira. Edo jiro wareregedo K25 awa budo priest gitijijigegari de Jew embo nembogambo da yei mambudo Judas gano awa ungodaye ititiser. <sup>4</sup> Itido sisira, “Na buria etena aindabe awa na embo wasiri biae ae embo awa indiga setena edo ingo mi dawo betadira.”

Setiri ungoi mina sisera, “Amone nangoda buria ae ra. Amone iso buria ra.”

<sup>5</sup> Setero Judas gano awa Jew embomei da tumondebain ari oro joda warawara edo pon da mambudo dubo da esi mi kikivi edo digidobebetisira.

<sup>6</sup> Edo Judas awodo etiri priest gitijijigegari gano awa budo ungosuka ge mina sara isera. Edo sisera, “Gano emone embo doro betarase mina itera. Edo ingodenaso agodari mi sira awa gano awa mana Jew embomei da tumondebain ari oro da gano de dada adira.” <sup>7</sup> Edo ungoi ge mina sara edo ungoi gano amimi embo mi ou edo isira ainda busu mina itido isera. <sup>8</sup> Mina itido etero busu awa aumo embomei da embo gowari yei isira awasedo busu ainda jawo awa ororo busu. <sup>9-10</sup> Edo wasiri awa atae etiri ro binga itari embo Jeremiah mi sisira awa be isira. Edo Jeremiah mi sisira, “Israel embomei nenei mi gano K25 buro ari embo da tega awa budo embo mi ou edo ira ainda busu mina itido badera. Eiawa Mamo mi nanemi anase sisira.”

#### *PILATE IESU NGANEGA ISIRA*

<sup>11</sup> Edo Iesu Rome embomei da gitijigari da diti da derido atiri edo gitijigari mi Iesu nganega isira, “Imo mo Jew embomei da gitijigari nembodiba ta?”

Setiri Iesu mi mina sisira, “Gebe setesa.”

<sup>12-13</sup> Edo priest gitijijigegari de Jew embo nembogambo de mi Iesu bekuba isera te Iesu mina ro sae awasedo Pilate mi Iesu da yei sisira, “Imo ge jiwae sedo bekuba era mo gosesita? Edo ro edo mina sae esi?” <sup>14</sup> Edo Iesu ungodu bekuba isera ainda mina ro sae isira awa gido Pilate kove be isira.

#### *EMBOMEI MI IESU BETARASE DIPAPA ISERA*

<sup>15</sup> Gaeko jaige da jarusegari bondo iji de bundari embo ave awa embo mi Rome embomei da gitijigari mi wujegarase dipapa edo isera awa wujegedo isira. <sup>16</sup> Edo iji ainde awa bundari embo jawo Barabbas awa bundari oro

da atima isira. <sup>17</sup> Edo embo jiwae be dada etero Pilate mi ungodada yei sedo gosisira, “Embo ave awa wujegeni Barabbas awa wujegadeni ta ko Iesu embo mi sedo era Keriso awa wujegeni? <sup>18</sup> Edo umo gosisira embomei awa Iesu ujo ae edo isera awasedo ungoi Iesu awa Pilate uso ingo da ititiserawo awa umo gosisira.

<sup>19</sup> Edo Pilate awa uso kasari anumba da atiri uso aro ge itiri bugusira edo aro mi sisira, “Embo amone embo ewamei awasedo doio ainda be awa tumba de na eturo da embo awa getena edo uso yei mina biae betena.”

<sup>20</sup> Awarate priest gitijijigegari de Jew embo nem-bogambo mi ro orase sisera awasedo embo jiwae be mi Pilate da yei Barabbas awa wujegurise edo Iesu awa betarase dipapa isera.

<sup>21</sup> Edo Rome embomei da gitijigari mi ungodada yei sek-ago nganega isira, “Embo etoto einda da rawa wujeganase dipapa evi?”

Setiri ungoi sisera, “Barabbas awa wujege.”

<sup>22</sup> Setero Pilate ungodada yei nganega isira, “Na Barabbas wujegadena edo Iesu Keriso sedo era mo ro eni?”

Setiri ungoi mina sisera, “Benema mi orega da de betare.”

<sup>23</sup> Setero Pilate ungodada yei nganega isira, “Edo buria ro etiri?”

Setiri ungoi berari gogo dimbudo sisera, “Benema mi orega da de betare.”

<sup>24</sup> Setero edo Pilate embo uso ge sekago ingadi ae awa gido gosisira awa embo mi embogo tuturo adera awa gosisira. Awasedo Pilate umo budo edo uso ingo awa embo berari da diti da segise ungodada yei sisira, “Ingo mi mana embo einda betari awa naso yei bekuba adewa. Ingo ingosuka awa uso betari da riroga badewa.”

<sup>25</sup> Setiri embo berari mi sisera, “Umo betari nango nangoda orobe de mi uso betari da riroga awa badera.”

<sup>26</sup> Setero Pilate Barabbas awa wujegurisira. Edo Pilate mi setiri ungoi Iesu vejedo edo Iesu awa embo da yei ititisira benema mi orega da doru betarase.

*ISORO EMBOMEI MI IESU GANDUBURISIRA*

<sup>27</sup> Edo Pilate da isoro embomei mi Iesu budo Rome embomei da gitijigari da oro da torido edo embo berari mi Iesu jiroka isera. <sup>28</sup> Edo ungoi Iesu da ombari totigedo edo Iesu awa ombari kokoi ribori awa itero ombusira.

<sup>29</sup> Edo ungoi bebe mi gobe edo Iesu da beo da itero asugurisira. Edo Iesu da ingo be da ituka itero jigiri baingo dederi edo iro jirise ganduburise ungoi sisera, “Jew embomei da gitijigari nembodiba iji be ribori be atare.”

<sup>30</sup> Sedo ungoi uso tamo da kosiwa edo ituka budo umo beo da dorisera. <sup>31</sup> Edo ungo Iesu dedo gandubedo atae edo ungoi ombari kokoi awa totigedo uso ombari awa sekago itero ombusira. Edo ungoi Iesu budo benema mi orega da doru betarase budo mambusera.

*UNGOI IESU BENEMA MI OREGA DA DORISERA*

<sup>32</sup> Edo ungo mambuteriko Cyrene nati embo jawo Simon awa tambusera. Tambudo setero Iesu da orega awa ango isira. <sup>33</sup> Etiri mambudo ungoi yei jawo Golgotha ainda be awa beo agatu da yei ainda bugusera. <sup>34</sup> Edo ungoi ri be jawo grape da ngamo awa rora muti tokaka de dada edo Iesu mi indarase itido isera awarate Iesu gambudo gido indae doturisira.

<sup>35</sup> Edo ungoi Iesu benema mi orega da dedo Iesu da ombari awa katabedo badi sedo pipi ga isera. <sup>36</sup> Ise Iesu ditini isera. <sup>37</sup> Edo ungoi ge gaedo benema mi orega inda ge gaisera awa dorisira. Edo ge gaisera awa eiedo sisira, “Eiawa Iesu Jew embomei da gitijigari nembodiba.” <sup>38</sup> Edo ge gaiari awa itido edo ungoi bengono embomei etoto awa



benema mi orega etoto da dorisera. Edo uro ngambedo embo da awa Iesu da ingo be da edo nei awa Iesu da ingo anda da awodo orega da dederisera.

<sup>39</sup> Edo embo ave puma derigurise mani mani edo Iesu gandubedo iro jirido isera. <sup>40</sup> Edo iro jirise sedo isera, “Inemi sedo isesa Jew embomei datumondebain ari oro awa arasegedo edo sekago iji tamonde de jigaso erarase sedo isesa. Edo imo Mamo da mei gido orega dodo wosedo imo imosuka kondade eio.”

<sup>41</sup> Edo ungoi awodo seoro da awodo priest gitijijegari de edo agodari atopatari embomei de Jew embo nem-bogambo de mi Iesu ganduburise sedo isera, “Umo embo nenei soregedo ira te umo umosuka soregari sago ae ira giwo. <sup>42</sup> Edo umo mo Jew embomei da gitijigari ta? Edo umo orega awa dodo wosadira awa nango umo gebe adera. <sup>43</sup> Edo umo sedo ira umo awa Mamo da mei edo umo Mamo tumonda edo ira. Edo Mamo umo kondade ari dipapa ita mo aeri awa ingode gore.” <sup>44</sup> Edo da awodo bengono embo etoto daedo benema mi orega da dorisera amimi Iesu da yei biae sisira.

### *IESU BEBETISIRA*

<sup>45</sup> Edo iji soropu da busu berari awa umenga mi gajisira. <sup>46</sup> Edo ongobo soropu da waiko sekago janibetiri Iesu gogo dimbusira, “Eli Eli lema sabachthani?” Ainda be awa, “Naso Mama Naso Mama ro edo na dotesi?” <sup>47</sup> Siri embo nenei derido atisira amimi ingido sisira, “Elijah jawo sira.”

<sup>48</sup> Sedo embo da mi sumbudo openga budo ribe grape da ngamo tokaka ainda patido ituka da digido Iesu da yei jijigurisera edo Iesu mi indarase sisera. <sup>49</sup> Awarate embo nenei mi sisera, “Elijah mi bugudo umo kondade eita mo adi aeri? Simba eu ingode gore.”

<sup>50</sup> Sedo simba ero Iesu sekago gogo dimbudo uso asisi Mamo da yei itido edo bebetisira.

<sup>51</sup> Edo Iesu betetiri bo nembodiba Jew embomei da tumondebain ari oro da yei ewamei be gajari awa tuturo inda edo keredo wosedo tuda bugusira. <sup>52</sup> Edo busu didira isira edo ganuma bejisira edo kokombo be pirigetiri edo Mamo da embo jiwae matu bebetegari awa Mamo mi etiri ungoi ungodada kokombo dodo wasiri de eriserera. <sup>53</sup> Edo ainda amboda Iesu wasiri de eriri embomei awa Jerusalem torero embo jiwae mi ungo gosisera.

<sup>54</sup> Edo isoro da gitijigari de isoro embomei de Iesu ditini ise atisera amimi busu wasiri isira edo ro berari isira awa gido ungoi oju edo sisera, “Gebe umone be Mamo da meira.”

<sup>55</sup> Edo embo evetu jiwae Galilee busu dodo Iesu kondade adi bugusera awa aike anumbedo atise ditini isera. <sup>56</sup> Edo ainda teda awa Mary Magdalene edo Mary James de Joseph de da ai edo Zebedee da memei da ai de mi atisera.

#### *JOSEPH IESU GOWUSIRA*

<sup>57</sup> Edo ongobo etiri embo rora jiwae embo Arimathea busu da amimi uso jawo Joseph umo awa Iesu da ambojimbi da amimi bugusira. <sup>58</sup> Bugudo Pilate da yei mambudo Iesu da tamo awa itari badi benunu sisira. Benunu setiri Pilate mi setiri Iesu da tamo itero Joseph mi burisira. <sup>59</sup> Edo Iesu da tamo itero budo Joseph mi bo seka mi dogedo Iesu da Tamo awa Joseph unemi meko da kokombo uso ingo mi seka be seka isira ainda ititisira. <sup>60</sup> Edo Joseph mi ganuma nembodiba awa budo bunini setiri meko uso be awa gajisira. Gajedo awodo dodo mambusira. <sup>61</sup> Edo Mary Magdalene de edo Mary nei de awa meko kokombo benei da anumbedo atisera.

#### *IESU DA KOKOMBO AWA SIMBA ISERA*

<sup>62-63</sup> Edo bondo sia ari iji awa atae etiri sipo de priest gitijijigegari de Pharisee embomei de mi Pilate ga dada edo Pilate da yei sisera, “Gitijigari nango kotemburera

atise gebusari embo mi sisira iji tamonde atae ari na sekagoeradena sisira awasedo seio kokombo be awa iji tamonde atiroro simba edo gogo ore. <sup>64</sup> Doru uso ambojimbi mi uso tamo awa bengono edo seore Iesu re betedo sekago erira. Edo umo matu ge busisira awarate ge busari eiawa be biae be ra.

<sup>65</sup> Setero Pilate mi ungodu yei sisira, “Simba ari embo budo mambudo kokombo awa simba edo gogo ewo.”

<sup>66</sup> Setiri ungo Pilate dodo mambudo ganuma awa esi mi yise genibedo puse genibedo edo etero okain etiri ungo simba ari embomei simba orase dodo ungo mambusera.

## 28

### *IESU DA ERARI*

<sup>1</sup> Edo Jew embomei da tumondebain ari iji atae etiri Sunday sipo be sipo de Mary Magdalene de evetu nei Mary ainde mi kokombo gadi mambusera.

<sup>2</sup> Edo iji ainde busu wasiri adi tuturo isira. Edo Mamo da asisi ewamei awa utu dodo wowosisira. Wosedo ganuma misetiri mambiri ainda tamo da anumburisira. <sup>3</sup> Edo uso gari awa gari teta birigi inge edo uso ombari awa parara teta aginya da tamo da awodo. <sup>4</sup> Edo simba ari embomei asisi ewamei awa gido oju mi bebegae edo dudu gasedo ambae sumbae isera.

<sup>5</sup> Edo asisi ewamei ainda anumbedo emboevetu da yei sisira, “Oju eove. Na gosena ingo Iesu benema mi orega da doritara awa eura ewa te Iesu re einda atae ra ainda be awa umo sekago wasiri de erira unemi sisira da awodo.

<sup>6</sup> Edo yei umo pasido atari jirira awa puwo gave. <sup>7</sup> Edo ingo burigi mambuwo. Mambudo uso ambojimbi da yei save Iesu betedo wasiri de sekago erira. Erido umone giti giti Galilee busu da mambutira edo umone ainda gadewa sewo. Edo na ro setena awa kotewo.”

<sup>8</sup> Edo asisi ewamei awodo setiri embo evetu awa kokombo awa dodo oju isera te daedo iaviri isera edo ungoi burigi be Iesu da ambojimbi soro gorase sumbusera.

<sup>9</sup> Edo ungo sumbero Iesu mi ungo tambudo sisira, “Bugutewa.” Setiri ungo uso yei bugudo uso tei da jigido ungoi Iesu tumondebain isera. <sup>10</sup> Edo Iesu mi sisira, “Oju eove ta mambudo naso otatao awa sewo Galilee busu da mambore edo ainda ungo na gadera sewo.”

#### *KOKOMBO SIMBA ISERA EMBOMEI MI RO ISIRA AWA SIS-ERA*

<sup>11</sup> Emboevetu awa mambutero isoro embomei etoto ungo kokombo simba ise atisera awa engenembedo nati da mambusera. Edo mambudo ro berari isira awa ungoi priest gitijijigegari da sisera. <sup>12</sup> Edo priest gitijijigegari de Jew embo nambogambo de dada edo ro eri awa kasisera. <sup>13</sup> Edo ungoi ge dada sedo isoro embomei da yei gano nembodiba be itido sisera, “Sewo uso ambojimbi mi nango ewo ero tumba de bugudo uso tamo awa bengono edo budo mambora sewo. <sup>14</sup> Edo Rome embomei da gitijigari ro etira awa ingido sari nango mi ge eiawa soro gido umo mana ingoda yei riroga mana itadira.” <sup>15</sup> Setero simba ari embomei gano awa budo ro priest gitijijigegari mi sisera awa isera. Edo iji ainde edo bugudo boroko da awodo Jew embomei da awodo kiki da awodo awa sedo era.

#### *IESU DA AMBOJIMBI IESU GOSISERA*

<sup>16</sup> Edo ambojimbi 11 awa doriri Galilee busu da ainda Iesu mi mamborase sisira ainda mambusera. <sup>17</sup> Edo ungoi Iesu gido Iesu tumondebain isera awarate embo nenei awa mana mana isera. <sup>18</sup> Edo Iesu mi asusubedo bugudo ungodu yei sisira, “Mamo mi naso yei goroba nembodiba itira awasedo nanemi rora berari awa simba ena edo embo berari utu da atera ainde busu da atera ainde simba ena. <sup>19</sup> Awasedo busu berari da embo atera ainda

mambuwo. Edo ingo Mamo da binga awa sewo edo awo naso ambojimbi ore. Edo ungo naso ambojimbi oro Mamo de uso Mei de Asisi Kotopu de da jawo da ewamei ewo. <sup>20</sup>Edo ewamei edo ro berari nanemi ingoda yei setena awa atopatiwo. Edo utu de busu de awa atae adira te na awa ingode iji natopo atadena.”

BINGA EWAMEI IESU KERISO DA JAWO DA  
The New Testament in the Ewage-Notu Language of Papua New  
Guinea

Nupela Testamen long tokples Ewage-Notu long Niugini

copyright © 1987 Wycliffe Bible Translators, Inc.

Language: Ewage-Notu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

---

PDF generated using Haiola and XeLaTeX on 19 Jul 2019 from source files dated 19 Jul 2019

901ecdaa-e20b-5e4f-a560-92b077a0eea3